

**GUX BHAI'M KAI'CHDHAM
 ÑI'OOK NA BHAAN TU A'GA GUCH
 XOI'KAM NAT TU UA'NAK GU
 MAARKOS**

*Gu Jesuus na mi' ba aaya' na pai' ja bopkonda' gu
 Juan gu ja'tkam*

(Mt. 3:1-12; Lk. 3:1-9, 15-17; Jn. 1:19-28)

¹ Ja'pni ja'k bhai' jim tibgai dhix bhai'm kai'chdhdam ñi'ook na bhaan tu a'ga guch Xoi'kam, Mara'an gu Dios, ² nat tu ua'nak bijik gu Isaiiyas jano' nat pai' dhuuk bha ñio'kdhak gu Dios, na sap Jup titda guch Gi'kora' gu Mara'an:

Jumaiñ biipi' mu jootsa' na ba' ba ja mattuda' gu ja'tkam nap jootom mui' ba jim.

³ Na mu ja'p pix ba tu ja a'gil'ñidha' gu ja'tkam gampix jix chu gak kir nap ja titdada':
 "Gor jix kii' bim duuñ.
 Ja'p pik bhai' bar jimdam gu Ge'kam.
 Mi' pim sap pui' ba Jimia' na jax jix aa'."

⁴ Ba' pui'p jum duu ip, mummu ja'p pix ba oirida' gu Juan na pai'r gampix jix chu gak kir, ja bopkonda' gu ja'tkam pui' xi ja titdat na sap jir am nam xim bopkonai mi' pui' ba Jimia' na jax jix aa' guch Gi'kora', na sap ba'x ja joi'mdai ba uañchuda' gu ja ua'tulhdhara'. ⁵ Ba' mui' ja'tkam mi' aajidha' am gu bhammi dir kam Jerusaleen na pai'r ge' kiicham, gio ba' jai' mui' kap dir na ji'x Judea dibiir bhaan bipio', nam jix kaim ka', na gu' giilhim joidham jix bhai' xi buada' na tu a'gada'. Ba' gui'

nam ji'k ti jiigi'ñdha' na silhkam jir pui' na jax tu ja a'gi'ñdha', pui' ba titdada' am nam sap cham ka aa' nam jix ua'tulhdhix ka'. Ba' gu Juan dai na xi ja bopkonda' mi' na pai' mirda' gu suudai' Jordaan Ak.

⁶ Ba' gu Juan gu tii'dharga'n, kameeyo gu bapoo'n jir yup duiñxim ka', gio ba' gu bhisparu'n jir jo' ka' ip. Ba' na pai' dhuuk bax bhio'n ka', dai gu sosozi na tu da'ngit tu kua'da' gio ba' gu miibat gu gampix kam. ⁷ Ba' na tu ja a'gi'ñdha' gu ja'tkam yup ja titdada':

—Gatuuk dir bha jim gui' nax io'm jir ge'lcam, cham tu' pui' na jax aañ, na ni ji'x kuñ cham jir jupaabkamu'n nañ dhumaartii tu' suska'n yup ba kookoxdha' git. ⁸ Ba' aañ xib suudai' ki'n pix ka jam bopkon, gu' ba' gui' na pai' dhuuk ya' aaya', pui'p ji buusnia' na jam bopkona', na gu' ba jam tajaañdha' gux Dhuudu' kam jix Uañ Ii'mdaga'n gu Dios.

*Gu Jesuus na ba chiñia' gu Juan na bakuana'
(Mt. 3:13-17; Lk. 3:21-22)*

⁹ Ba' janoo' mui'p ma jii gu Jesuus mummu dir Nasareet na pai' Galilea dibiir bhaan bipio'. Ba' mummu ba ji buus Jordaan Ak mi' na pai' oirit ja bopkon gu Juan gu ja'tkam, ba' mi' pui' ba titda ip na sap bakuana'. ¹⁰ Ba' nat pai' dhuuk mui' ji buus mi' dhir suudai' chir gu Jesuus na ba bakuañixchu', ba tii nat bhai' jim kupio' gux dhaam, gio ba' nat bhai' ji chim gux Dhuudu' kam jix Uañ Ii'mda' ja'p tu'm na gioda', ba' nai' ji jaa bhai' bhaan. ¹¹ Gio ba' nat ba kai nat bhai' ba tum a'ga bhammi dir jix dhaam, yup tum kai'ch:

—Aap jir di' nap jir jiñ mar nañ xim kíigalhi'ñ,
gio nañ gø'l kam ki'n jix bhai'ñ chaat aap jum bui.

*Gu ja'oook na tiix mai'chim ka' gu Jesuus
(Mt. 4:1-11; Lk. 4:1-13)*

¹² Ba' gatuuk mi' dhír ma jii gu Jesuus mummu
ja'k maa'n kap na pai'r gampíx, nat gu' pui' ja'k ju-
rtuda gux Dhuudu' kam jix Uañ Ii'mda'. ¹³ Ba' mi'
juruuñ maa'n masaa'n daman mambhiix tanoolh,
miji ja'p pu oirida' díilh na pai' cham jaroi' oirida'.
Dai gu tu' ji'ngiarum na mi ja'p tum oipoda', gio ba'
guch Gi'kora' gu noonbi'ñ nam guguuxi'ñdha'. Ba'
mi' ba ai gu ja'oook na iłhdhat na moo mi' mai'chia'
git, gu' ji nat gu' cham jax dhooda.

*Gu Jesuus na kia'pix ba ji chu ja a'gidha' gu
ja'tkam*

(Mt. 4:12-17; Lk. 4:14-15)

¹⁴ Ba' mikkat na mit pai' dhuuk ba kuu gu Juan,
ma jii gu Jesuus bhammi ja'k Galilea nat ba tu
ja a'gidham gu ja'tkam gux bhai'm kai'chdham
ñio'ki'ñ gu Dios. ¹⁵ Ba'p ja titdada' bhammi ja'p ji
oirit:

—Ya' mam aiñ jaaduñ na pai' dhuuk tu daaxix
na maaxik jum maaxdha' gu Dios aapi'm jam bui,
na pim ba' bax mat ka' nax chu joi'gi'n sia kux
io'm jir gø'l kam. Ba' dai na jam a'm bam aa' na
pim mi' pui' ba Jimia' na jax jix aa', gio ba' na pim
ti ji'ñdha' na bhai' ji chu jam a'gidha' gux bhai'm
kai'chdham ñio'ki'ñ.

*Gu Jesuus na ba ja baidhika' maakob gu boptop
bhiadam*

(Mt. 4:18-22; Lk. 5:1-11)

16 Ba' ma jii gu Jesuus mummu ja'p ju'ñdharan na
pai' gę' suu'nka' gu suudai' gui' na Galilea dibiir
bhaan bipio'. Ba' mi' ba ja tii gook gu boptop
bhibhiadam daim sispidhim nam mi ja'p buppaim
suudai' chir maa'n gu gę' asaak. Maa'n Simoon
tiigim, jumai ba' Anrees. **17** Ba'p ja titda gu Jesuus:

—Aañ pui' ilhii'ñ jiñ jaaduñ na pim xib dir
gammiji bañ kaichgida', na pim ba' jai'ñ palh-
buidha' nañ tu ja a'gidha' gu ja'tkam. Bar ja'tkam
bhibhiadam ka' pim pix ba', cham tu' boptop bhib-
hiadam kia', na gu' gui' nam ji'k ba ti jii'ñdha' na
pim ji'k jax tu ja a'gidha', dhi' ja'p ji buusnia' na
pim ba ja bhia'.

18 Ba' gui'p ma oi mit cham jax ji chi'iiik. Mi' xi
iabok jamit gu ja a'sak.

19 Ba' palhiip gama ja'k iam xi jii mit biix
ju'ñdharan, mi'p ba ja tii mit gu Jakoobo gio gu Juan,
maamra'n gu Sebedeo, nam mi' daraat kanuub
ta'm ka ja jiisom gu ja a'sak gui' nam ki'n tu
bhibhia gu boptop. **20** Ba' pui'p ba ja titda nat jax ja
tiiidak ja baidhak gui' na ja biim ba jim. Ba' gui' pui'
cham jax ji chi'iiik ma oi mit ip, mi' xi buak jamit gu
ja taat Sebedeo ja biim gu tujuandam tugi'ñ.

*Gu Jesuus na ba dua'ñdha' maa'n gu maa'nkam
na kax ñaanbi' ka'
(Lk. 4:31-37)*

21 Moo mit mummu ja'k bhii Kapernaum na
pai'r kikcham na ba' moo bam aaya' na pai' dhuuk
cham ka tum juanda'. Ba' jan'o' nat pai' bam ai,
mui' ma jii gu Jesuus mu nam pai' tu chiopi' gu
Israel kam ja'tkam. Ba' mi' baakik bhai' ji chu ja
a'gi. **22** Alh ni jaroi' ku ñiok, mi' pui' pup tu'ii' am na

mit ba kai, na gu'x io'm bhai' xi bua na xi chu a'ga, cham tu' pui' na jax gui' nam yup kai'chdha' nam sap jix mat ka' gu ñio'ki'ñ gu Dios. ²³ Ba' maa'n mi'p oirida' gu maa'nkam na ampix jix ñaanbi' ka', na bhaan baax ka' gu cham kii' ii'mda'. Ba' na mi' ka tu ja a'gil'ñ gu Jesuus gu ja'tkam, mi' baakik chiop gø' ki'n mui' ba ñio gux ñaanbigim, na gu' pui' ja'k jurtu'ntu' gu cham kii' ii'mda', yup kai'ch:

²⁴ —¿Jax japich bhai' bach dhoodam Jesuus Nasareet kam? ¿Ka'p ti bhai' bach koodam aa? ¡Aañ jix maat jia nap aap jir di' gu Dios gu maaxik duakam!

²⁵ Gu' ji na gu' maa'n nat jax ñiok gu Jesuus, yup titda:

—¡Cha'p ñiokda' cham kii' ii'mda' nap naan-bichu'n dhiñ jaduuñ! ¡Mup buusnia' bhai' dhír bhaan! ¡Cha'p bhai' pu tui'ñgida'!!

²⁶ Ba'x io'm xi bhi gu maa'nkam nat pai' ba ji buus gu cham kii' ii'mda' bhai' dhír bhaan. Gø' xi jiiñkik nat ba' pik ba buus. ²⁷ Ba' dappaam mi' pui' pup tu'ii' am dho gi ji ba'x io'm gu ja'tkam, dai nam nai' tiim ti tikka'n díilh jix dhu'npí'ñ ki'n, yup kai'ch am:

—¿Jax ba'r jum duukam chi dhi' pui'? Gi nach cham ji'xkat pai' dhuuk pui' chi ñiidhat na jax tu buim dhi Jesuus. Tii' na sia gu cham kikii' i'ii'mda' tu' pix ja ihii'ñ, jix ji'gi'ñ am.

²⁸ Ba' cham miikim na mit biix pui' ba ti kai gu ja'tkam na ji'x jir Galilea na ji'k jax tu buim gu Jesuus.

*Gu Jesuus na ba dua'ñdha' gu daada'n gu Simoon Peegro
(Mt. 8:14-15; Lk. 4:38-39)*

29 Ba' ja'xpix nat ba buus gu Jesuus mi' dhir chiop, na xi chu ja a'gidhimik gu ja'tkam, silh jii mummu gama ja'k nam pai' tu ba'aak gu Simoon gio gu Anrees. Ba' biix jai' xi jiim am gu Jakoobo gio gu Juan. **30** Ba' gu daada'n gu Simoon mij'i ka bo' ba'k chir jum bakxidhat na eet gu toiñdhi!. Ba' nat jax mu ai gu Jesuus, ba aagi'ñ am gu mi' oi'ñkam nax ka'ook. **31** Ba' mui' ji ai gu Jesuus mi' na pai' bo', ba' daagik nobi'ran xi bamii!. Jix kii' bhai' ji bam mi' jotmoda' pix, ba' dai nat ba tu ja onbai!.

Gu Jesuus na ba ja dudua'ñdha' mui' gux kako'kkam

(Mt. 8:16-17; Lk. 4:40-41)

32 Ba' nat pai' ba bhi'ñ gu tanoolh, na pui' bax dhidimpu', mui' ja'tkam pix ja'x ji ai mit mi' ba'aak kii' na pai' daa gu Jesuus ji ja baidhat gux kako'kkam, jai' gui' nam ampix jix ñanaanbi' ka' na ja a'm yup tui'ka' gu cham kikii' i'ii'mda'. **33** Giilhim mui' mit mi' mam jumaap ki'ñgob gu mi ja'p oi'ñkam na ji'x jir kiicham. **34** Ba' pix ja'x ji ja dudua'ñ gu Jesuus gux kako'kkam, na gu' mi ja'p moo biix aixim tu'm yup te eeka' gu ko'kdai!. Jai' gui' nam ampix jix ñanaanbi' ka', biix ja'k ja joot gu cham kikii' i'ii'mda' ja a'm dir. Pu cham ja do'ñcho nam jax bha tu a'ga gu cham kikii' i'ii'mda', na gu'x bhai'x maat na no't jax dhuuk xi ja do'ñcho nam bha tu a'ga', mi' maaxik ba kiisa' am nar tu'p tu'm da'.

*Gu Jesuus na ba jimia' mu ja'p na ji'x jir Galilea
na tu ja a'gi'ñmira' gu ja'tkam*

(Lk. 4:42-44)

35 Ba' bijik ba bam gu Jesuus na kapup jix chukgam, ba' ma jii namm̄i gama ja'k na pai'r gampix. Mi' ba' bhai' ji chu a'ga jix dhaam ja'k buiñor guch Gi'kora'. **36** Ba' ja'xpix nat pai'x bhai' ba xia', mui'p ma gaagam gu Simoon bamgik ja biiñ gui' nam takaab dir maap jii mit gu Jesuus. **37** Ba' namm̄i pix ji chii mit na pai' ka oiri, ba'p titda am:

—Bhammi tiim ga'nga' am mui' gu ja'tkam.

38 Gu' ji na gu'p ja titda gu Jesuus:

—Gatuuk jach dho gio bhai'p aaya', na gu' ka tum aagim. Maik gor kia' mijini ja'p na jax jir kikcham, sia dai ya ja'p mia'n kia', nam ba' gu' biix jup jix mat ka' gu ja'tkam nañ ji'k jax tu a'ga, na ñich gu' pu kai'ñkam bha jii.

39 Bhai' ba' pu oiriða' na ji'x jir Galilea na tu ja a'gi'ñdha' gu ja'tkam bha ja'p nam jax tu chi-chiopi'. Gio ba' na ja'k ja jootsaim gu cham kiki'i l'iimda' ja a'm dir gui' nam jix ñanaanbi' ka'.

*Gu Jesuus na ba dua'ñdha' maa'n gux ko'kkam na
tootolhidhat bha gakiidha' gu tukga'n*

(Mt. 8:1-4; Lk. 5:12-16)

40 Ba' maa'nnim mu ba ai maa'n gux ko'kkam na pai' oiriða' gu Jesuus, na tootolhidhat bha gakiidha' gu tukga'n. Ba' mi' o'lhia'n ki'n ji kikbuk biiipi' dir jup titda:

—Aañ ja'pni moo soi' bham tiidam jiñ jaduuñ nañ ja'p te' kee nap bixchu'x aichu'n nach chu' cham pai' niññ, nap iam jiñ dhua'ñdha' no'p moo pui'p ilhii'ñdha' git.

41 Ba'x joi'mdak ba tiñ gu Jesuus, ba'p titda bhai' xi dhaagik:

—Jir am dho, nañ gu' pu kai'ñkam ya oiri. Jaiñ, ba dua pich. Cha'p jax kam aa'nda'!

⁴² Ba' dai nat pui' ji' xi chii'n, jotmoda'x bhai' bhai' ji chu taatdat. Jix kii'p jum duu, pu cham pai' ka tu ko'k. ⁴³ Ba' gu Jesuus tii xi soo'mchulhdhak ba joot na cham tu aa'nda' nat jax dhuuk dua, jup titda:

⁴⁴ —Dai nap moo cham jaroi' aagi'ñdha' na ñich aañ jum dua'ñ. Dai nap silh jimia' bhammi na pai' daa gui' na jai' ja palhbui'ñdha' gu Israel kam ja'tkam nam tu daanda' buiñor gu Dios, na ba'm tigia' na pich ba dua. Xi chikkada' ap. No' jax kai'ch nap bax kii', dai nap tu makgirtai titikia' na jax ja'k aagix nat tu ua'nak gu Moisees, nam ba' bax mat ka' gu ja'tkam nat ba buus gu ko'kdai' dhi' nap ki'n kax ka'ook kat.

⁴⁵ Gu' ji na gu' gui' moo jano' nat jax jii, piix ja'x ja aagi'ñ gu ja'tkam. Giilhim biix pui' bax chu maat am. Ba' pui' mi' pup oiri gu Jesuus gampiix, miji ja'p tibiappuda', na gu' cham ka aa' na maaxik bhammi ja'p oirida' ge'gér kikcham. Ku gu' pui' piix mui' mi'p aajidha' am ji na pai' oirida'!

2

*Gu Jesuus na ba dua'ñdha' maa'n gux ma'mkulhi'
(Mt. 9:1-8; Lk. 5:17-26)*

¹ Ba' gatuuk ji'kchi журниñ ki'n gio mi'p ba ai gu Jesuus Kapernaum. Mi' pai' maa'n kiicham pix ba kaidha' na tibiap. ² Ba' jotmoda' piix ja'x ji ai mit gu ja'tkam, giilhim mui' mi' mam jumaap jamit. Jix kabkam suu'n jamit miji ba'k chir, pu cham jir buusan mi ki'ñgob, na gu' mi' dhir diirrap dir nammii ja'p jup xi ju' am. Gu Jesuus ba' dai

na tu ja a'gi'ñchu'. ³ Ba' ja'xpix maa'n mi' ba aich jamit gux io'm jix ma'mkulhi' maakob dit. ⁴ Ba' ilhdhat am nam jiimit mijì pu baapkia' git ba'k chir na pai'p tu'ii' gu Jesuus, gu' ji na gu' cham bhaai', nam gu' giilhim jix kabkam suuda' gu ja'tkam. Pui' mit alhi'ch ma digaar gu ba'aak daam dir na mit ba' mu tisaa'ñdhak bhai' dhir mu tibaañ bakxidhar ta'm mijì na pai'p tu'ii' gu Jesuus. ⁵ Ba' nat ba ja tii gu Jesuus nam buiñor jix biiñaktu', jup titda gux ma'mkulhi':

—Cha'p jax kam aa'nda'ñ jaduuñ. Ba uañchudhix ji matgam gum ua'tulhdhara', na ñich gu' aañ pui' ba tii.

⁶ Ba' ji'kchi mi'p daraa am gui' nam sap jix mat ka' gu ñio'ki'ñ gu Dios, ba'p jum aa' am ja jujur am bhaan: ⁷ “¿Jax ba' ilhdhat jup kai'ch? ¿Ja'xbui' aa sap tii gø'kam jup xim ilhii'ñ na gu Dios? ¿Jaroo gip ba uañchuda gu tu' ua'tulhdhara' gu jaroi' ya' kam pu chu'm ip jix ua'tulhdhix kam? Dios dho gi jii' ji.” ⁸ Gu' ji na gu'x bhai'x maat gu Jesuus jura'ran bhaan nam jax jum aa', ba'p ja titda:

—Ni ji'x iam kur pui' na pim jax jum aa' gu jam jujur am bhaan. ⁹ Na gu' cham pik xijai no'ñ jax kai'ch: “Ba uañchudhix ji matgam gum ua'tulhdhara!”, na gu' cham maati' ka' no' moo pui' ji buusnia' piäm ku gu' cham. Gu' ji no'ñ jax kai'ch: “Xi bamii', munip ja'p ba oirida' bhiiji gum bakxidhara!”, dho gi gu'x xijai ji, na gu'x maati' ka' no't cham pui' ji buus. ¹⁰ Ku ba' gu' aañ xib ya' dua'ñdha' ji dhiñ jaduuñ nax ma'mkulhi' na pim bax mat ka' na aañ nat bhañ joot gu Dios, jir gø'kam iñ nañ ba' ya' tu uañchuda' gu ua'tulhdhara' ya' dhi oi'ñga'n.

Ba'p titda gux ma'mkulhi' pui' xi chi'iik:

¹¹—Aapi'ñ jaduuñ nap jix ma'mkulhi', xi bamii'. Ba jimia' ap jum ki'aam, bhiiji ap dhim bakxidhara'.

¹² Ba'x kii' bhai' ji bam gui' na kax ma'mkulhi' kat nat jax pu tii'n gu Jesuus. Ba' dai nat ba jii xi bhiik gu bakxidharu'n, mui' ba buus ja saagi'ñ gu ja'tkam gammiji ji dhuu. Ba' mi' pui' pup tu'ii' am biix, mi' dhir ba' ma tu daani mit buiñor gu Dios, jup kai'ch am:

—¡Mooch pik cham ji'xkat pui' ti niidhat ji jich Gi'kora!!

*Gu Jesuus na ba baidhika' ip gu Lebii
(Mt. 9:9-13; Lk. 5:27-32)*

¹³ Ba' mikkat gio'p ma jii gu Jesuus mummu ja'p ju'ñdharan na pai' gø' suu'nka' gu suudai!. Ba' mui' ja'tkam mi' mam jumaap jamit na pai' ka oiri, ba' xi chu ja a'gidhimik. ¹⁴ Ba' ja'xpix nat giop ba jii, nat nammi ba ji bhii jupaaban na pai' tum namki'ñ no'ñ gø' tu bhiiñor, mi' pix ji chii gu Lebii, maraa'n gu Alpeo, gui' nar tuumiñ tu taandam tugil'ñ ka' gux io'm gø'kam Rooma kam, Seesar tiigim, na mi' daakat pix ji dhaagim gu tuumiñ gui' nam mi' tu namkidhim. Ba' mui' ji ai gu Jesuus, mi ja'p amuub xi kikbuk jup titda:

—Aañ pui' ilhii'ñ jiñ jaduuñ nap xib dir gammiji bañ kaichgida'.

Ba' gui' nat jax kikbuk pix chu'p jum duu cham jax ji chi'iik, gammiji pix ko'kmar jiim am.

*Gu Jesuus na ja bii'm ba tu jugia' gui' nam cham
tu' ka'm ti nii'ñdha' gu ja'tkam*

15 Ba' gatuuk ma ja baidhak gu Lebii gu ja'tkam mummu kia'mi'ñ nam mi' tu jugia' buiñor. Moo jimchu' gu Jesuus gio gu ja'tkam tugi'ñ, gio jai' gui' nam jir tuumiñ tutaandam tugi'ñ ka' gux io'm gø'kam Rooma kam Seesar tiigim, gio gui' nam pui' ja bia'ka' gu gø'gørkam jum aa'ndam nam sap cham tu' ka'm ti nii'ñ. Ba' gu Jesuus jix bhai'm taatit bhai' ji chu juu ja biim, nam gu' mui' ba kaichu!. **16** Ba' ji'kchi gui' nam sap jix mat ka' gu ñio'ki'ñ gu Dios gio gui' nam pariseos jum tiiti'nda', am bhaak jamit na mit tii gu Jesuus na ja biim tu kua' gui' nam jir tuumiñ tutaandam tugi'ñ ka' gux io'm gø'kam Rooma kam, Seesar tiigim, gio gui' nam pui' ja bia'ka' nam sap cham tu' ka'm ti nii'ñ. Ba' ja'p ja'k xi ja boosgak jamit gu ja'tkam tugi'ñ gu Jesuus, jup ja titda am:

—Jax ku ba' ja biim tu kua' dhi jam gø'kam tuk dhi tuumiñ tutaandam gio dhi' nam cham tu' ka'm ti nii'ñ?

17 Gu' ji na gu' ja kee' gu Jesuus nam jax kai'ch, ba'p ja titda:

—Dho na gu' dhi' ja'pni jia na jax gu ja'tkam no'm jix kikii', na gu' cham ja a'm jum aa'nda' na jaroi' ja duduadhi'ñdha', na gu' dai nam gø'gørkam jum taat ka'. Gu' gui' ji nam ji'k jix kako'k ka'na ba' ja a'm jum aa'nda', nam gu' soi'm ilhii'ñdha' nam jix dhuduadhim ka'. Ba' aañ na ñich bha jii ya' dhi oi'ñga'n bhaan, cham tu' pu kai'ñkam bha jii ñich nañ ba' ja baidhika' gui' nam gø'gørkam jum taat, nam pui'm aa' nam tu' ka'm ti nii'ñ, gu' ja'pji gui' ji nam ji'k bax maat nam jix u'ua'tulhdhix, nam gu' soi'm ilhii'ñ buiñor gu Dios. Dhi' ji' ji nañ ba' ja baidhika'.

*Gu Jesuus nam ba tikka' na sap jax kum ba' cham
jum saabda' gu ja'tkam tugi'ñ
(Mt. 9:14-17; Lk. 5:33-39)*

18 Ba' maa'n nim ji'kchi gu ja'tkam mui' ma tikcam jamit gu Jesuus na sap jax kum ba' cham ji'xkat pai' dhuuk ja nii'ñ nam jum saab gu ja'tkam tugi'ñ. Na gu' gui' nam kaichu' gu Juan gio gui' nam pariseos jum tiiti'nda', gammiji'pix ja nii'ñdha' am nam jum saabda'. Ba'p titda am mummu ɸek:

—Jax ku ba' aap gum ja'tkam tuk cham ji'xkat pai' dhuuk ja nii'ñ ich nam jum saab?

19 Ba'p ja titda gu Jesuus:

—Dho na gu' dhi' ja'pni ji buusan jia na jax no' jaroi' mu pai' ba xim tiiumum, nam gu' cham jum saabum jum ilhii'ñdha' gu jajaa'nni'ñ, nam gu'x chu nak ka' gu koi'. Ba' pu'ñip ji buusan ja bui dhiñ ja'tkam tuk, cham jum saabum jum ilhii'ñ am gu xib, nam gu'x bhai'm taat nañ ya' kap tu'ii' ja bui. **20** Ku gu' kam aajim ji nam pai' dhuuk jiñ dhagia' gui' nam boiñ bhiichdha', jano' dho gi ba' bam saabu' am ji.

21 'Na gu' dhi' ja'pni ji buusan jia na jax gu jaroi' no't alhi'ch iikik gu xibkam jannulh tii xi dhaax gu tii'dharga'n no'r kilhii'ñga'n. Maa'n na jax giop sarnia' biix xikoolh dhir, na gu' bhai' ji so'lhka' gu xibkam jannulh na pai' dhuuk xi bakuana'.

22 Piam ja'p na jax gu biiñ, nam gu' xixiibkam jajo' bopko bhaan tu aidha' gu buusai'ñdham, na gu' no'r kiklhi'ñga'n, maa'n na jax xixiipñia', pu biix jum nu'aa' dho gu', na gu' giilhim jix o'jo' ka'. Pui' kum ba' xixiibkam jajo' bopko ta'm bhaan tu aidha' gu biiñ gui' na kia'pix buusnidha'.

*Gu Jesuus gu ja'tkam tugi'ñ nam tu kaipgaidhat
tu ko'iidha' gu muraa'n ga'n gu tiriik*

(Mt. 12:1-8; Lk. 6:1-5)

²³ Ba' maa'nnim na pai' dhuuk cham tum juanda', ma jii gu Jesuus nammi gama ja'k maa'n kap, moo mi' buusnichu' na pai' ti ix gu tiriik. Ba' gu ja'tkam tugi'ñ na ja biim jimchu', xi u'iidhat gu muraa'n ga'n xi kaipgaidhat tu ko'iim am. ²⁴ Ba' piix am bhaak jamit ji'kchi gui' nam pariseos jum tiiti'nda', na mit gu' ja tii nam ka tu u'iim gu tiriik muraada'. Ba' mu boopok jup titda am gu Jesuus:

—¿Jax kum ba' pui' tu buim dhim ja'tkam tuk?
¿Kux cham maat am aa na xib cham tum juan?

²⁵ Ba'p ja titda gu Jesuus:

—¿Kux aapi'm cham ji'xkat tu jiñkui'ñ aa mi' u'uan ta'm nat jax tu duu gu Dabii gio gu ja'tkam tugi'ñ jano' maa'nnim nam pai' dhuuk ba ua'maim? ²⁶ Na mit tu juu bo gu paan gui' na mi' tikiix kat ge' chiop, nat ja maa gu Abiatar gui' na mi'r ja ge'kam tuk ka' jano' gui' nam jai' ja palhbui'ñdha' gu Israel kam ja'tkam nam tu daanda' buiñor gu Dios, na saak dai gui'x bhaai'n ka' nam kua'da' git.

²⁷ Ja'pni ba' moop ja titda jia:

—Pui' kuñ ba' aañ cham pai' jax ja titda dhiñ ja'tkam tuk, sia kuñ ja nii'ñ nam jax tu buim. Na gu' na pai' dhuuk cham tum juanda', dai nañ jiñ jiipi'ñka' no'ñ jix aa' cham jax ji kai'chit. Piam kuñ gu' tu' jax jup jix dhuñiim, ¿jax gip bua? Na gu' dhi tanoolh cham tu' jax kai'ñkam pui' ja'k jum duu nañ bixchu' jix chu xidhuutu'n ka!. ²⁸ Na gu' pur cham tu' gu pui' na pim jax ja'k tii xi ilhii'ñ aapi'm. Aañi' ji nañ jix maat, nat gu' pu kai'ñkam bhañ joot

guñ Gi'kora' nañ ba' ya' ja aagi'ñdha' gu ja'tkam biix nam ji'k tu' jax buada', sia na pai' dhuuk cham tum juanda'.

3

Gu Jesuus na ba dua'ñdha' maa'n gu maa'nkam nax muuk ka' gu nobii'ñ

(Mt. 12:9-14; Lk. 6:6-11)

¹ Ba' mikkat nat giop bam ai na pai' dhuuk cham tum juanda', gio mui'p ma jii gu Jesuus maa'n kap nam pai' tu daanda' gu Israel kam ja'tkam, ba' jimat dat mijí ji baa. Ba' maa'n mijip daa gu maa'nkam nax muuk ka' gu nobii'ñ. ² Ba' piñ nñidhim am gu Jesuus gui' nam pariseos jum tiiti'nda', ea no't sap moo ba ji dhua'ñ gui' nax muuk ka' gu nobii'ñ, na sap ba' dhi' bhaan jix bhaai'n ka' nam jax ti'ya' nam iattulhdha'. Na gu' jano' aagix ka' na cham tum juanda', nam cham tu' jax buada' gu ja'tkam. ³ Ba' mui' ba bai'ñ gu Jesuus gui' nax muuk ka' gu nobii'ñ, jup titda:

—Eap bhai' xi jim jiñ jaduuñ. Ya'ni ja'p jap xi kikbu' amuub.

⁴ Ba' pui' xi chiidak jup ja titda ip gu jai' gui' nam mi'x bhaamut nii'ñ:

—Jax pin jum kai'ch gu ñio'ki'ñ gu Dios mi' na pai' tu ua'ñix? ¿Tu' pin jix bhaai' nach jax buada' na pai' dhuuk cham tum juanda', nach jix bhai' tu buada' aa pin, ka' pin nach jix buam tu buada' aa? Pui' na jax gu jaroi' no'x io'm jix ka'ook, ¿jax ja'k jum aagidha', nañ dhua'ñdha' aa, ka' nañ mi' pix xi nii'ñdha' aa no' mi ja'p ba mumki jiñ chaagiolb?

Alh pu ni jaroi' ku ñiok, mi' piñ pu tu'ii' am. ⁵ Ba' nai' xi ja nii'ñ gu Jesuus biix xikoolh gu ja'tkam

jix buam jum ilhdhat, ji'x tii am jix bhaamum jum ilhii'ñ, na gu' ni ji'x ku ja jujur am baapak na jax tii tu ja a'gi'ñ. Ba'p titda ip gio gu maa'nkam gui' nax muuk ka' gu nobii'ñ:

—Eap xi silihiiñ dhim nob jiñ jaduuñ.

Ba' gui' ja'p yup xi silh, jix kii'p jum duu na ja'p xi joini'ñ, panaas ku moo pu cham pai'x muuk kat.

⁶ Ba' bhaakuk jotmoda' jii mit gui' nam pariseos jum tiiti'nda' bhammi ja'k ja bui gu ja'tkam tugi'ñ gu Eroodis gui' na sap jir gø'kam ka', nam sap ba' bhai' xi chu a'gai maap nam jax ja'k duuji mu'aa' gu Jesuus.

Gu Jesuus na ba ja dudua'ñdha' mui' gux kako'kkam mummu ju'ñdharan na pai' gø' suu'nka' gu suudai' gui' na Galilea bhaan bipio' gu dibii'r

⁷ Gu' ji nat gu' ba jii gu Jesuus ja biim gu ja'tkam tugi'ñ mummu ja'k na pai' gø' suu'nka' gu suudai' na Galilea bhaan bipio' gu dibii'r. Ba' mui' ja'tkam pix chu'p tui'dhi' am nam mu oi'ñchu', moo gu Galilea oi'ñkam gio gu Judea kam. ⁸ Gio jai'm mui'p jimchu' gu bhammi dir ja'k kam Jerusaleen, gio gu Idumea kam, jai' gu baasi'n dir ja'k kam xia'lhbui na pai' bhiix gu Jordaan Ak, gio gui' nam biix xikoolh oi'dha' mummu na pai' gø'gø'r jir kikcham na pai' Tiiro ti tii' gio ja'p ja'k na pai' Sidoon ti tii', nam gu' pui' te' køø na gø'gø'r yup jum duu'nkam jix bhai' tu buim gu Jesuus. ⁹ Ba'p ja titda gu Jesuus gu ja'tkam tugi'ñ nam sap maa'n jix io'm ju'ñdharan ja'k xi buusaichulhdha' gu kanuub, na sap ba' bhaan bha tisdia' nam cham mi' ki'spa' gu ja'tkam no' mi' pix ja'p kii'k diirap. ¹⁰ Nam gu' giilhim mui' pix ji aajim gux kako'kkam, gio nam gu' alh na ji'x

ki'n nam amuub jix aik na pai'p tu'ii', pix am jum tutki'ñ am, aa'nda' git nam jax pik jum duña', nam gu' pui' tø køø nat mui' ba ja dudua'ñ. ¹¹ Ba' ji'ma'n mi'p oipo am gu ja'tkam na ja a'm yup tui'ñgida' gu cham kiki' i'ii'mda' na ja naanbichu'nka'. Ba' nam jax tigia' gu Jesuus, mi' ja o'lhia ki'n ji gu'nguk am biipi' dir, ba' gø' ki'n mui' pu nokia' gu maa'nkam, na gu' pui' ja'k jurtu'nda' gu cham kii' ii'mda', yup ti'ya':

—Aap jir di' nap jir Mara'a'n gu Dios.

¹² Gu' ji na gu' pu ja sosbhichulhi'ñ gu Jesuus nam mui' tii ji ñokia' nam sap cham mi' maaxik kisa' nar tu'p tu'm da'.

*Gu Jesuus na ba ja aaga' mambhiix daman gook
gu ja'tkam tugi'ñ nam jir noonbi'ñ ka'*

(Mt. 10:1-4; Lk. 6:12-16)

¹³ Ba' gatuuk ma jii gu Jesuus maa'n kap na pai'r oidha' ta'm, xi ja baidhak ji'kchi gu ja'tkam tugi'ñ na jax chu'm jix aa' diilh na ja biim jimda', ba' gui' ma oi mit ip. ¹⁴ Ba' na mit pai' dhuuk bhammi tiit's oidha' daam, bhai' ji ja aa nam jax chu'm bar noonbi'ñ ka' gammiji, mambhiix daman gook moo aich. Dhi' sap ba' bhaankamu'n nai' ja jootsa' nam tu ja a'gi'ñpu' gu ja'tkam gu ñio'ki'ñ gu Dios, ¹⁵ gio nap ja titda nam pui'p ba ja duduadhi'ñdha' gux kako'kkam, gio nam mai' ja joootsda' gu cham kiki' i'ii'mda' ja a'm dir gu ja'tkam gui' nam jix ñanaanbi' ka'. ¹⁶ Ba' gu Simoon maadit jir di' na bar nobii'ñ, gui' na gook ki'n jix mat ka' gu Jesuus, Simoon Peegro tiiti'nda'. ¹⁷ Mi' dhir ba' moo gu Jakoobo gio gu Juan, daim sispidhim, maamra'n gu Sebedeo, gui' nax joi'ñdha' na Boarnerjes ja

tiit'i'nda' gu Jesuus, na ja'p kai'ñkam jup jum kai'ch:
 Jix bhaa'mnagim. ¹⁸ Gio ba' mi' dhîr moo gu
 Anrees, Piliip, Bartolomee, Mateo, Tomaas, gio gu
 jumai Jakooobo, maraa'n gu Alpeo, gio gu Tadeo,
 gio ba' gu jumai Simoon, gui' na ja kaichgida' gui'
 nam kananiistas jum tiit'i'nda', ¹⁹ gio ba' gu Juudas
 Iskariote, gui' na gatuuk ja aa'ñdhara' gu gø'gørkam
 jum aa'ndam na pai' oirida' gu Jesuus nam ba' boi
 bhiichedha'.

*Gu Jesuus gu jajaa'nni'ñ nam ja'p jum aa'nda' na
 cham juraa'n ka bia'ka'*

(Mt. 12:22-32; Lk. 11:14-23; 12:10)

Ba' gatuuk na mit ja'k suulhgik bhammi dir na
 mit pai' jimiik, gio mi'p ji ai mit nam pai'x joi'ñdha'
 nam tibiappuda'. ²⁰ Ba' cham ji'x mïkim gio pix
 ja'x jup ji ai mit gu ja'tkam, giilhim mui' mi' mam
 jumaap jamit, pu cham jax jix bhaai' na tu jugia'
 gu Jesuus ni gu noonbi'ñ, na gu' dai nam tii ja
 palhbui'ñchu' gux kako'kkam. ²¹ Ba' pui' ba ti kai
 mit gu jajaa'nni'ñ gu Jesuus na cham bhaai' na jax
 tu jugia'. Ba' bhai' ma jii mit mummu dir nam pai'
 oi'dha' na mit bhai' ba baidham, nam gu' ja'p jum
 aa' na cham juraa'n ka bia'.

*Gu Jesuus nam maakam ba ai'chuxdha' gu
 ja'tkam na sap jajo'k gu ja gø'kam tuk bhaan jup
 tui'ñgida'*

²² Gu' ba' gu Jerusaleen kam na mit mi'p ai gui'
 nam sap jix mat ka' gu ñio'ki'ñ gu Dios, maakam
 jup ai'chuxi'ñ am gu Jesuus, jup kai'ch am na sap
 jajo'k gu ja gø'kam tuk bhaan jup tui'dhi', pui' sap
 kum ba'x jiigii'ñ gu cham kikii' i'ii'mda' na mai'
 ja jootos ja a'm dir gu ja'tkam jix ñanaanbigim.

23 Gu' ji na gu'x maat gu Jesuus nam jax kai'ch, ba' maap ja jumpadak bhai' ji chu ja a'gi bhaan ji chu ua'rgidhidhat gu tu' na ya' dhi oi'ñga'n jix chu jai'ch nam sap ba'x maatit kaaya'. Jup ja titda jia:

—Ni ji'x iam kur pui' na pim jax kai'ch. Jax dhui na cham ji'xkat mai' ja jootsa' gu ja'ook ge'kam jum aa'ndam gu biima'n tuutu'm jajo'k, nam gu' maa'n ii'mda'p duuk. Na gu' no't maadir tii mai' xi joot, ja'p ji buusnia' na diihl mai'm jootsa'.

24 Na gu' dhi' ja'pni na jax gu dai ge'gerkam jix kakai' no'm cham maa'n ñi'ook jup duuk, no'm ji'ma'n tu' tii jax jix dhuñiim na jax ja'k jir joidham, no'm gu' jai' maakam jup kai'chim, mi' pu cham tu' jax ji dhuuji mam pataasa' am. **25** Piam ja'p na jax gu ja'tkam no'm jir maap jum oi'dhagim no'm daim kokda, nam gu' mi' pui' xi kai'chimi gammiji piix ta'tak jimia'. **26** Pu'ñip jum duñia' git gu ja'ook ge'kam jum aa'ndam no' jax dhuukat bhai' ji bhaamu' git ja bui gu biima'n tuutu'm jajo'k, na gu' mi' piix ja'p ji bi'ya' git ba', cham ka niniil'ñdha' am git gu noonbi'ñ, nam gu' ba bhaaku' git buiñor.

27 'Gu' matgam gu ja'ook ge'kam jum aa'ndam cham aa' ji na jaroi' tu' ki'n ja juanda' gu biima'n tuutu'm jajo'k. Na gu' dhi' ja'pni ji buusan na jax maa'n gu maa'nkam jix oogim jix bhangim no' mi' pai' kio, nam biix piix jix iibhi'ñdha' gu ja'tkam nam amuub aaya', sia kum tiix chi iixdham gu biixchuga'n. Dai gu jaroi' no'x maat nax io'm jix oo' na ba' mu jimii xi buuprai bha ja'p xi dhaasai na ba' ba ti iixdha' gu biixchuga'n. Ba' aañ xib pu'ñip ji buusan na jax gui' nax io'm jix oo', na gu' pur cham tu' aañ jiñ bui gu ja'ook ge'kam jum aa'ndam, pu ni ji'x dho moo kur jiñ jupaabkam.

28 'Tu' silhkam ki'n jañ ya' pu jam tiida', biix na ji'k ja'tkam jix bhaai' na jax ja'k duuji uañchudhix ka' gu ja ua'tulhdhara', sia kum giilhim jix buam tu ñiok, dai na biipi'm aa' nam soi'm ilhdha' buiñor guñ Gi'kora'. **29** Gu' ba' gui' nam ji'k jix ki'ii'n gux Dhuudu' kam jix Uañ Ii'mda', dai nam pix am ti'ñchuka' nam gammijim tulhiña', na gu' cham ji'xkat ka oñia' gu ja ua'tulhdhara'.

30 Ba' dhi' na pui' ji' ja titda, na mi' pix ja aagi'ñ na gux Dhuudu' kam jix Uañ Ii'mda' bhaan jup tui'dhi', cham tu' na tu'jajo'k gu ja ge'kam tuk nam jax ai'chuxi'ñ gui' nam sap jix mat ka' gu ñio'ki'ñ gu Dios.

Nam mi' ba aaya' gu Jesuus gu jajaa'nni'ñ gio gu di'ii'n

(Mt. 12:46-50; Lk. 8:19-21)

31 Ba' ja'xpix mi' ba ai mit dho gi ji ba' gu jajaa'nni'ñ gu Jesuus gio gu di'ii'n, mummu ja'p ji guguu mit gama ja'k, na gu' cham bhai' nam jax mia'n aaya', nam gu' giilhim mui' mi jumpax gu ja'tkam biix xikoolh dhîr mi' na pai'p tu'ii'. Ba' mijî xi chu joochxi mit na sap mu jimda'. **32** Ba' pui'p ba titda am gui' nam mi ja'p mia'n daraa biix xikoolh dhîr:

—Mi' sap pai' ba ai mit gum jaaduñ gio gum naan, sap jum gaagim am.

33 Ba'p ja titda gu Jesuus:

—Jax japim ba' ilhdhat pui' kai'ch? Jax dhui nañ aañ cham tu' pui' ilhii'ñ nam dai gui'r jiñ jaaduñ gio guñ ñaan.

34 Ba' pui' xi chi'iiñ nai' xi ja tiigik gui' nam mi ja'p daraa biix xikoolh dhîr, jup ja titda:

—Na gu' aapi'm jai' dhit na pim ya' daraa, pui'p bar jiñ jaaduñ japid. ³⁵ Na gu' gu jaroi' no' mi' pui' ba jimchu' na jaxjix aa' gu Dios, dhi' bar jiñ jaduuñ ka' gio nar jiñ ñaan ka'.

4

Gu Jesuus na bhaanji ua'rgidhai tu a'ga' gu tiriik giigi'ñdham

(Mt. 13:1-9; Lk. 8:4-8)

¹ Ba' mikkat ji'kchi журни'ñ ki'n gio bhai'p ji chu ja a'gi gu Jesuus gu ja'tkam, mummu ፩፩ ju'ñdharan na pai' gę' suu'n gu suudai' na Galilea bhaan bipio' gu dibiir. Ba' gook alh mi' ka jumpax am nat jax bhai' ji chu a'ga, gu' ji na gu' cham ji'x miikim giilhim mui' mi' mam jumaap jamit. Pui' bhai' ma tis kanuub ta'm, na gu' mi ja'p amuub yup se' suudai' jugi'ñ. Bhai' ba' ji dhaakat bha tu ja a'gi'ñ gu mui' ja'tkam nam mi'p tu'ii' diirap. ² Bixchu' bhaan ji chu ua'rgidhat na ya' dhi oi'ñga'n jix chu jai'ch nam sap ba'x maatit kaaya'. Ba' maa'n ja'pni moo mui' ji kii nat mui' ji chu a'ga:

³ —Ea na pim moo biix jam jur kii'n xiñ kaaya' nañ jax jam tiida'. Maa'n nim maa'n gu maa'n kam xi chu moikdak mummu pai'p ka jii, ji'kchi moo xi jur na mi' piix katka' gu moikda'n. Gu' ji na gu' mi ja'p tum oipoda', jotmoda' piix am boi ba kaat mi moika'n tir. ⁴ Ba' gatuuk nat mui' ji chu gii' gu tiriik, maa'n na mit jax jugio gu u'ji' nam mi ja'p nini' gui' nat mi' suulh na pai' piix am boi ba kaat, na gu' maaxik piix dharaat, na gu' bax chu kabaak. ⁵ Ba' jai' ja'p ja'k ai' cha'm yup suulh ip na pai'x komaalhim jir dibiir. Dhi dho

gi gu' tii jotmoda' bubua ji, nat gu' daaman jum yaas. ⁶ Gu' ji na gu' maa'n nat jax miil'ñ gu tanoolh nat bhaan mi' ji chotnorimi, nat gu' cham tuukab takta, dai nat ba gaa pix. ⁷ Ba' jai' nat ja'p ja'k yup suulh na pai'x joi'ñdha' na tuutka' gu tu'x bii u'uux jix jo'ii', ba' pui' tii bhai'p ji bubua. Gu' ji na gu' jotmoda' bhai'p ji i'pu gu u'uux jix jo'ii', maa'n nat jax bhai'bich, jix u'uam mi' pup tuut gu tiriik, pu cham tu' ka bhaai!. ⁸ Ba' gu jai' nat ja'p iam yup suulh na pai'x kii' gu dibiir, dhi' dho gi gu' joidham jix bhai'm duu ji, alh ja'p sa'sbar jum kaip. Ji'ma'n moom kaip maa'n oo'm daman mambhiix, jai' baik oo'm, jai' jix chamaam oo'm, mi' pix pui'.

⁹ Ba' mi' dhir na pui' ji' xi chu ja a'gidhimik, yup ja titda ip gio:

—Mi' pim pui' ba Jimia' ji'k na pim jix maatit jiñ kęę.

Gu Jesuus na ba ja aagi'ñdha' gui' nam kaichu' na jax jir jum duukam gu tiriik nat tu guii' gu maa'nkam (Mt. 13:10-17; Lk. 8:9-10)

¹⁰ Ba' ja'xpix na mit pai' ba jii gu mui' ja'tkam gui' na mi' tu ja a'gidhimik gu Jesuus, ba tikka'n am gu mambhiix daman gook gu noonbi'ñ gio gu jai' gui' nam pui'p kaichu' na sap ja aagi'ñdha' na tu' aagit yup kai'ch gu tu' tiriik giigi'ñdham. ¹¹ Ba'p ja titda gu Jesuus:

—Matgam aapi'm saalh ka maachim ji na jax ja'k jix bhaai' na jam a'm ti nii'ñdha' gu Dios, na pim gu' bañ kaichu'. Gu' ba' gui' nam ji'k cham jiñ kaim nañ bhaankam tu a'ga guñ Gi'kora', pu'ñi pix ja'k jañ tu ja a'gi'ñdha' bixchu' bhaan ji chu

ua'rgidhat ya' kam dhi oi'ñga'n. **12** Na ba' sia kum tiiñ ñii'ñ nañ jax tu buada', pu cham maatit ji ñii'ñdha' am, piam no'm tiiñ kęę nañ jax tu ja a'gil'ñdha', pu cham maatit jiñ kęęka' am. Ja'pni dhuuji ba' matgilhia' nam pu cham aa' nam mi' pui'jimia' na jax jix aa' gu Dios, ba' dai nam pi\x am ti'ñchuka' na ja tulhiiñchuda' gu ja ua'tulhdhara'.

*Nax bhai' ba tu aaga' gu Jesuus na jax kai'ñkam
jup jum kai'ch gu tiriik giigi'ñdham*

(Mt. 13:18-23; Lk. 8:11-15)

13 Mi' dhir ba'p ja tīt̄da ip gio:

—¿Cham aa pim maatit jiñ kęę? ¿Jax japim ba' du-
iji jix maatit jup kaaya' gu jai' nañ pai' dhuuk giop
tu ja a'gidha' gu ja'tkam bhaan ji chu ua'rgidhai gu
tu' ya' kam dhi oi'ñga'n? **14** Ja'pniñ dho kai'ñkam
jup kai'ch: Gu jaroi' na tu ja a'gidha' gu ñio'ki'ñ
gu Dios gu ja'tkam, ja'p ji buusnia' na jax no't ba
tu giil' gu tiriik. **15** Ba' ji'ma'n no' mit cham biix ja
jujur ki'n kai sia kum ji'x tii kapup xi chi'ñchutgit
palhiip, na pai' dhuuk mi' øøji gu ja'ook maakam xi
jurtuda', mi' pu cham tu' kap jum buixi'ñdha'. Dhi
ja'p ji buusnia' na jax gu tiriik gui' nat boi cha'm
suulh. **16** Gu' ba' gui' nam jotmoda' ti jiñ'ñdha' jix
bhai'm ilhdhai, dhi' ja'p ji buusnia' na jax gui'
nat mi' suulh na pai'x komaalhim jir dibiir nar ai'
cha'm nat tii jotmoda'bubua, dai nat cham tuukab
takta. **17** Ba' maa'n nam jax gio mummu pui'p
suulhgia' no' tu' ba ja duiñchu', nam gu' palhiip
pix niirda', na gu' mi' pix tu ja mamai'chikda'
no'm baabui' moo tu' silhkam ti jiigi'ñ buiñor guñ
Gi'kora'. **18** Gio gu jai' gui' nam pui' tii joidham
jup kaaya', dhi' ja'p ji buusnia' na jax gui' nat mi'

suulh na pai'x joi'ñdha' na tuutka' gu tu'x bii u'ux jix jo'ii'. ¹⁹ Na gu' no' miit tii ba ti jii'ñ, bhai' ji ja tukgidha' gu tu' na ya' dhi oi'ñga'n jix chu jai'ch. Tu' nam pix bax joi'ñdha' nam bia'ka' jix dha'ram namkim, piام ku tu' nam pix jax bax dhuñiik ka' na tu' cham jum aagidha', nam jax dhui pix mi' bhaan jim iatat cham mi' pui' ka tui'ñgida' na jax jix aa' guñ Gi'kora'. Ba' cham tu' pui' ka' kia', na gu' nai' pix ji jugiidha' gux Uañ Li'mda!. ²⁰ Ba' gui' nam biix ja jujur ki'n ti jii'ñdha', mi' pui' ba jimia' am na jax ja'k jix aa' guñ Gi'kora', cham ji'xkat ja'k ka suulhgia' am, nam gu' gammiji buiñor bax biiñak ka'. Dhi' ja'p ji buusnia' na gui' nat mi' suulh na pai' joidham jix kii' gu dibiir, nat jum kaip maa'n oo'm daman mambhiix, gio jai' ja'p na jax gui' nat baik oo'm jum kaip, piام ja'p na jax gui' nat jix chamaam oo'm jum kaip.

*Gu Jesuus na ba tu a'ga' bhaan ji ua'rgidhai
maa'n gu kañdhiir miimdam*

(Lk. 8:16-18)

²¹ Ja'pni ba' moop ja titda:

—¿Jaroo pim niñ nat xi miichdhak gu kañdhiir mijí ja'p pai' xi kii tu' ki'n xi chaa'bidhak no'x chukgam? ¿Piam aa na cham? Jax dhui na gu' cham tu maax ka' no' mijí pai' taa'bidhix, dai no' te'kob kii'k tu' ka'm na ba'x bhai'x chu maax ka'. ²² Ba' xib pu'ñi pix ilhii'ñ am gu mui' ja'tkam, nam gu' cham maatit jiñ køø nañ jax kai'ñkam yup ja titda. Ja'p jum aa' am nañ iam pix jix ixchuixim tu a'ga, gu' tii cham ji. Ku ba' gu' kam aaya' ji nam pai' dhuuk biix ka machia' na jax jir jum duukam.

23 Mi' pim pui' ba jimia' ji'k na pim jix maatit jiñ keøe.

24 Ba' mi' dhîr nat pui' ji' xi chi'iiik, jup ja titda ip gio:

—Jix bhai' pim moo xim ga'ngada' na pim jax ja'k duuji jix maatit kaaya' no'ñ pu'ñi pai' tu a'ga ja'p na xib. Na gu' no' pim moo soi'm ilhdhat jix maachik, diilh pix bhai' ji machia' pim, na gu' xi jam joi'mdai ba jam mattuda' gu Dios na jax jir jum duukam ka'. **25** Gu' ba' gui' nam ji'k cham soi'm ilhii'ñdha', no'm cham maachik, mi' pix ganai' jix ooda' am, panaas kum ja'p jix xijaim ilhii'ñdha', nam gu' cham biiñak ka' buiñor guñ Gi'kora'.

Na cham mat ka' gu isdam na jax ja'k bhai' ji g'i'lhia' gu tu' ixchuk

26 Ja'pni ba' moop ja titda mi' na pai' tu ja a'gidhimik gu Jesuus gu ja'tkam:

—Iam pix pui' ji buusan na pai' dhuuk ja a'm ba ti nii'ñdha' gu Dios gui' nam ji'k buiñor bax biiñak ka', ja'pni na jax gu jaroi' no't ba ti ii gu ixchukga'n, no' mi' pai' bia'kat. **27** Na mi' pix xi isai, mi' dhîr dai na ka nii'rda' ji'k tanoohl, diilh bha bubuakia', tukaa'ñ cha'm piام tataab, pai' na pix dhuuk cham daaxix kam. Mi' pix ba tuutka' na pai' dhuuk ba tigia' gu isdam, pu cham mat ka' na jax ja'k bhai' jim duñia' na jax kia'pix bhai' ji bubuakia', piام na jax bua't gi'lhidha'. **28** Na gu' mi' no't ba bubua dibiir ta'm dir, mi' dhîr dai na bhai' ji sa'sarka' gu jaaga'n, gio na ba muraa'nta', gio na ba kaicha', suuduya' bhai' na ji'x jir muraa'nga'n ka'. **29** Ba'

na pai' bax kabaak ka', dai na jiikai xi kaipgai ba'
ulhñ'a'.

*Gu Jesuus na ba tu a'ga' bhaan ji ua'rgidhai gui'
na mostaasa jam tïti'*

(Mt. 13:31-32; Lk. 13:18-19)

30 Ba' mi' dhîr gio mui'p ji chu ja a'gi gu Jesuus
gu ja'tkam, jup ja tïtda:

—¿Tu'ñ git bhaan ji ua'rgidhai jam aa'ñdha' na
jax ja'k duuji ja a'm ti nii'ñdha' gu Dios gui' nam
buiñor bax biiñak ka'? **31** Ja'pni dho ji buusan na
jax gu mostaasa kai nar iłhi'ch alh, pu ni jax chu'm
kaichuk kur ja'xbui'. **32** Ku ba' gu' no' ñich mi ja'p
xi ii, giilhim gę'p jum duña' ji na pai' dhuuk bhai' ji
buusnia', jix io'm tę'kob tu jimmı, cham jax chu'm
ja'xbui' tu jimmı gu jai' na pui'p jir jum isdam.
Joidham xi boorak jup jum bua, gu u'ji' ja ko'raar
nam bha tu kakos ka'.

*Gu Jesuus na bixchu' bhaan ji chu ua'rgidhimik
tu ja a'gidhimik gu ja'tkam*

(Mt. 13:34-35)

33 Ja'pni ja'k ba' tu ja a'gidhimik gu Jesuus gu
mui' ja'tkam bixchu' bhaan ji chu ua'rgidhimik
na ya' dhi oi'ñga'n jix chu jai'ch. Nam pai' cham
ka kaim nat ba' cham ka tu a'ga. **34** Pu cham
maa'nnim tu ja a'gi nat cham tu' bhaan ji chu
ua'rgidhak, gu' ja'pji pu biix nat ji'x juugit tu a'ga
na bixchu' bhaan ji chu ua'rgidhimik. Ku ba' gu'x
bhai' ja aagi'ñ ji dai gui' nam ji'k kaichu' na jax jir
jum duukam.

*Gu Jesuus na ba ñiokdha' gu jibiih gio gu suudai'
(Mt. 8:23-27; Lk. 8:22-25)*

35 Ba' moo jano' jurnik nat pai' ba ji dhidiimpu,
jup ja titda gu Jesuus gu noonbi'ñ:

—Maik gor jach Jimia' bhammi baasi'n dir ja'k dhi ge' suudai'.

36 Ba' gamai' ji jii mit biix suudai' dhaam pu
gui' gu kanuub ta'm na bhai' dhir bhaan daakat
bha tu ja a'gidhimik gu Jesuus, dai na mit jax xi
ja tabuimgidhak gu mui' ja'tkam. Ba' gatuuk dir
mui'p ji jii mit gu jai' gui' nam pui'p kaichu' pui'
kaknub ta'm ip. **37** Ba' na mit namm'i ba ji bhii
irban, giilhim jix io'm bhai' ji jib, gio nat bhai' ji
gu'nguki gu suudai', pix bhai' jim tu'aim kanuub
ta'm. **38** Ba' gu Jesuus mi' dhir ja'p kuu' dir gu
kanuub kooxchu' jim mo'xdhat. Ba' ma ñiñiich
jamit gu noonbi'ñ, **jup titda am:**

—Aapi'ñ jaduuñ, jbi ñiñia! ¡Tii' na jax jum bua gu
suudai'! ¿Cha'ch ba' ya' bhai'ku'?

39 Ba' gu Jesuus bamgik ba ñiok gu jibiilh, **jup titda:**

—¡Cha'p bha ja'k buam jum buada'!

Gio ba' gu suudai' **jup titda ip:**

—¡Cha'p joiñat suu'nka'!

Ba' jotmoda' nai' ampiix ji chu juu, pu cham pai'
ka jibiiir. **40** Ba' mi' dhir **jup ja titda gu noonbi'ñ:**

—¿Jax ku pim ba' ja'p xi' pik **jup jix chotdon?**
¿Moo chakui biix jam jujur ki'n jix biiñak japim aa
aañ jiñ bui?

41 Ba' mi' pui' pup tui'dhi' am, ja'x moo xi mikkim
pa', na gu' cham bhai' nam jax ti'ya'. Dai nam **jup**
kai'chim jix dhu'npi'ñ ki'n:

—Ja'p moor ge'kam ji bak jia dhich jaduuñ na
ba' gam jibiilh gio suudai' jix jiig'iñ!

5

*Gu Jesuus na mai' ja jootsa' mui' gu cham kikii'
i'ii'mda' bhai' dhir bhaan maa'n gu maa'nkam
(Mt. 8:28-34; Lk. 8:26-39)*

¹ Ba' bhammi dir ba ai mit na pai' giop bar ju'ñdharan, Gadaara ti tiigim. ² Ba' nat jax mui' ji chim gu Jesuus bhai' dhir kanuub ta'm, ba tii na mu ja'p ba jim maa'n gu maa'nkam na cham kii' tu ii'mda', ampix jix ñaanbi' ka'. Mu dir ja'k jim nam pai'm yassap gu koi'ñga'n, ³ na gu' pui' ti ilhii'ñdha' nar kia'mi'ñ pai' no'm jum yassap gu koi'ñga'n. Pu cham bhaai'n ka' ip moo nam jax dhui buuplhia' sia tu' baiñum tirbiñ ki'n, na gu' giilhim jix oo' ka'. ⁴ Pai'ji tii ma buuplhia' am baiñum tirbiñ ki'n sia tootnaran, gu' ji na gu' maa'n na jax i'kida', ba' pui' cham ka juanda' am. ⁵ Ba' nabap tanoolh gio nabap tukaa' mummu ja'p oirit jiiñakda' u'xchir gio nam pai' jax jum yassap gu koi'ñga'n, gio na diih jum ko'ktolhdhidha' joodai ki'n. ⁶ Ba' nat ba tii na mu ja'p oiri gu Jesuus, jotmoda' mu miraak mi' o'lhia'n ki'n ji kikbu biipi' dir, ⁷ jup titda ge'ki'n:

—Jax japich bhai' bañ dhoodam Jesuus nap jir Mara'a'n gu Dios gux io'm Gø'kam? Cha'p tu' ki'n jiñ juanda'. Ka tuñ uañi'ñka' ap gu xib.

⁸ Gu' nax choo'nnit na ba' pui' kai'ch, nat gu' maa'nnim pu ba ñiok gu Jesuus, jup titda:

—Mu buusaiñ cham kii' ii'mda' bhai' dhir bhaan dhiñ jaduuñ.

⁹ Ba' ba tikka'n gu Jesuus gux ñaanbigim, jup titda:

—Jax jap tii'?

—Lejion jañ dho tii' —jup kai'ch gux ñaanbigim—, nach gu'r mui' gu cham kikii' i'ii'mda'.

¹⁰ Ba' soi'm duuk gio bhai'p ji ñio mit gu cham kikii' i'ii'mda' bhai' dhîr bhaan gux ñaanbigim nam jup kai'ch na sap chakui mu ja'k ja jootosda' mu pai' nam giilhim jum tulhiiña'. ¹¹ Ba' ampik mia'n oipot jup ka tu kob am mui' gu tatooxkoh bha ja'p juurap oidha' ta'm. ¹² Ba'p titda am gu cham kikii' i'ii'mda' gu Jesuus:

—Bhammini gu'ñi tatooxkoh bhaan jap ka xich jootsa' nach ja a'm ka xi baapkigu'.

¹³ Ba' siamri pui' ma ja tii'n gu Jesuus nax bhaai' nam bhammi ja'k ka xi baapkigu'. Ba' gu cham kikii' i'ii'mda' jotmoda' bubuakik bhai' dhîr bhaan gu maa'nkam bhammi ja'k pu baapkim jamit. Ba' bhai' dhîr ji boop jamit gu tatooxkoh na mit jax bha baap ja a'm, bha ja'p bhii mit gu biix a'nsap, boopok mijimmi pu baap jamit na pai' ge' suu'nka' gu suudai', mi' mit pu koi dappaam bhai'kuk. Gook mambhiix jix cha'tmam oo'm kat am gu tatooxkoh.

¹⁴ Ba' gui' nam ka ja bipia'dat gu tatooxkoh, totdonik pu jiboi'ññor jamit na mit ja aa'ñdham gu ja'tkam gu mummu ge' kiicham oi'ñkam, gio gui' nam mu ja'p oi'dha' ji'dilh mi'mik. Ba' bhai' ma jii mit ip na mit bha ti tiigim no' baabui' moor silhkam na jax tum kai'ch. ¹⁵ Ba' na mit mi' ba ai na pai'p tu'ii' gu Jesuus, mi' pix ji chii mit nax kii' juraa'n bia'kam mi ja'p daa gui' nam mui' bhaan kap tui'ñgit gu cham kikii' i'ii'mda', bam ti'ii'ñ, na gu' gammiji jix dhaapkat mu ja'p ka oirida'. Ba' giilhim bhai' ji chooto'n jamit. ¹⁶ Ba' gu jai' gui'

nam ji'k nii'ñ nat jax ja'k dua'ñ gu maa'nkam gui' na kax ñaanbi' kat, gio na mit jax dhuuk koi gu mui' gu tatooxkolh, mi' dhir yup ba ja aagi'ñdha' am gui' nam ji'k kia'pix mi' aajidha'. ¹⁷ Mi' dhir ba' biix na ji'k ja'tkam nam mi'p tu'ii' soi'm duuk yup titda am gu Jesuus na ba Jimia' mi' dhir.

¹⁸ Ba' nat jax bha tis kanuub ta'm ba jii ip. Ba' tiix oidhamit gui' nat dua'ñ na kax ñaanbi' kat, ¹⁹ gu' ji na gu' cham aa' gu Jesuus, dai nat yup xi chiidak:

—Ja'p ji nap ba Jimia'ñ jaduuñ jum ki'aam ja bui gum jaaduñ. Ja aagi'ñdha' ap nat maadit jix joi'midak jum tiigik jum dua'ñ gui' na bhaankam ya oiri gu Dios.

²⁰ Ba' ma jii ip gu maa'nkam nat tu aagam nat jax dhuuk dua'ñ gu Jesuus, mu ja'p ji bhií mui' kap na Dekaapolis bhaan bipio'. Ba' biix nat ji'k kap ai, mi' pui' pup tui'ka' am na ba ja aagi'ñdha'.

Gu Jairo na ba umuagi'ñdha' gu Jesuus na dua'ñdhara' gu maraa'n

(Mt. 9:18-26; Lk. 8:40-56)

²¹ Ba' nat gio bhammi dir yup ba tis gu Jesuus baasi'n dir ja'k mi' na pai' gø' suu'nka' gu suudai', giilhim mui' mi' mam jumaap jamit ip gio gu ja'tkam, ba' mi' pup oiri ju'ñdharan. ²² Ba' mi' ba ai maa'n gu maa'nkam Jairo tiigim gui' na mi'r gø'kam ka' maa'n kap nam pai' tu daanda' gu Israel kam ja'tkam. Ba' mi' o'lhia'n ki'n ji kikbu biipi' dir gu Jesuus, ²³ ba'p titda soi'm ilhdhat:

—Aañ ja'p tii kai'chit jiñ jaduuñ nap iam mu Jimia' git jiñ ki'aam nap dua'ñdhara' guñ maraax, umri moo ba muukim. Aañ jix maat na dai no' pich xi dhaa, pu dodhia'.

24 Ba' gu Jesuus cham jax ji chi'hiik mui'p ma oi.

Gu ubii na pu dodhia' na bhai' pix xi dhagia' gu jannulhi'ñ gu Jesuus

Ba' mui' ja'tkam pix chu'p tui'dhi' am, pix am kiki'spaim am. **25** Ba' maa'n mui'p jimchu' gu ubii na mambhiix daman gook oidha' bax ka'ook. Nat pai' dhuuk ai gu masaa'n, pui' ja'k pu bii, cham ka duduarda', gammiji pix ba mirda' gu i'ra'n. **26** Mui' ko'kdai' mamtim tii ba ja umua', pui' na jax ba tu'ii'. Biix tii ba tu ga'ra gu tu' na bia'kat na tiix dhuadhim ka', gu' ji na gu' jix io'm bhai' ji bhibhiida'. **27** Gu' ji na gu' pui' ba te këe gu ubii na tu dudua'ndhim gu Jesuus, ba' xi' mui' xi jimchu' mijji ja'tkam tir na mia'n jix bhiim na pai' jax jimchu'. Ba' mia'n bhiik bhai' xi dhaa gu jannulhi'ñ, **28** na gu' pui' pix kai'ñkam ba' xi' mui' xi jii nap jum aa': "Dai pix no' ñich ba daa gu jannulhi'ñ gu Jesuus, pu dodhia' ifñ." **29** Ba' jotmoda' pu kikbu gu i'ra'n, gio nat jix bhai' bhai' ji chu tatdat na kax chu ko'k kat. **30** Gu' ji na gu'x bhai'x maat gu Jesuus nat maadit ba dua'ñ gu jaroi' nat jax bha dhaa jannulhiran, na gu'x io'm jir ge'kam. Ba' ja'k giisik jup ja titda gu ja'tkam:

—¿Jaroo bhañ dhaa jiñ jannulh am?

31 Ba'p titda am gu noonbi'ñ:

—¿Jaroo bhañ dhaa jiñ jannulh am sap! ¿Jax jap gi dhuip machia'? Na gu' mui' ja'tkam ya tum jiimchu', pix am jum kiki'spaim am.

32 Gu' ji na gu' gu Jesuus jix bhai' gan xi ja nii'ñ, panaas ku cham xi maat nat jaroi' bha dhaa. **33** Ba' gu ubii jix choo'nnit gi'bukidhat mi' o'lhia'n ki'n ji kikbu biipi' dir gu Jesuus, na gu'x maat na dhi'

aagit jup kai'ch. Ba' biiix ba aagi'ñ nat jax kai'ñkam bha dhaa jannulhiran. ³⁴ Ba'p titda gu Jesuus:

—Pu ba dua pich ji matgam jiñ jaduuñ, nap gu' aañ jiñ bui bax biiñak. Ba jimia' ap, cha'p jax kam aa'nda'. Cham tu' ja'k ka gixia' gu ko'kdai' nam ñékat.

Gu Jesuus na ba dua'ñha' gu maraa'n gu Jairo

³⁵ Ba' na mi' ka tu a'gichu' gu Jesuus, mi' ba ji bubua mit ji'kchi gu ja'tkam mummu kam nar pai' kam gu Jairo, ba'p titda am:

—Ba muu ji matgam gum mar. ¿Jax gip kax bhaai' sia kup mui' tii ba bai'ñchu' dhi gø'kam?

³⁶ Gu' ji na gu' gu Jesuus ja køé nam pui' ji' titda gu Jairo, ba'p titda:

—Aap moo cham jax jum aa'nda'. Diilh jup kai'ch am ji matgam. Aañ jiñ bui pix jax jix biiñak ka'.

³⁷ Ba' mi' cham ka aa' gu Jesuus na ja bii'm ka jimda' gu mui' ja'tkam. Dai gu Peegro, gio gu Jakoobo, gio ba' gu Juan sìpdhi'ñ gu Jakoobo, xi ja baidhak mu ja'k ji dhuu na pai' kio gu Jairo. ³⁸ Ba' na mit mummu ba ai, giilhim tum kai'ch, gø' ki'n tum suan, gio nam giilhim jix buam jum aa' nat ba muu gu tiyyax. ³⁹ Ba' gu Jesuus mu baakik ba'k chir jup ja titda:

—¿Tu' ma jam duu jiñ jaaduñ na pim ba' moo ja'p giilhim kai'ch? Gø'gér suan japim. Jax dhui na cham tu' muukix gu tiyyax, matgam mi' pix ji na koos.

⁴⁰ Ba' dai na mit xi a'sik nat pui' ji' xi ja tii'n, nam gu' cham jiigigi'ñ, ja'p jum aa' am na pix ja'p kai'ch. Ba'p ja titda nam sap ka xi bubuakia' mi' dhir ba'k chir. Ba' gui' pix jup ji bubua mit, dai ba'

gu taata'n gio gu di'ii'n gu tiiyax mi' ji bii mit, gio ba' gu noonbi'ñ gui' na pu ja biim jimchu'. Ba' mui' ji ai mit mi' na pai' kaat gu mukdha!. [41](#) Ba' gu Jesuus nobi'ran xi dhaagik yup titda:

—Talita kumi —na ja'p kai'ñkam yup cum kai'ch:
Xi bamii' tiiyax.

[42](#) Ba' nat jax pu tii'n, bhai' ji bam gu tiiyax, mi ja'p piix gan ba oiri na gu' bar ge', mambhiix daman gook oidha' bia'kam. Ba' mi' pui' pup tum tu'ii' na mit pui' ti tii, am cham bhaai' nam jax cum duñia', nam gu'x io'm jix bhai'm taat. [43](#) Ba' xi ja soo'mchulhdhak gu Jesuus nam sap cham jaroi' aagi'ñdha' nat jax dhuuk dua'ñ gu tiiyax, dai nat xi chianik gu diidi'n na ba tu makia'.

6

Gu Jesuus nam cham kiigalhdha' mummu Nasareet

(Mt. 13:53-58; Lk. 4:16-30)

[1](#) Ba' giop ba jii gu Jesuus ja biim gu noonbi'ñ mummu ja'k Nasareet nar pai' kam. [2](#) Ba' nat bam ai na pai' dhuuk cham tum juanda', mui' ma jii maa'n kap mu nam pai' tu daanda' gu Israel kam ja'tkam. Ba' mi' eek bhai' ji chu ja a'gi gui' nam ji'k mi'p tu'ii'. Biix mi' pui' pup tu'ii' am na mit kai, na gu' giilhim jix bhai' xi bua na xi chu a'ga. Ba'p kai'ch am diihl:

—¿Paa ba' ji chum mamtuxdhak pui' pik joidham jix bhai' xi bua? ¿Jax moo duukat jix aix na jax ti'ya'? Tii' na gu' bixchu' piix nar jix bhai'm duukam yup tu buim. [3](#) ¿Cham aar di' gui' na u'uux ka tu jibda' na bixchu' kap tu buada', na Mariiya jir di'ii'n, nam jir cum sispidhim gu Jakoobo gio

gu Josee gio gu Juudas gio ba' gu Simumon? Gio gu u'uub sispidhi'ñ, ¿cham aa piñ ya' tu bipna' am?

Mi' pui' xi kai'chimik gan ji ii mit, nam gu' ja'ppix maa'nkam ilhii'ñ. ⁴ Gu' ji na gu'p ja titda gu Jesuus:

—Cham dho jiiigi'ñdha' am gu mia'n jum oi'dhagim gu jaroi' no' tii xi chu ja a'gi'ñ bhaankam gu ñio'ki'ñ gu Dios, gu' chi ba' pik no'm jir jum jaja'nnim. Dai no'm jir mik kam nam ba' siamri jiiigil'ñdha'.

⁵ Ba' mi' xi ja dudua'ñdhak ji'kchi gux kako'kkam, dai na bhai' pix xi ja da'ngi, pu duduuar am. Cham pai' moo maa'n jup duu gu tu' nax io'm jix bhai'r jum duukam, na gu' ampix jix chum bhaak. ⁶ Gampai' ji dhuu gu Jesuus, na gu' ni ji'x kum buiñor jix biiñak gu mi' oi'ñkam. Pui' ma jii mi' dhir mummu ja'p jai' kap, na ji'x jir mia'n pa', na pai' jax jir kikcham, na tu ja a'gidhim gu ja'tkam.

Gu Jesuus na nai' ba ja jootsa' gu noonbi'ñ nam tu ja a'gi'ñpu' gu ja'tkam

(Mt. 10:5-15; Lk. 9:1-6)

⁷ Ba' maa'nnim maa'n kap maap ja jumpadak gu mambhiix daman gook gu noonbi'ñ gu Jesuus, nai' ja joot go'gok nam jai' nai'p xi chu ja a'gi'ñpu' gu ja'tkam. Jup ja titda na sap ja palhbuidha' guch Gi'kora', na ba'x bhaai'n ka' nam bhaankamu'n mai' ja jootsaidha' gu cham kiki' i'ii'mda' ja a'm dir gu ja'tkam gui' nam ji'k jix ñanaanbi' ka'. ⁸ Gio ba' nap ja titda na cham bhaai' nam kusbioda' tu' asaak, nich chu'koi' kum ua'da', nich chu'tuumiñ, dai ux tapoorak nam ki'n oxiakkidha'. ⁹ Gio gu ja sussak daipu' nam jax aa'ntu'nda', gio gu ja

jajannulh pu daipu' nam jax ti tiichgida', cham bhaai' sap nam jai'p tu ua'da'. ¹⁰ Ja'pni ba' moop ja titda:

—Pai' kikcham na pim aaya', no' ampik maadit jam tibiappu'tu'n gu jaroi', mi' pim xi juruuñdhai, na pim pai' tiimu' tu ja a'gidhimii gu mi' oi'fikam na pim ba' giop ba jimia'. ¹¹ Piam ku pimit gu' mi' pik ai nam pai' cham jam kiigalhi'ñdha', nam cham ji'x jam kaim ka', pu jimia' pim maakam ja'k, dai na pim xi xiixkai gu dibiir mi jam tooton am na pim jax gamai' ji jimia', na ba' bhaan jix maati' ka' na mit cham jam kiigalh. Tu' silhkam ki'n jañ ya' jam aagi'ñdha', cha'pim jax jum aa'nda' sia kum jai' cham jam kaim. Na gu'jano' na pai' dhuuk jum aaya' na tum kuugalhdha' ya' dhi oi'ñga'n nam ba' pui' tii bam aa'nda', nam gu' giilhim jum tulhiiña' jix io'm, cham tu' pui' na gu Sodooma kam gio gu Gomorra kam.

¹² Ba' gui' ma jii mit ip nai' ja'p na jax jir kikcham na mit tu ja a'gidham gu ja'tkam, jup ja titdaim am nam sap mi' pui' ba jimia' na jax jix aa' guch Gi'kora'. ¹³ Gio ba' na mit mui' mai' ja joot gu cham kikii' i'ii'mda' ja a'm dir gux ñanaanbigim, gam na mit mui' ja dudua'ñ gux kako'kkam, dai nam bhai' pix xi ja julhii'ñdham gu tu' joidham jix xuu'ngi'.

Na mit jax dhuuk mua gu Juan ja'tkam bopkondam

(Mt. 14:1-12; Lk. 9:7-9)

¹⁴ Ba' gu Eroodis gui' nar gø'kam ka' pui' ba ti kai na mu pai' oirit jix bhai' tu bua gu Jesuus, nam gu' pix ja'x pui' tu a'ga gu ja'tkam. Ba'p kai'chdha':

—Dhi' bak gu Juan ja'tkam bopkondam gio duadik jup ba buus mu dir koi'ñga'n tir, pui' ku

ba'x io'm jix bhai' ba tu buim gu tu' nax bhai'r jum duukam.

15 Jai'p kai'chdha' am:

—Ja'pji Eliiyas ji chi, gui' nat saak maaxik tis jix dhaam ja'k.

Jai' maakam jup kai'chdha' am:

—Ja'pji chi maadit pix jir di' gui' nam bijik ya ja'p bhaankam tu a'gimik gu Dios.

16 Ba'p kai'ch gu Eroodis na pui' ba tø køø nam pui' ji' kai'chdha':

—Ja'pji Juan ji nat gio duadik jup ba buus mu dir koi'ñga'n tir, gui' na ñich tu chia na mit ii gu ma'oo'n.

17 Ba' giilhim bax choodon pui' xi kai'chit, nat gu' dhi' tu'm da'p duu na mit pai' dhuuk daa gu Juan janø' nat baiñum tirbiñ ki'n buuprak tu chia nam mu kuuppu' nam pai'm kukpa gu ja'tkam, na mit gook dit maap jim daagik gu binga'n Eroodiiyas tiigim, gui' na biipi' dir kar binga'n kat gu Piliip nam jir jum sispidhim gu Eroodis, gu' ji nat gu' bhai' ji iiix, sia kum tir jum sispidhim. **18** Ba'p titdada' gu Juan:

—Cham jir am nap bii'ma'n tu kioka' dhi ubii jiñ jaduuñ, na gu' moo mia'n jir jum jaduuñ ga'n.

19 Ba' giilhim bhai' ji bhaam gu Herodiiyas buiñor gu Juan nat pui' ti kai na sap pui' ji' kai'chdha', tiix chu chiañim ka' nam mu'aa'. **20** Gu' ji na gu' soo'mcholhi'ñka' gu Eroodis, na gu'x iibhi'ñdha', na gu'x mat ka' na bhaan ti nii'ñdha' guch Gi'kora' gu Juan, na gu' gammiji tu' ka'm ti nii'ñdha', gio na gu'x io'm jix bhai' xi buada' na xi chu a'gi'ñdha'. Ba' joidham køøkø' gu Eroodis, sia ku tii cham pik maatit køøka' na jax kai'ñkam jup

titdada', pui' ku ba' cham aa' nam mu'aa', pui' pix tii ka xi kuu. **21** Gu' ji na gu' moo jano' pik bhai'p jir koi'cham kat nat bhai' tu chia gu Eroodis nat tum bhai'ñ gu koi' nat sap jum ai gu oidharga'n. Ba' ma tu juu ja biim gu o'rosiiris tugi'ñ, gio gu sandaarui'x chugi'ñ, gio jai' gu Galilea kam gui' nam pui'p jir ḡe'ḡerkam jum aa'ndam ka'. Ba'x bhai' pix jum ilh gu Herodiiyas, na gu' bax maat nat noonbiran ba gii gu ki'darga'n. Ba' dai na mit xi chu a'gak gook dit gu tiyaa maraa'n nam jax ja'k duuji jix bhai' bhiiya' gu Eroodis na ba' mi' bhaan jim tukgidhai aaga' na tu chiñia' nam boi bhiihdha' gu Juan. **22** Ba' mi' dhir ja'xpix nam mi' ka tu kua', mi' ba baa gu tiyaa, ba' mi ja'p ma chi nii ja nii'ñichudat gu ja'tkam. Alh iam ko'raaru gu Eroodis pui' nat jax ja'k ti nii, gio gui' nam mi'p tu'ii' biima'n ba pui' ip. Ba'p titda gu Eroodis:

—¿Tu'm a'm jum aa'? Ya'ñ dhop tu'ii' no'p tu'x aa' nañ jum makia'.

23 Jix bhai' moo xi chitda na ba' jiigi'ñdha', jup titda:

—Ja'p ji moox gi'm jañ ya' pum titda. Jum makia' iñ dho nap tu' ilhii'ñdha', sia dibiir jañ dhom makia' irban juugit gui' na ji'x bhaan bipio' ya' nach pai'p tu'ii'. Cham jax bua, nañ gu' biix ja daa' gu ja'tkam.

24 Ba' xi mii gu tiyaa nat tikkam gu di'ii'n, jup titda mu øek:

—Jup jiñ chitda gu ya' kiokam na sap jiñ makia' nañ tu'x aa'nda'. ¿Tu'ñ bha tañia'?

Ba'p titda gu di'ii'n:

—Ja'p jap tiida' na iikii bham makia' gu ma'oo'n gu Juan ja'tkam bopkondam.

25 Ba' jotmoda' gio mijip xi mii gu tiyaa mu na
pai' daa gu Eroodis, ba' mu eek jup titda:

—Aañ jix aa' nap jiñ makia' jooxia' ta'm gu
ma'oo'n gu Juan ja'tkam bopkondam, xib ip moo.

26 Ba' nai' soi' jim duu gu Eroodis, giilhim jix
buam jum ilh. Gu' ji nat gu' moo pui'p ba tii'n mi'
ja kaichdhat gui' nam ji'k mi'p tu'ii' na makia' na
tu' ilhii'ñdha'. **27** Ba' pui' tiiix buam jim aagit mui'
ma joot maa'n gu sandaarui'x chugi'ñ na iikdhara'
gu ma'oo'n gu Juan. **28** Ba' mui'p ma jii maa'n gu
sandaarui'x nat iikim gu ma'oo'n. Ba' ja'xpix mi'
ba aich, mi' xi maa gu tiyaa. Mi' dhir ba' gu tiyaa
mu ja'k jup xi bhiidhak gu di'ii'n. **29** Ba' pui' ba ti kai
mit gu noonbi'ñ gu Juan na mit ba mua, ba' mui'
ma jii mit na mit bhiim gu tukga'n nam yaaspa'.

*Gu Jesuus na mui'dhalhdhai gu paan tu ja makia'
gu mui' ja'tkam*

(Mt. 14:13-21; Lk. 9:10-17; Jn. 6:1-14)

30 Ba' gio maap jup bam jumaap jamit gu
noonbi'ñ gu Jesuus na mit ja'k suulhgik mu ja'p
pai' nam jax oipimik, ba' ba aagi'ñ am na mit ji'k
tu'x bhai' tu duu, gio nam jax ja'k ja titdaim gu
ja'tkam nam tu ja a'gidhim. **31** Ba'p ja titda gu
Jesuus:

—Maik gor pai' na cham jaroi' oiri na pim ba'm
jiipdha'.

Nam gu' giilhim mui' ja'tkam mi'p oipo, jai'
jimiim am, jai'm mi'p aajim, pu cham bhai' nam
jax tu jugia'. **32** Ba' diih dai na mit jax bha tiitis
kanuub ta'm na mi ja'p jup sø' suudai' jugii'ñ,
pu cham xi chu tabuimgidhak pu jii mit jotmoda'
baasi'n dir ja'k na pai'r gampix. **33** Gu' ji na mit

gu' sia ja tii mui' jai' dhit, jix maatit tii mit na biix
 gu Jesuus bhammi pix daichu' nam mui' xi chi
 niil'ñ. Ba' bhiji ja'p pu boop jamit biix ju'ñdharan gu
 suudai', biipi' kat bhammi dir bap tu'ii' am na mit
 ba' gui' bhammi dir jup ba ai. Ja'x xikoor jumpax
 am, nam gu' jano' pik mui' mi'p oipo jai' kap dir, sia
 mik dir kam. ³⁴ Ba' nat mui' ji chim gu Jesuus bhai'
 dhir kanuub ta'm, namm'i ja'p xi ju' am gu ja'tkam
 nat ba ja tii. Ba'x ja joi'mdat ja tii, nam gu' sap
 ja'p ji buusan na jax gu kakasnir no' cham jaroi'
 ja bipia'. Ba' bhai' ji chu ja a'gi biix aixim na jax
 ja'k jir am nam tui'ñgida'. ³⁵ Ba' ja'xpix jurnidhak
 mu ja'p ba baabu mit gu noonbi'ñ gu Jesuus, jup
 titda am:

—Jax jach jich dhuñia'? Tii' nat ya' pix ba ji
 jur. ¿Cham aach ba jimia' nach ba tu koi'po'? Na
 gu' ya' cham bhaai' nach pai' tu jugia', na gu' ya'r
 gampix. ³⁶ Dai nap xi ja jootsai dhi jaaduñ kum ba
 tu taañpu' gu koi' miji ja'p pai' na jax jir kikcham,
 nam gu' cham tu' ua' gu tu' nam jugia', gio na gu'
 ya' cham bhaai' nam pai' tu saba'da'.

³⁷ Ba'p ja titda gu Jesuus:

—Yaa' pim dho ka tu ja makia' aapi'm. ¿Tu' gi
 pik?

Ba'p kai'ch am ip gio:

—Jax dhui na gu' sia kut maadit tii ma chu
 jua ji'k xijum baik masaa'n, pu cham ja aix nam
 tu jugia' siat tii ma chu saba'lh biix ka'm na ji'k
 mai'chia' gu tuumiñ.

³⁸ Ba' ba ja chia nam ja tikka' no'm sap cham jai'
 dhit iam ua' gu koi', jup ja titda:

—Ea gor xi ja tikka no'm iam jai' dhit ua' gu koi'.

Ba' gui' mijí ja'p yup xi ja tikkapuk yup titda am gu Jesuus:

—Muni tii ua' maadit, dai nar gook alh, jix chamaam gu paan gio ba' gook gu boptop.

³⁹ —Dhii' dho ba ja kokba'ñchu'n —jup kai'ch gu Jesuus.

Ba'p ja titda gu noonbi'ñ nam sap xi ja chiñia' nam mi ja'p xi dharaibu' xi'xkor gu ja'tkam sai' dhaam na joidham jix chi tiidu'. ⁴⁰ Ba' pui'p xi ja tii'n jamit, ba' mi ja'p yup ji dharaibu mit xi'xkor. Ji'kchi kap moo gui' na mit maap daraibu nam aix jix chamaam oo'm, jai' kap ba' gook oo'm daman mambhiix, mi' pix pui!. ⁴¹ Ba' gu Jesuus nat jax dhaa gux chamaam gu paan gio gu gook gu boptop, jix dhaam ja'k xi chi tiigik xi chu tax-chaabgidhak pix mui' ji ja maa gu noonbi'ñ ta'tak jaisaidhat, ba' gui' mi' dhir nai'p ji ja maa mit gu ja'tkam. Na mit pai' biix xi ja maakak gu paan, gio gu boptop nai'p ji ja maa mit. ⁴² Biix chu juu mit nam ji'k mi'p tu'ii', tu koi'mik am nam ji'x ilhii'ñ. ⁴³ Jai' mit pu cham ka jugio, pui' mit ma chu ju-maap ip gio, mambhiix daman gook bapaalh jamit ja susdui', ku gu' binkam ji gu boptop, cham tu' moo dai gu paan. ⁴⁴ Alh moo mui' ja'tkam na mit mi' tu juu, jix chamaam mambhiix jix cha'tmam oo'm (5000) aixim gu chichio'ñ, gu u'uub gu' cham daaxix kam ji gam a'alh.

*Gu Jesuus na joidham suudai' dhaam pix jimda'
(Mt. 14:22-27; Jn. 6:16-21)*

⁴⁵ Mi' dhir ba' nat jax ja chia gu Jesuus nam bha tisdia' kanuub ta'm gu noonbi'ñ, mijí xi ja joot biipi' kat nam ba Jimia' Betsaida ja'k. Ba' gui' mi' ji

bii, na gu' mi ja'p ka ja tabuimgi'ñ gu mui' ja'tkam.

46 Ba' ja'xpix nat pai' biix xi ja tabuimgidhak, pu jii bhijimmi pai' oidha' daam nat tu a'gam jix dhaam ja'k buiñor guch Gi'kora'. **47** Ba' kia'pix ırban ba ji bhiik jamit gu noonbi'ñ nat ba tuk, gu Jesuus pui bhammi:p tu'ii' oidha' daam. **48** Ba' na bhammi dir mui' xi chi nii'ñ, ba ja tii nam mummu tii ti bhiik, cham ka jimmii gu kanuub, nat gu' giilhim jix io'm bhai' ji jib mu dir ja'k nam pai' ja'k tii ka jiimit. Ba' nammii na pai' bar katukgab, mui' ma jii gu Jesuus, bhammi dir pix tu tui'dhi' biix a'nsap, mi' ba ai ip gio na pai' ge' suu'nka' gu suudai'. Mi' dhir ba' biix suudai' dhaam pix chu'm duu, ja'p gai dhir pa' moo bhichu' nam pai'p tu'ii' gu noonbi'ñ kanuub ta'm. Ba' nat mi ja'p jupaaban ji bhiik, **49** ge'ger ba jiiñ jamit jix xusuañim na mit ba tii na mi ja'p ba jimchu' suudai' dhaam. Ja'p jum aa' am na tu' mi' bax ja naa. **50** Giilhim jix chotdonit mui' ba ti nii'ñ am, gu' ji nat gu' jotmoda' bha ñio, jup ja titda:

—¡Cha'pim totdon ka! ¡Aañi' pix jup tui'dhi!

51 Ba' mui' ji ai. Ba' nat jax bha tis kanuub ta'm, nai'ji kikbu gu jibih. Ba' gui' mi' pup tu'ii' am, nam gu' giilhim jix juraapgix, **52** nam gu' chakui maat no'r ge'kam gu Jesuus, sia kum tii nii'ñ nat mui'dhalh gux chamaam gu paan, nam gu' cham biix ja jujur ki'n xim ga'nga na jax jir jum duukam.

*Gu Jesuus na ja dudua'ñdha' gux kako'kkam mu Genesareet
(Mt. 14:34-36)*

53 Ba' ja'xpix bhammi dir ba ti:tis jamit ju'ñdharan na pai' Genesareet ti tii', mia'n Betsaida. Ba' bha ja'p xi burak jamit gu kanuub **54** mui' ji

chiitim. Gu' ji nam gu' ampik mui'p ti nii'ñ gu ja'tkam, jix maatit tii mit na maadit jir di' gu Jesuus. ⁵⁵ Jotmoda' mit nai' xi chu aagam miji ja'p na jax jix chum kako'k, gio jai' na mit mui' ji ja u'uuk na pai' oiri gu Jesuus. ⁵⁶ Ba' nat miji ja'p xi jii na jax jir kikcham, pup xim ja booso' am gux kako'kkam miji dir ja'p ba'pki chir, ba' soi' titdada' am na sap sia palhiip nam bhai' xi dhagia' ju'ñdharan gu jannulhi'ñ, pu duduadhia' am. Pui' ba'p ji buus, pu dudua mit biix gui' na mit ji'k daa gu jannulhi'ñ sia gu palhiip.

7

*Gu Jesuus nap kai'ch na cham jir am nam jax tu
jimdat gu bijik dir kam
(Mt. 15:1-20)*

¹ Ba' jan'o' na mi' ka oiri gu Jesuus, mi' ba ai mit bhammi dir ja'k Jerusaleen gui' nam pariseos jum tiit'nda' gio ba' gui' nam sap jix mat ka' gu ñio'ki'ñ gu Dios. ² Ba' moo ampik yup ba ji chu juu mit gu ja'tkam tugi'ñ gu Jesuus, ba' ba ja tii mit na mit jai' dhit cham mui'kim jum i'koim, na gu' sap jix xidhuu ka' no' cham mui'kim ikoimdhix gu jaroi'. ³ Na gu' gui' nam pariseos jum tiit'nda' gio gu jai' Israel kam ja'tkam, pui mi' pui' tu daa'ñchu' am nam jax ja'k tu jimdat gu bijik dir kam kat, na sap no'm cham mui'kim ikoimdhix, cham jir am nam gan tu kua'da', nam gu' sap jum ua'tulhdha'. ⁴ Gio jai' cham daaxix kam, pui' na jax gu jaroi' no't jii pai' na biixchu' tum ga'ra, jum aa'nda' sap na mui'kim batbia' ja'k giisii, na gu' sap jix xidhuu na tu jugia' no't jax dhuuk cham mui'kim batbia. Gio gam gu tu' na bhaan tu io'da' na mui'kim ja

bopkonda', gio gu bhi'mkar, gio ba' gu tu' na bhaan dadarrida' na pai' dhuuk ba ji chu jugia'. ⁵ Mi' dhir ba' bhai' ji chikka mit gu Jesuus gui' nam pariseos jum tiiti'nda' gio gui' nam sap jix mat ka' gu ñio'ki'ñ gu Dios, jup titda am:

—¿Jax kum ba' dhim ja'tkam tuk cham mi' pui' ka jimchu' nam jax tu jimdat guch bopxikat? Tiñ' nam cham mui'kim jum i'koimdhata tu kua'.

⁶ Ba'p ja titda gu Jesuus:

—Dho pui' na jax aapi'm na pim gu' cham tu' mi' pui' jiim na pim jax ja'k tu ja a'gi'ñdha' gu ja'tkam nam tui'ñgida'. Bak gu'r pui' nat jax tu ua'nak mi' u'uan ta'm gu Isaiiyas gui' nat mui'kim bha ñio'kdhak guñ Gi'kora', nap jum kai'ch:

Dhi ja'tkam pui' xi kai'ch am nam sap tu' ka'm jiñ ñii'ñ,

gu' ji na gu' gu ja jujur miñ ja'k jup tu'ii' aañ jiñ bui.

⁷ ¿Tu'm gi mi'p tigia' siam biix aixim tu daan?

Nam gu' cham tu' mi' pui' jiim nañ jax jix aa',
gio na gu' nam ji'k jax tu ja a'gi'ñdha' gu ja'tkam,
diilh pix nam jax ilhii'ñdha'.

⁸ Jix matgam dho —jup kai'ch gu Jesuus—, na pim gu' ja'p xi dhuukat na jax jix aa' gu Dios. Dai na pim mi' pui' tu daa'ñchu' nam jax tu jimdat gu bijik dir kam kat nam mui'kim ja bopkondat gu tu' nam bhaan tu io'da', gio jai' cham aagix kam ku pim pu tu buim.

⁹ 'Gu' ba' na jax jix aa' gu Dios, tu' pix ilhii'ñ japim. Dai na pim mu ja'k jix chutkagix na pim jax ilhii'ñ diilh. ¹⁰ ¿Moo ja'p cham jam a'm baapak aa? Gi nat ja'pni tu ua'nak bo gu Moisees nap jum kai'ch mi' u'uan ta'm: "Tu' ka'm jap naidhat gum taat gio gum naan." Gio ba' moo ja'pnip jum

kai'ch ip: "Gu jaro'i' na cham tu' ka'm nii'ñdha' gu taata'n piam gu di'ii'n, pix am ti'ñchoka' na joodai ki'n ma'yaxix kam muukix ka'." ¹¹ Gu' ji na gu' aapi'm jix io'm maakam ba xi buim, ja'p jum aa' pim nar am na ja'p tiida' gu jaro'i' gu taata'n piam gu di'ii'n: "Pui' ba tii'n jañich gu Dios nañ biix mu tu tu'aa' chiop nañ ji'k tu bia'. Cham ka bhaai' nañ jax dhuim taiñbuidha', sia ku ja'p moo tiim a'm jum aa!" ¹² Dai no't pu'ñi ba tii'n gu taata'n piam gu di'ii'n, aapi'm pui' ba ti'ya' na mi' pui' ba jimchu' na jax jix aa' guñ Gi'kora', ja'p moo silhkam xi kai'chdha' pim. ¹³ Ba xi jii pimit na pim biix aixim tu bua bhaan jim iatat nam jax tu jmdat gu bijik dir kam. Gu' ba' na jax jix aa' gu Dios, gampai' pix bia' pim, panaas ku pu cham tu'bhai', gio jai' cham aagix kam ku pim pu tu buim.

Gu Jesuus nap kai'ch na cham xidhuu gu jax chu'm koi'

¹⁴ Ba' gu Jesuus maap ja jumpadak gu mui' ja'tkam jup ja titda:

—Ka na pim moox bhai' xiñ kaaya' biix na pim ji'k ya'p tu'ii' nañ jax jam tiida'. ¹⁵ Jax dhui na gu' cham tu' xidhuu no' moo tu kua' pix gu jaro'i', gu' ji no'x bhaamut nai' titiñcho, piam ku jax ña pix jum aa' na jax cham jir am na ba'x xidhuu, na gu'r ua'tulhdhara'. ¹⁶ Mi' pim pui' ba Jimia' ji'k na pim jix maatit jiñ kee.

¹⁷ Ba' mi' pui' xi ja titdaimik pu jii mummu na pai' tibiapka'. Ba' nat mu ba ai, ba tikka am gu noonbi'ñ na jax kai'ñkam jup kai'ch gu pui' na jax ja titda gu mui' ja'tkam. ¹⁸ Ba'p ja titda:

—¿Aapi'm aa pui' cham maatit jup tø køø? Ja'p jañ dho kai'ch na cham tu' xidhuu no' moo tu kua' pix gu jaroi', ¹⁹ na gu' silh bookaran ja'k bhiiya' gu koi', mi' dhir dai na giop ba buusnia', cham tu' na jura'ran ja'k baapkii mi'x buam ba jurtu'nka'.

Ba' dhi' na pui' ji' kai'ch gu Jesuus, ja'p kai'ñkam jup kai'ch na sap cham tu' xidhuu gu tu' koi', pu ni jax chu'm. ²⁰ Ba' ja'pnip ja titda:

—Gu' ji no'x bhaamut nai' titiñchu gu jaroi' piام ku jax ña pix jum aa' nax buam jir jum duukam na ba'x xidhuu, na gu'r ua'tulhdhara'. ²¹ Na gu' kai'ñkam ja jujur am dir gu ja'tkam na bhai' jim gigi'lhi'ñ gux buam jum duukam, jax ñam pix bam aa'nda', ja'p na jax gui' nam jai' jix bhai' ja titdada' gu u'uub sia kum tii ti bipna', gio gu u'uub ba pui' ip. Gio gui' nam cham tiimui'x ka', siam tii maap tu oi'dha'. Gio gui' nam ja'tkam ja koo'nda'. ²² Gio gui' nam ti iixi'ñdha'. Gio gui' nam jix bhaamut nii'ñdha' gu jaroi' no' tu' bia', nam jai' pui'p jix aagit. Gio gui' nam jax ñam pix tu buada' na jax cham jir am. Gio gui' nam iatda'. Gio gui' nam jotmoda' pix jix bhai' tiida' gu ubii, mi' dhir jumai ip. Gio gui' nam jix chi jiigak ka'. Gio gui' nam giilhim tu ñiok. Gio gui' nam jix buam ja a'gada' gu ja'tkam. Gio gui' nam ge'gerkam jum taat ka'. Gio gui' nam biix aixim tu buada', panaas kum cham ja jujur bia'ka'. ²³ Biix dhi'ñi na ji'k jix buam jir jum duu'nkam, ja jujur am dir jum gigi'lhi'ñ gu ja'tkam. Dhi' ji na ba' pui'm kai'ch nax xidhuu, na gu' giilhim jir ua'tulhdhara'.

Maa'n gu ubii na cham jir Israel kam na

*umua'ñdha' gu Jesuus na dua'ñdha' gu maraa'n
(Mt. 15:21-28)*

24 Mi' dhir ba' ma jii gu Jesuus mummu maa'n kap, mia'n pix iam na pai' gę'r kiicham Tiiro ti tiigim. Ba' mi' nat pai' ai, tii cham pai' jimmida' na tii cham aagit na jaroi'x mat ka' na pa ja'k jax chui'ka'. Gu' ji nat gu' cham pui' ji chu buus, moo jano' pui' ba tim tii. **25** Mi' ba jimchu' maa'n gu ubii nat jax pui' ti kai, na sap cham kii' tu ii'mda' ka' maa'n gu maraa'n, ampix pui'x ñaanbi' ka', ba' mi' o'lhia'n ki'n ji kikbu biiipi' dir gu Jesuus. **26** Gui' gu ubii cham tu'r Israel kam ka', pur mi' kam ka' Peniisia, na Siiria bhaan bipio' gui' gu dibii'r. Ba' soi' xi chitda, jup titda na sap iam mai' jootsa' gu cham kii' ii'mda' bhai' dhir bhaan gu tiiyax. **27** Gu' ji na gu'p titda gu Jesuus:

—Ea nañ biiipi' ka xi ja palhbuidha' gu Israel kam ja'tkam nañ ba' aap jup bam palhbuidha'. Na gu' no' ñich aap biiipi'm palhbui, ja'p ji buusnia' na jax gu a'aalh no'm ka tu kua' gu tu' koi' no' ñich mi' dhir ja boppoidhak mu xi ja maa gu go'ngox.

28 Ba'p kai'ch gu ubii:

—Dho gu' pui' dat do jia tii, gu' ji nañ gu' aañ soi'ñ ilhii'ñ. ¿Cham aa gu' cham jax jup bua no'p moo xich joi'mdai jich palhbuidha' git? Na gu' ja'p ji buusnia' na jax no'm ti tiitib gu go'ngox gu biimuñga'n na iigisda' pai' nam tu kua'da' gu a'aalh.

29 Ba'p titda gu Jesuus:

—Ja'pji moo silhkam jia nap soi'm ilhii'ñ jiñ jaduuñ. Ba buus ji matgam gu cham kii' ii'mda' bhai' dhir bhaan gum maraax. Cha'p jax kam aa'nda', ba jimia' ap.

30 Ba' ba jii ɬp gu ubii. Nat pai' dhuuk mu ai kia'mi'ñ, jix kii' mi ja'p bo'm bakxidhat gu tiiyax, pu ba buus gu cham kii' ii'mda' bhai' dhir bhaan na ki'n kax ñaanbi' kat.

Gu Jesuus na ba dua'ñdha' maa'n gui' na cham tə kəɸkə' gio na cham tu ñiokda'

31 Ba' mi' na pai' daakat gu Jesuus mia'n gə' kiicham Tiiro ti tiigim, mi' dhir giop ma jii, moo bhai' buus na pai' Sidoon ti tii', na pui'p jir gə' kiicham. Bhai' dhir ja'p gakoolh bhiik mummu ba buus na pai' Dekaapolis bhaan bipio' gu dibiir. Mu ji ai mia'n na pai' gə' suu'nka' gu suudai', na Galilea bhaan ba bipio'. **32** Ba' mi' ba bai'ñchu' am gu ja'tkam maa'n gux ko'kkam na cham tə kəɸkə' gio na cham tu ñiokda', ba' soi' titda am na sap palhiip bhai' xi dhagia' na ba' dodhia'. **33** Ba' gu Jesuus ja'p ja'k xi baidhak diilhkob palhiip bhiji xi kii'mpi naankaran, gio ba' nat xi xixbuidhak gu nobii'ñ palhiip bhai' xi dhaa niiñiran. **34** Gio ba' nat jax jix dhaam ja'k xi chi tiigik ii'mdaga'n xi buak jup kai'ch:

—;Epaata! —na ja'p kai'ñkam jup jum kai'ch: ;Xim kukpio'k!

35 Ba' joidham bhai' jim kukpio' gu naanka'n gui' na cham tə kəɸkat, gio gu niiñi'n pu dua ɬp, jix bhai' ba tu a'ga. **36** Ba'p ja titda gu Jesuus gui' nam mi'p tu'ii' nam sap cham jaroi' aagi'ñdha' nat jax dhuuk dua'ñ, gu' ji nam gu' gui' moo janoo' nai' pix ja'x pui' tu ja a'gi'ñ, sia kut tii xi ja soo'mcholhdhak. **37** Ba' gu ja'tkam gui' nam pui' tu ja a'gi'ñdha' mi' pui' pup tui'ka' am, ja'xpix dai nam jup kai'chdha':

—Joidham dho bak jia! Jain̄ na gu' pui' ja dudua'ñdhim gui' nam cham t̄e k̄ē gio gui' nam cham tu ñiok.

8

*Gu Jesuus na mui'dhalhdhai gu koi' giop tu ja makia' mui' gu ja'tkam
(Mt. 15:32-39)*

¹ Ba' mi' na pai' ka oiri gu Jesuus, gio mui' mi'p ma ai mit gu ja'tkam. Ba' baik jurni'ñ ki'n ma juu gu koi' nam tu ua'dat. Ba' maap xi ja jumpadak gu noonbi'ñ, yup ja titda:

² —Jix joi'mdat ja nii'ñ iñ dhi ja'tkam, na mit gu' baik tanoolh ya' ba ji juruuñ. Cham ka tu ua' am gu tu' nam jugia'. ³ Na gu' no' ñich pui' cham tu ja maakak ba ja joot ja ki'aam ja'k, mu pai' ua'ma' am boi cha'm, nam gu' jai' mik dir tu jim.

⁴ Ba'p titda am gu noonbi'ñ:

—Jax gi dhui jaroi'p ba tu ja maa, na gu' ya'r gampix? Paach gip tu saba'da' gu tu' nach ja makia'?

⁵ Ba' ba ja tikka'n, yup ja titda:

—Gu' ji'k japim pix ua' gu paan na pim saak ua'?

Ba' gui'p titda am:

—Xijum gook dho pix.

⁶ —Dhi'ch dho ta'tak jaisai ja makia'—jup kai'ch gu Jesuus.

Mi' dhir ba'p ja titda nam sap xi ja chiñia' gu ja'tkam nam xi dhabaibu'. Ba' gui' pui'p xi ja ti'n jamit, ba' pix mi ja'p yup ji dhabaibu mit. Ba' gu Jesuus nat jax dhaa gu xijum gook gu paan xi chu taxchaabgihak pix mui' ji ja maa gu noonbi'ñ ta'tak jaisaidhat, ba' gui' mi' dhir pix nai'p ji ja maa

mit gu ja'tkam. ⁷ Gio ba' gu boptop ji'kchip ua'dat am. Nat jax yup daa, pui'p xi chu taxchaabgidhak pix mui'p ji ja maa gu noonbi'ñ, mi' dhir ba' gui' pix nai'p ji ja maa mit ip gu ja'tkam. ⁸ Dappaam tu juu mit, tu koi'mik am nam ji'x ilhii'ñ. Jai' mit pu cham ka jugio, pui' mit ma chu jumaap, xijum gook bapaalh susda gu ta'tak ga'n nat bii. ⁹ Maakob mambhiix jix cha'tmam oo'm (4000) aix am gu ja'tkam na mit mi'tu juu. Mi' dhir ba'dai nat jax xi ja tabuimgidhak, ¹⁰ nat jax bha tis bhaan gu kanuub, pu jii ja biim gu noonbi'ñ baasi'n dir ja'k maa'n kap na pai! Dalmanuuta bhaan bipio' gui' gu dibiir.

*Gu pariseos nam jix aa'nda' na maa'n yup duñia'
gux bhai'm duukam gu Jesuus ja nii'ñchudat
(Mt. 16:1-4; Lk. 12:54-56)*

¹¹ Ba' na mit bhammi dir ba tiitisi, bhai'p ba ai mit gui' nam pariseos jum tiiti'nda'. Ba' pix am bhakku am buiñor gu Jesuus, bhax aa' am na sap yup duñia' gu tu' nar jix bhai'm duukam ja nii'ñchudat, na sap ba' bhaan matgilhia' no't baabui' silhkam bha joot guch Gi'kora!. ¹² Gu' ji na gu' gu Jesuus cham aa', dai nat jix buam jum aagit ii'mdaga'n xi buak yup ja titda:

—Jax ku pim ba'x aa' nañ yup duñia' maa'n gu tu' nar jix bhai'm duukam? Na pim gu' gammiji pu nii'ñdha!. Aañ pu kai'ch tu' silhkam ki'n nañ cham tu'p duñia' dai aapi'm jam nii'ñchudat, na pim gu' cham ji'xkat ti jii'ñdha' aañ jiñ bui, sia kuñ jix bhai' ti tu bua.

¹³ Daipu' xi ja ti'dak nat jax bha tis kanuub ta'm, pu jii ip gio baasi'n dir ja'k mi' na pai' ge' suu'nka' gu suudai'.

*Na cham jir am pui' nam jax ja'k tu a'gada' gu
pariseos gio gu Eroodis
(Mt. 16:5-12)*

¹⁴ Ja'p moo cham yup ka ti'ñchu' am nam xi chu gaamui git gu tu' nam tu jugia' gu noonbi'ñ gu Jesuus, maa'n pix bha ua' am gu paan kanuub ta'm. ¹⁵ Ba' namm'i gama ja'k nam ba jiimchu', yup ja titda gu Jesuus:

—Moo pim cham ja kekeeda' gui' nam pariseos jum tiiti'nda' gio gui' nam kaichu' gu Eroodis. Nam gu' ja'p ji buusan na jax gui' na ki'n jappukar gu paan, giilhim jix chu ia'ñdhara'.

¹⁶ Ba' bhai' jim ti tikka mit diilh jix dhu'npi'ñ ki'n, yup kai'ch am:

—¿Jax ba' ku ba'p kai'ch? Gu' bak nach cham ka ti'ñchu gu paan nach bha ui'ka'.

¹⁷ Gu' ji na gu'x bhai'x maat gu Jesuus nam jax kai'ch, yup ja titda ip gio:

—¿Jax ku pim ba' dai gu tu' paan bhaan tu a'gim na pim cham ua'? Nañ gu' aañ cham tu' tu' koi' aagit yup kai'chim. ¿Moo ja'p cham maatit tø køø pim aa? ¡Moo ja'p jix kaapak ji jia gu jam jujur! ¹⁸ ¿Ka' pim ji cham tu buupui aa, ka' cham tu naanak japim aa? ¿Kux moo ja'p cham titi'ñchura' pim aa? ¹⁹ ¿Ji'k japimit bapaalh ja susdui' gu paan gu ta'takga'n nat bii jano' na ñich mui'dhalhdhak tu ja maa gux chamaam mambhiix jix cha'tmam oo'm gu ja'tkam?

Ba' gui'p titda am:

—Mambhiix daman gook bapaalh dho.

20 —Jano' gi na ñich pai' dhuuk mui'dhalh gu xijum gook gu paan, na ñich tu ja maa gu maakob mambhiix jix cha'tmam oo'm, ɿji'k japimit bapaalh ja susdui'?

Ba' gui'p titda am:

—Xijum gook bapaalh dho.

21 Ba'p ja titda:

—¿Gu' jax ji ku pim ba' moo ja'p cham maatit tø køø, ni ku pim xim ga'nga na jax jir jum duukam? Nañ gu' aañ cham tu' tu' koi' a'gidhat jup kai'chim, ja'pji gui' nam pariseos jum tiit' gio gui' nam kaichu' gu Eroodis nañ ja aagit jup kai'chim, na cham jir am nam jax ja'k tu ja a'gil'ñdha' gu ja'tkam.

Gu Jesuus na ba dua'ñdha' maa'n gu maa'nkam Betsaida kam

22 Ba' mi' dhir mui' ma jii gu Jesuus mummu na pai'r gø' kiicham, Betsaida ti tiigim. Ba' mi' ba bai'ñchu' am maa'n gu maa'nkam na cham ñia ka', ba' soi' ba titda am na sap palhiip bhai' xi dhagia' na ba' dodhia'. **23** Ba' gu Jesuus am xi ñobchik gammiji pix chu'm duu, nammi baas ju'ñdharan xi baabuk palhiip bhai' xi julh gu chiñbur ga'n buupuiran gio nat palhiip bhai' xi dhaa, ba' xi chikka no' sap moo bax chu maax na nai' xi chi ñii'ñ. **24** Ba'p kai'ch gu cham ñia kam nai' xi chi ñiidhat:

—Bax chu maax pa' dho. Ja'p tu'm jum maaxi'ñ am gu ja'tkam na gu tutua.

25 Ba' gio bhai'p xi dhaa buupuiran, jix bhai' bhai' ji ñiata, pu dua, sap joidham jix bhai'x chu maax na nai' xi chi ñii'ñ. **26** Mi' dhir ba' dai nat ba joot kia'mi'ñ ja'k, jup titda:

—Ba Jimia' ap jum ki'aam ja'k. Gakoolh jap moo bhiiya' mi' dhi ge' kiicham nam cham bam tikkada' gu mi' oi'ñkam na pich jax dhuuk dua.

*Gu Peegro na ba tu aa'nda' na gu Jesuus jir di'
guch Xoi'kam*

(Mt. 16:13-20; Lk. 9:18-21)

²⁷ Ba' mikkat giop ma jii gu Jesuus ja bii'm gu noonbi'ñ mummu ja'k ji'kchi kap na pai'r kikcham, mia'n ge' kiicham na Sesarea Piliipo ti tii'. Ba' nam namm'i ka jimchu' bii'x boi, ba ja tikka, jup ja titda:

—Jax jam kai'chdha' gu ja'tkam? Jaroosap da' iñ? Tu'ñ sap jir jup tu'm da'?

²⁸ Ba' gui'p titda am:

—Dho ji'ma'n jup kai'chdha' am nap sap aap jir di' gu Juan gui' na ja'tkam ja bopkondat. Jai' ba'p kai'chdha' am ip nap sap aap jir di' gu Eliiyas, gui' nat saak maaxik jii jix dhaam ja'k. Gio ba' jai'p kai'chdha' am ip nap sap aap maadit jir di' gui' nam bijik ya ja'p bhaankam tu a'gimik guch Gi'kora'!

²⁹ Ba' dii'lh jup xi ja tikka gu Jesuus, jup ja titda:

—Aapi'm gi, xiñ maat japim aa nañ jir tu'p tu'm da'?

Ba' mui' ji ñio gu Peegro, jup kai'ch:

—Dho aapi' dhor di' guch Xoi'kam gui' na saak bha jootsa' git guch Gi'kora'!

³⁰ Ba' xi ja soo'mcholhdhak nam sap cham jaroi' aagi'ñdha', dii'lh jam sap pix pui'x chu mat ka'!

*Gu Jesuus na ba tu aa'nda' nam ba mu'aa'
(Mt. 16:21-28; Lk. 9:22-27)*

31 Mi' dhîr ba' gio bhai'p ji chu ja a'gi gu Jesuus
gu noonbi'ñ, jup ja titda:

—Giilhim kañ chulhiiñä' iñ, ku ba' gu' cham jax
bua ji, nat gu' pu kai'ñkam bhañ joot guñ Gi'kora'.
Cham jiñ kiigalhdha' am gui' nam jir ja gø'gørkam
tuk ka' gu Israel kam ja'tkam, gio gu ja gø'gørkam
tuk gui' nam jai' ja palhbui'ñdha' gu Israel kam
ja'tkam nam tu daanda' buiñor gu Dios, gio ba'gui'
nam sap jix mat ka' gu ñio'ki'ñ gu Dios, tu chiñia'
am nam jiñ mu'aa!. Ku ba' gu' aañ baik tanoolh
ki'n yaa' ji nañ jax ba oirida'.

32 Dhi' pui' dho gi gu'x bhai' ja aagi'ñ ji, cham
tu' pai' tu' bhaan ji ua'rgidhat. Ba' gu Peegro ja'p
ja'k dilhkob xi baabuk jup titda na sap cham jir
am gu pui' na jax kai'ch. **33** Gu' ji na gu' gu Jesuus
jotmoda' kuu' kikbu, mu ja'k ti niidhat nam pai'
pup daraa gu jai' gu noonbi'ñ, jup titda:

—¡Cha'p tu' ki'n jiñ juanda' toobolhik! Nap gu'
cham pui' ilhii'ñ na jax jix aa' gu Dios. Pui' pix ja'k
ilhii'ñ ap nam jax ilhii'ñ gu ja'tkam.

34 Ba' maap xi ja jumpadak gu noonbi'ñ gio gu
ja'tkam, jup ja titda:

—No' jaroi'x aa' na gammijí bañ kaichgida', jum
aa' na ja'p xidhui na diih jax ilhii'ñdha', dai na
pix bhaan ji bamgia', cham jax bua sia kum jix
mu'aam. **35** Na gu' gu jaroi' no' tii bañ kaichgit,
no't dai mi' ba ji choo'n no'm bax mu'aam, cham
bhai' ka tu Jimia', na gu' cham ji'xdha' ka tisdia'
jix dhaam ja'k. Gu' cham ji no' gu' cham tu' ji
køkeødat gammijíñ kaichu', no' mi' pui' xi Jimchu'
na jax jum kai'ch gux bhai'm kai'chdham ñio'ki'ñ
guñ Gi'kora', jix bhai' dho tu Jimia', na gu' pu
Jimia'x dhaam ja'k, sia ku mit ba mua. **36** ¿Tu'

gix bhai' sia ku jaroi' bixchu' tu bia' gu tu' na ya'
 dhi oi'ñga'n jix chu jai'ch? Na gu' pui' pix cham
 jup palhbuidha' na jax dhui tisdia' jix dhaam ja'k,
³⁷ gu' ji na soi'm duujim uana' no'x aa' na cham
 jum tulhiiña'. Na gu' cham jum aa' na mu pai'
 tu namki'ñdha', dai na pu tiida' guñ Gi'kora' jix
 dhaam ja'k na uana' gu ua'tulhdhar ga'n. ³⁸ Gu'
 ba' gu jaroi' no' jax dhuukat tii ba ti jiigi'ñ jiñ bui,
 aañ nat bhañ joot guñ Gi'kora', no' gu' daix xi'ir
 nañ a'mkam tu ja a'gidha' gu ja'tkam gui' nam
 chakui ti jiigi'ñdha' nam jix ua'tulhdhix ka', pix am
 ti'ñchuka' nañ cham baidhika' jix dhaam ja'k, jan'o'
 nañ pai' dhuuk bhammi dir gio ya'p ba aaya' ya'
 dhi oi'ñga'n ja bii'm gu noonbi'ñ guñ Gi'kora', nam
 ba' ampix machia' biix gu ja'tkam nañ jir gø'kam.

9

¹ Ja'pni ba' moop ja titda:

—Tu' silhkam ki'n jañ ya' pu jam tiida', jai' dhit
 na pim ji'k ya'p tu'ii' xib, ka tigia' pim na pim tu'
 cham pai' nii'ñ na ba' bhaan matgilhia' nañ aañ
 ja'xbui'p jir gø'kam na jax gu Dios, ba' bhaankam
 bhañ joot nañ ya ja'p jup tui'ñgida' ja bui gui' nam
 ji'k jix biiñak ka' buiñor na ba' cham tu' ja duñia'.

*Gu Dios na ba tu mattuda' nar gø'kam gu Jesuus
 (Mt. 17:1-13; Lk. 9:28-36)*

² Ba' gatuuk xijum maa'n журнi'ñ ki'n ma jii gu
 Jesuus ja bii'm baik gu noonbi'ñ, moo gu Peegro,
 gio gu Jakoobo, gio ba' gu Juan, bhammi mit ba
 tiit is maa'n gu gø' oidha' ta'm. Ba' bhai' jotmoda'
 maakam tu'm bhai'p jim duu, ³ bhai' ji chotbiki
 gu jajannulhi'ñ, jix chuaap jum duu, ni na cham
 ja'p jix chua na jax gu jabook kib no' bhaan mi

chanoor. Ja'p jix io'm jix chua ji, na moo sia ku diilh pux chua gu jannulh, cham ji'xkat pu chu'm oñia', siat mui'kim tiim bakua. ⁴ Ba' bhai' bam maax gu Eliiyas gio gu Moisees, bixxik dir guguukat tu a'giñ am gu Jesuus na mit ba tii gu noonbiñ. ⁵ Ba' mui' ji ñio gu Peegro, jup kai'ch:

—Umri moor am na pich bhach baidhak jiñ jaduuñ nach ya'p tui'ka' jum biim! Xib ba' tu' na jax chui'ka', ji'ma'n jach jam o'namdha', maa'n jir aap ga'n ka', jumai ba'r Moisees ga'n ka', jumai ba'r Eliiyas ga'n ka'.

⁶ Cham jum matda'ir pui' ba tii gu Peegro, na gu' giilhim jix juraapgix, gio gu jai' ba pui' ip. ⁷ Ba' jotmoda' bhai' ji chi iika dai mi' nam pai'p tu'ii', silh bhai' jim giilh gu tibaa' na pai' dhir bha tanoor. Ba' bhijimmi dir tibaa'ñ chir bhai' ji chum ñio, jup tum kai'ch:

—Dhi'r jiñ mar na pim ba' moox mat ka'. Mi' pim pui' xi chui'ñgit na jax jam tiidaidha'.

⁸ Ba' jotmoda' mu ti tii mit na pai'p tu'ii' gu Jesuus, cham pai'ka tu jai'ch am gui' nam biima'n mi' ka gu'kat. Diilh pix mi' ba kiik. ⁹ Mi' dhir ba' dai na mit giop ba jii. Ba' bhammi dir a'nsap nam bhai' ba juurkim, jup ja titda gu Jesuus:

—Moo pim chakui jaroi' aagi'ñdha' gu xib pui' na pimit jax ti tii. Jano' ba' nañ pai' dhuuk muukii ya' nañ jax ba oirida' aañ nat bhañ joot guñ Gi'kora'.

¹⁰ Ba' gui' cham jaroi'p aagi'ñdha' am, diilh pix pui'x chu mat ka' am. Dai nam tiim ti tikka'nda' diilh na sap jax kai'ñkam jup ja titda na pui' muukii mi' na jax ba oirida'. ¹¹ Mi' dhir ba' moop ba tikka am, jup titda am:

—¿Jax kum ba'p kai'chdha' gui' nam sap jix mat ka' gu ñio'ki'ñ gu Dios na pui' biiipi' ya' aaya' gu Eliiyas na ba' guch Xoi'kam ya'p ba aaya'?

12 Ba'p ja titda:

—Jir pui' dho, na gu' pui'm kai'ch mi u'uan ta'm gu ñio'ki'ñ gu Dios. Biiipi' bha jinia' gu Eliiyas na ba' ya' ba ja mattuda' gu ja'tkam na bhai' ba jim gui' na bha jootsa' guñ Gi'kora'. Dai ji na gu' giilhim jum tulhiiña', ja'ppix maa'nkam ilhdha' am gu ja'tkam, na gu' pui' ja'k yup jum kai'ch mi u'uan ta'm. **13** Ku ba' gu' ja'p moo gu tu'x matgam ba tum kuugalh ji, nat gu' ya' tii ai gu Eliiyas, gu' ji na mit gu' tu' pix ilh gu ja'tkam pui' na jax yup jum kai'ch mi u'uan ta'm gu ñio'ki'ñ gu Dios. Juan ja'tkam bopkondam jañ aagit yup kai'ch na pui' ji buusan na jax gu Eliiyas.

*Gu Jesuus na mai' jootsa' maa'n gu cham kii'
ii'mda' bhai' dhîr bhaan maa'n gu biapma'*
(Mt. 17:14-21; Lk. 9:37-43)

14 Ba' ja'xpix nat mummu ba ai gu Jesuus ja bii'm gu baik gu noonbi'ñ, mi' na mit pai' pup bii gu jai' noonbi'ñ, ba ja tii nam ja'x xikoor guguuk gu ja'tkam xikoolh dhîr, mi' ñiokbotu' am ja bii'm gui' nam sap jix mat ka' gu ñio'ki'ñ gu Dios, nam gu' mi'p oipo. **15** Ba' gu ja'tkam na mit ba tii gu Jesuus na mi' amuub ba aajim, joidham jix bhai'm ilh jamit. Jotmoda' mit mu boop, baas jamit namkik ba ñio'ki. **16** Ba' nat mi' ba ai na pai' pix tu' tum kai'ch, ba ja tikka gu noonbi'ñ nam tu' a'gat pix tu' kai'ch, yup ja titda:

—¿Tu' pim ba' ki'n ñiokbo ja bii'm dhi jaaduñ?

17 Ba' mi' dhir ja'p bhai' ji ñio maadit gu jaroi',
jup kai'ch:

—Aañi' dhoñ a'm jup tu tu'ii' jiñ jaduuñ na ñich
bhai' ma baidhak guñ mar nap kapbhai' yiñi' pai'
pix kaidha' nap oiri, nap git iam mai' jootsa' gu
cham kii' ii'mda' bhai' dhir bhaan na ki'n cham tu
ñiok. **18** Pai'ji jix io'm ba xi bhiyya', jotmoda' iarii
bhai' jim totbhiopa', gio na bhai' ji choksolhia' gu
chiñii'ñ, gio ba' na kio'ñcho'nda' gu taatmu'n. Ja'p
ba' moox gak pix ba'. Tii ñich ba ja umua' dhiñ
jaaduñ dhi' nam jum kaichu' nam mai' jootsa' git,
gu' ji na gu' chix xijai, jax ña ja'k.

19 Ba'p ja titda gu Jesuus biiñ nam ji'k mi'p tu'ii':

—Jax ku pim ba' moo ja'p cham ji'x buiñor jix
biiñak guñ Gi'kora'? Ji'x jañ ba' ya ja'p oirit jup
tu jam aagi'ñdha'? Bhai' gor xiñ bai'ñxi'ñbup gux
ko'kkam.

20 Ba' ma bai'ñxidham jamit. Ba' nam amuuub
ba bai'ñchu', bhai' jim bhaamtuda gu cham kii'
ii'mda' nat ba tii gu Jesuus na mi'p tu'ii'. Ba xi
bhiñ gu biapma', mi ja'p nai' ji ia, giilhim bhai' jim
totbhiopa, gio nat bhai' ji choksogir gu chiñii'ñ.
21 Ba' xi chikka gu Jesuus gu taata'n gu biapma',
jup titda:

—¿Paa duuk dir pui' bam bua?

Ba' gui'p kai'ch:

—Alhi'ch dhim dir do. **22** Pai'ji pu'ñi bhai' jim
bhammutu'nda' gu cham kii' ii'mda' na jax xib,
mi' ba gixa' tai chir dhiñ mar piam pai' suudai'
chir. Ja'p moo tiip mumua'da' dho, kux ba' gu
joidham aa. Pui' kuñ ba' soi'm titdañ jaduuñ no'p
moo pui'p ilhii'ñdha' git nap xich joi'mdai mach
palhbuidha'.

23 Ba'p titda gu Jesuus:

—Dho gu' no'p gu' bax biiñak ka' buiñor guñ Gi'kora', xib dho pui' ji chu buusnia', na gu' gui' cham tu' xijaichu'n.

24 Ba' gu taata'n gu biapma' xi'kam mu ñio ip gio, jup kai'ch:

—Dho gu' aañ chiix biiñak ji panaas, gu' chi moo chakuir pui' ji jia. Aa' nap mañ aa'ñdha'ñ jaduuñ nañ ba'x bhai' machia' nañ jax ja'k jix io'm bax biiñak ka' buiñor.

25 Ba' pix ji aajim am gu ja'tkam na ja nii'ñ gu Jesuus, ba' xim jotma'ñ nat mai' joot gu cham kii' ii'mda', jup titda:

—Aapi' cham kii' ii'mda' nap mi' naanbichu'n dhiñ jaduuñ na ba' cham tu ñiok gio na cham tø køø, mu buusaiñ bhai' dhir bhaan. Cha'p ba' gio bhai'p ka bapkida'.

26 Ba' panaas kut jix io'm ba xi bhií gu biapma' nat pai' dhuuk ba ji buus gu cham kii' ii'mda' bhai' dhir bhaan, panaas kut nai' ji muu. Ba' xeej jiiñkik gu cham kii' ii'mda' nat ba' pik ba buus. Ba' jai' dhit jup kai'ch am gu ja'tkam:

—Pu muukik jup dum duu ji dhi'.

27 Gu' ji na gu' gu Jesuus nat jax nobi'ran daa, xi bamii'. Joidham bhai' ji bam, jix kii'p dum duu.

28 Ba' mikkat nat gio mummup ba ai gu Jesuus na pai' tibiapka', ba tikka am gu noonbi'ñ, jup titda am:

—Jax ku chich ba' aach cham jax dhooda gu cham kii' ii'mda' nach tiip titda na buusnia' git bhai' dhir bhaan gu biapma'?

29 Ba'p ja titda gu Jesuus:

—Dho na gu' gui' pu chu'm gu cham kii' ii'mda', saabuix kam jum aa', gio nañ gammiji xi chu a'gat jix dhaam ja'k buiñor guñ Gi'kora' na ba'x bhaai'n ka' nañ mai' jootsa'.

Gu Jesuus na gio pui'p ba ti'ya' nam mu'aa'
(Mt. 17:22-23; Lk. 9:43-45)

³⁰ Mi' dhîr ba' giop ma jii mit, mummu mit ba bubua na pai' Galilea bhaan bipio' gu dibiir. Ba' tii cham aagit gu Jesuus na jaroi'x mat ka' na mi' buusnichu', ³¹ na gu'p ja titdaim gu noonbi'ñ:

—Aañ nat bhañ joot guñ Gi'kora', jum aaya' gu tanoolh nañ mi' pix ji buusnia' nam pai'ñ o'bhagi'ñdha' gu ja'tkam gø'gørkam jum aa'ndam. Mi' puñ dhaagii tu chiñia' am nam jiñ mu'aa', ku ba' gu' aañ baik tanoolh ki'n yaa' ji nañ jax ba oirida'.

³² Gu' ji na mit gu' cham maatit kai na jax kai'ñkam jup ja titda. Ti xix chikkam ka' am, gu' ji nam gu'x iibhi'ñdha'.

Gu Jesuus na ba tu aa'nda' nam jaroi' jir gø'gørkam ka'

(Mt. 18:1-5; Lk. 9:46-48)

³³ Ba' mummu ba ai mit gø' kiicham na pai' Kapernaum ti tii'. Ba' nam mi' ka daraa nam pai' tibiapka', ba ja tikka gu Jesuus gu ja'tkam tugil'ñ nam tu' a'gim bhiji biix boi nam pai' dhuuk bha jimchu', jup ja titda:

—¿Tu' pim ba' a'gim bhiji biix boi nach bha jim na pim ba'x dhu'npi'ñ ki'n pix chu' kai'chim?

³⁴ Pu cham jaroi' ñiok, nam gu'x xi'ir, nam gu'm ti tikkaim na jaroi' jix io'm jir gø'kam gui' nam ji'k bha jiimchu' dai gui' nam ji'k kaichu'. ³⁵ Ba'

maap ja jumpadak gu mambhiix daman gook gu noonbi'ñ, mi ja'p ji dhaibuk jup ja tiitda:

—No' jaroi'x aa' nax io'm jir ge'kam ka', jum aa' na soi'm ilhii'ñdha' gio na ja palhbui'ñdha' gu ja'tkam, sia nar jaroi'.

³⁶ Ba' maa'n gu alhii nat jax nobchik mi ja'p ba kiiš ja saagi'ñ. Mi' dhir ba' xi dhaagik jup ja tiitda:

³⁷ —No't jaroi'x bhai' ba duu maa'n gu alhii jiñ a'mkam ja'p na dhi'ñi nañ ya'daa', pui' ji buusnia' nat aañ jix bhai' bañ dhuu. Ku ba' gu' cham tu' ji na moo dai aañ nax bhai'ñ dhuñia', gu' ja'pji biix ji sia guñ Gi'kora' gui' nat bhañ joot.

Gu jaroi' na mi' pui' ba tu da'ñchu'nda' na jax gu ja'tkam tugi'ñ guch Xoi'kam

(Lk. 9:49-50; Mt. 10:42)

³⁸ Ba' bhai' ji ñio gu Juan, jup kai'ch:

—Aañ chii xim tiikkam na chich maa'n tii gu maa'nkam nam a'mkam mai' ja jootos gu cham kiki' i'ii'mda' ja a'm dir gu ja'tkam. Aach ba' xi soo'mcholhdhak, na gu' cham jich biim oiri.

³⁹ Ba'p kai'ch gu Jesuus:

—Jax ku pimit ba'p soo'mchulh? Na gu' cham ji'xkat jiñ a'mkam jix bhai' tu duñia' gu jaroi' no' cham ti jiigil'ñ aañ jiñ bui. ⁴⁰ Na gu' gu jaroi' no' cham jix buam jich a'ga, mi' pui' tu da'ñchu'nda' na jax aach. ⁴¹ Ba' gu jaroi' no't tu jam maa gu koi', piäm sia dai suudai' no't jam toi', no'x maat na pim jiñ kaichu', tu' silhkam ki'n jañ ya' pu jam tiida', dhi' bhaan ba ti nii'ñdha' guñ Gi'kora'.

Gu Jesuus na ba tu aa'nda' na cham tu jimchu'n gu ua'tulhdhara'

(Mt. 18:6-9; Lk. 17:1-2)

42 'Gu' ba' gu jaroi' no't maakam iatgidhak jix buam ba tu mamtux maadit gu alhii pui' na dhi'ñi, no' gu' tii ka ti jiigi'ñdhat aañ jiñ bui, piام sia kur gę' maa'nkam no't kia'pix ba ji chi jiñ'ñdhak, aañ pu jam titda na dhi' ba' pui'm kai'ch na cham jir kii'. Dhi' ba' pui' pix bax bhaigit nam bha bulhdhai gu mattur kuxburan mijimmi pai' bua' suudai' chir, na ba' cham gammiji pup jum ua'tulhdhidha', gio nam ba' cham mi' ji kęęji gu jai' mi' bhai'p jim ua'tulhdha'. **43** Gu' ba' no't jax dhuuk mam ua'tulh gu jaroi', no't gu' gu nobii'ñ chu'm da'p duu, pui' pix bax bhai' na tu chiñia' nam ii kdha' na ba' cham pix ba jim ua'tulhdhidha'. Na gu' cham jax bua sia ku maa'n pix tu nob, no' ti jiigi'ñ buiñor guñ Gi'kora', cham tu'm tulhiiñ'a' no't bam ja'bsu gu tukga'n, pu Jimia'x dhaam ja'k. Gu' gi ba' no' gu' cham ti jiigi'ñ, sia ku tii biix gook jix kikii' gu noonbi'ñ, mu ja'k pu bhiiya' dhox chu tukgam kir na pai'r tulhiiñara' gammiji, na pai' cham tutki gu tai, **44** mu na pai' ja'p ji buusan na jax pai' ju'ñdharan gu gę' kiicham na tum nu'aidha' gu tanaarada', nam gilhim mui' mi bitka' bo gu bot-poda' nam tu kua'da' gu tu' dibaalhga'n na mi chu suulhgidha', gio ba' na gammiji ti miijidha' dai mi', na gu' mim kuusdaidha'. **45** Piام ku gu' no't jax dhuuk mam ua'tulh gu jaroi', no't gu' gu toona'n tu'm da'p duu, pui' pix bax bhai' ip na tu chiñia' nam ii kdha' na ba' cham pix ba jim ua'tulhdhidha'. Na gu' cham jax bua sia ku maa'n pix chu toon, no' ti jiigi'ñ buiñor guñ Gi'kora', cham tu'm tulhiiñ'a' no't bam ja'bsu gu tukga'n, pu Jimia'x dhaam ja'k. Gu' gi ba' no' gu' cham ti jiigi'ñ, sia ku tii biix gook jix kikii' gu tootna'n, mu ja'k dho pu bhiiya' jix

chu tukgam kir na pai'r tulhiiñara' gammiji, na pai' cham tutki gu tai, ⁴⁶ mu na pai' ja'p ji buusan na jax pai' ju'ñdharan gu ge' kiicham na tum nu'aidha' gu tanaarada', nam giilhim mui' mi bitka' bo gu botpoda' nam tu kua'da' gu dibaalhga'n na mi chu suulhgidha', gio ba' na gammiji ti miijidha' dai mi', na gu' mim kuusdaidha'. ⁴⁷ Piam ku gu' no't jax dhuuk mam ua'tulh gu jaroi', no't gu' gubui'ñ tu'm da'p duu, pui' pix jup bax bhai' ip na tu chiñia' nam jupñidha' na ba' cham pix ba jim ua'tulhdhidha'. Na gu' cham jax bua sia ku maa'n pix tu bui, no' ti jiigil'ñ buiñor guñ Gi'kora', cham tu'm tulhiiñä' no't bam ja'bsu gu tukga'n, pu Jimia'x dhaam ja'k. Gu' gi ba' no' gu' cham ti jiigil'ñ, sia ku tii biix gook jix kikii' gu buupui'ñ, mu ja'k dho pu bhiiya' jix chu tukgam kir na pai'r tulhiiñara' gammiji, na pai' cham tutki gu tai, ⁴⁸ mu na pai' ja'p ji buusan na jax pai' ju'ñdharan gu ge' kiicham na tum nu'aidha' gu tanaarada', nam giilhim mui' mi bitka' bo gu botpoda' nam tu kua'da' gu tu' dibaalhga'n na mi chu suulhgidha', gio ba' na gammiji ti miijidha' dai mi', na gu' mim kuusdaidha'.

⁴⁹ 'Gu' ba' gui' nam ji'k jiñ kaichgida', jax ña pix ba tu tatdaka' pai'ji, panaas ku tu' na pix jax ba ja duñia', ja'p ji na jax dhui ja ti'ñchuixi'ñka' nam ba'x io'm mui' xim biiñkada' buiñor guñ Gi'kora'. Ba' dhi' iampix ja'pniñ ja'k ua'rgidhat jup kai'ch na jax gu biijk dir kam nam tu makgirtarda' na ba' ja uañdhidha' gu Dios gu ja ua'tulhdhara', biiipi'm mi' xi buidhai ge' gu on nam ba' ba miidha'. Ba' gu xib gui' nam ji'k jix aa'nda' na oñia' gu ja ua'tulhdhara', ja a'm jum aa' nam jix io'm xim biiñkada' aañ jiñ bui na ba' ja'p ji buusnia' na jax

gu makgir gu bijik dir kam kat, cham tu' kam aa' nam moo pui'p tu buidha' kia!. ⁵⁰ Na gu' gui' nam ji'k mi' pui' ba jimchu'nda', no'm cham tu' bhaan jim banoosat tu oi'dha', dhi' ja'pni ja'k ji busaak na jax gu koi' no' ampix jix onkak. Gu' ba' no' mit gu' dai mi' bixchu' bhaan ba jim banoosa, no'm gu' cham pui' ilhii'ñ gu jai', dhi' ja'p ji buusnia' na jax gu on gui' nar jai' pa' no't maa'nnim ba ba'n, na cham tu' ka bhai'n ka', na gu' cham pui' ka onkak ka'.

10

*Gu Jesuus nap kai'ch na cham bhai' nam mai' ja iabuda' gu ja'tkam gu ja bipna'
(Mt. 19:1-12; Lk. 16:18)*

¹ Ba' giop ma jii gu Jesuus mi' dhir Kapernaum mummu ja'k maa'n kap na pai' Judea bhaan bipio' gui' gu dibiir. Mikkat ba' baasi'n dir ja'k gu Jordaan Ak xi jii, iampix xia'lhbui ja'k, na pai' maakam ja'k ba bipio' gui' gu dibiir. Ba' mui' bhai' mam jumaap jamit gu ja'tkam, ba' bhai' xi chu ja a'gidhimik, pui' na jax ba tu ja a'gil'ñdha' gammiji na jax ja'k jix bhai' nam tui'ngida'. ² Ba' moo bhai'p ba ai mit gui' nam pariseos jum tiiti'nda', ba' ba tikka'n am gu Jesuus no' sap jix bhaai' gu jaroi' no' cham ka joi'ñ gu binga'n na mai' xi buaji jumai xi bhiji. Nam mi' pix mamti, ee jax pik sap ti'ya'. ³ Ba' xi ja tikka ip gu Jesuus, jup ja titda:

—Jax gi ja'k jum kai'ch mi u'uan ta'm nat tu ua'nak gu Moisees?

Tiix maat, gu' ji na gu' pix jap ja titda. ⁴ Ba' gui'p kai'ch am:

—Dho saak dai na palhiip tum ua'na' u'uan ta'm na bhaan jix maati' ka' nam cham tu' kar jum bipnagim ka'.

⁵ Ba'p ja titda ip gio gu Jesuus:

—Jax japim ba' ilhdhat koe gu pui' nat tu ua'nak? Panaas kur joidham aa? Ja'pni dho kai'ñkam pui' ja'k tu ua'na, na gu' giilhim jix kaapak ka' gu ja jujur gu bijik dir kam, cham ji'xkat mi' pui' jii mit na jax tii pik tu ja a'gidhimik. Ba' aapi'm alh ja'p moox ja o'iñ. ⁶ Gu' matgam ja'pjani ja'k na aagix jano' dir nat pai' dhuuk yup duu gu Dios dhi o'iñga'n, na gu' pui' tu ua'ñix gu ñio'ki'ñ mi u'uan ta'm nap jum kai'ch: "Gook pix ya ja do'ñcho gu ja'tkam, maa'n chio'ñ gio maa'n ubii." ⁷ Gio ba' moo ja'pnip jum kai'ch ip: "Na pai' dhuuk ba ti bina' ka' gu jaroi' maadit, jix bhai' na maakam ja'k ba tu kiicha' bima'n gu binga'n, cham tu' mi' ka kioka' nam pai' o'iñka' gu gi'korga'n. ⁸ Ba' maa'n ii'mda'p duuka' am gook dit daim bipnagim." Ba' dhi' ja'pnir jum duukam, na ba' ja'p ji buusnia' na bar maa'n maa'nkam ka', sia kum jir gook. ⁹ Na gu' gu Dios cham tu' aa' gu pui' ja'k nam xim u'ji gatuuk giop bam ji'dilhkada'.

¹⁰ Ba' na mit pai' dhuuk gio mummup ba ai nam pai' tibiapka', ba tikka am gu noonbi'ñ na jax kai'ñkam yup ja titda gu pariseos mi' na pai' xi chu ja a'gidhimik. ¹¹ Ba'x bhai' xi ja aagi'ñ gu Jesuus, yup ja titda:

—Ja'pniñ dho kai'ñkam yup kai'ch, na gu jaroi' no't mai' xi buak gu binga'n jumai bhai' tiip ji bhii, cham tu' pui' ka ja bia'ka' guñ Gi'kora' nam jir jum bipnagim ka', pui' pix bar tuutu'm ka' am gu' buiñor na jax gui' nam jir ganai' pix ka'. ¹² Gio gu

ubii no't mai' xi buak gu binga'n jumai tiip xi oi,
cham tu' pui'p ka ja bia'ka' guñ Gi'kora' nam jir
jum bipnagim ka', pui' pix ja'k yup ba ji buusanda'
buiñor nañ jax ba kai'ch.

*Gu Jesuus na ja a'mkam tu a'ga' gu a'aalh jix
dhaam ja'k buiñor guch Gi'kora'
(Mt. 19:13-15; Lk. 18:15-17)*

¹³ Mi' dhir ba' mikkat mi' ba ai mit gu ja'tkam na
pai'p tu'ii' gu Jesuus, ji ja ua'dat am gu ja a'aalh
chuk na sap ba' biix ji'ma'n xi ja daagii tu a'ga' ja
a'mkam jix dhaam ja'k buiñor guch Gi'kora'. Gu' ji
nam gu' gu noonbi'ñ cham aa', ba ja ñiok jamit, yup
ja titda am na cham bhai' nam mu ja'k ja ua'da'.
¹⁴ Gu' ji nat gu' gu Jesuus ba ja kai gu noonbi'ñ nam
ja ñioki'ñ gu ja'tkam nam pix ji aajim, ba'x buam
jum ilh, ji'x chii pix am jix bhaamum jum i'lhi'ñ,
ba'p ja titda:

—Cha'pim ja ñioki'ñdha' dhi jaaduñ nam bha ja
ua' gu ja a'aalh chuk, na gu' no'm soi'm ilhii'ñ gu
ja'tkam, ja a'm ti nii'ñdha' gu Dios. Nam gu' ja'p ji
buusanda' na jax gu a'aalh no'm chakui tu' bhaan
titii'ñchu nax buam jir jum duukam. ¹⁵ Tu' silhkam
ki'n jañ ya' pu jam tiida', gu jaroi' no'x aa' na bhaan
ti ñiidhidha' gu Dios, jum aa' na soi'm duuka' gio
na soi'm ilhii'ñdha' gammiji. Ba' dhi' ja'p ji busaak
na jax gu alhii no'x chi kęñ nam tu' chianda'.

¹⁶ Daipu' xi ja tiidak, mi' dhir ba' dai na jax ja
da'ngi gu a'aalh, mui' xi chu a'ga ja a'mkam jix
dhaam ja'k.

*Maa'n gu biapma' jix chumñigam na ba tikkada'
gu Jesuus na jax ja'k jix bhai' na tui'ñgida'
(Mt. 19:16-30; Lk. 18:18-30)*

17 Ba' maa'n nim nat ba jii gu Jesuus, nammi gama ja'k ba ai mirdat maa'n gu biapma'x chumñigam, ba' mi ja'p o'lhia'n ki'n xi kikbuk biipi' dir jup kai'ch:

—Aañ ja'p tē kēe nap joidham jir jix bhai'kam jiñ jaduuñ. Ba' bhai' ma mii ñich na ñich bham tikkam na jax ja'k jix bhai' nañ duuji mi' pui' jimia' na saak jax jix aa' guch Gi'kora' nañ ba' buiñor bap tui'ka', na ba' gammiji jiñ a'm ba ti nii'ñdha!.

18 Ba'p titda gu Jesuus:

—Jax nap duukat jix maat nañ jir jix bhai'kam jiñ jaduuñ? Na gu' jumaip jix jai'ch gui' na ja'xbui' pui'p jir jix bhai'kam na jax aañ, gui' dhoñ Gi'kora' nax dhaam jup tu'ii'. Gui' ji' ji na ba'm baidhika' jix dhaam ja'k, **19** no'p dho ji mi' pui' jimia' na jax tu ua'ñix mi u'uan ta'm gu ñio'ki'ñ nap jum kai'ch: "Cha'p jai'x bhai' ka ja titdada' gu u'uub nap pai' dhuuk ba ti bii'na' ka'. Gio nap cham ja koo'nda' gu ja'tkam. Gio nap cham ti ii'xi'ñdha!. Gio nap cham iatda'. Gio nap tu' ka'm ti nii'ñdha', pui' na jax gum taat nap moo tu' ka'm xi ñiidhat gio gum naan."

20 Ba'p kai'ch ip gio gu biapma':

—Dho gu' aañ moo tii cham pai' dhuuk mu pai' jax tu bua ji na ñich dhîr bhai'ñ jur ji bhii. Biix jañ mi' pui' jimchu' nap jax ba kai'ch.

21 Ba'x joi'mdat ba tii gu Jesuus, na gu'x maat nar pui' na jax kai'ch. Ba'p titda:

—Maa'n ka bi'iix ji matgam nam a'm jum aa' nap mi' pui' jimia', nap biix tu ga'ra' gui' nap ji'k tu' bia', ja makia' ap ba' gu tuumiñ gui' nam alh cham bhai' nam pai' dhîr u'ji tu' ki'n tu saba'da'. Na gu' cham jax bua no'p bañ kaichu' sia pich pui'

ji bii gu xib, na gu'x dhaam ja'k pui' nap jax bar jix chumñigam ka'.

²² Ba' gampai' jim duu gu biapma' nat pui' ji' xi chii'n. Giilhim jix buam jum aagit ba jii, na gu' dai mu ja'k bhaan jix chukgix, na gu' giilhim jir jix chumñigam ka'.

Gu Jesuus na ba ja aagi'ñdha' gu ja'tkam tugi'ñ na giilhim jix xijai nam ti jii'ñdha' buiñor gu Dios gux chutumñigam

²³ Ba' gu Jesuus bhai' xi ja tiigik gu ja'tkam tugi'ñ nam mi ja'p guguuk bii'x xikoolh dhir, jup ja titda:

—¿Jax japid ilhdhat ti niil'ñ jiñ jaaduñ? Tii' na jax jix xijai na ti jii'ñdha' buiñor gu Dios gu jaroi' no'r jix chumñigam.

²⁴ Ba' mi' pui' pup tu'ii' am nat pui' ji' xi ja tii'n. Ba'x bhai' xi ja aagi'ñ, jup ja titda:

—Ja'pniñ dho kai'ñkam jup kai'ch jiñ jaaduñ. Giilhim jix xijaim ilhii'ñdha' na bhaan titii'ñchuka' gu Dios gu jaroi' no'r jix chumñigam, na gu' dai mu ja'k bhaan jix chukgix ka' gu tu' na tu bia'ka'. ²⁵ Na gu' ja'p ji busaak na jax gu soomkar na alhi'ch alh tu bui. ¿Jax dhui mu baakii ja'p dir ja'k ji buusnia' gu tu' no' giilhim jir gø', ja'p na jax gu kameeyo? Pu'ñip ji buusan gu jaroi' no'r jix chumñigam.

²⁶ Jix io'm mi' pui' pup tu'ii' am gu ja'tkam tugi'ñ nat gio pui' ji'p xi ja tii'n. Nai' tiim ti tikka am diilh, jup kai'ch am:

—Dho bak gu' cham ji'xkat jaroi' tisdia' jix dhaam ja'k, na gu' bak pui' giilhim jix xijai nañ gammiji bhaan titii'ñchuka' na jax ja'k jix bhai'r jum duukam.

²⁷ Ba' gu Jesuus bhai' xi ja tiigik jup ja titda ip gio:

—Dho gu' gu ja'tkam giilhim jix xijaim ilhii'ñ am dho. Gu' gu Dios buiñor pur cham tu', na gu' bixchu'x bhaai' nap tu duñia'.

28 Ba' bhai' ji ñio gu Peegro, jup kai'ch:

—Dho gu' aach chii biix ja'p xi dhuuk ji gu tu' palhiip nach bia'kat na chich pai' dhuuk dir bhai' ji chi jii'ñ aap jum bui.

29 Ba'p kai'ch gu Jesuus:

—Tu' silhkam ki'n jañ ya' pu jam tiida', gu jaro'i no't ja'p xi dhuuk gu tu' na tu bia'ka', pui' na jax gu ba'pki'ñ, piام gu xiixio'gi'ñ, piام gu sispidhi'ñ, piام gu taata'n, piام gu dii'n, piام gu binga'n, piام gu maamra'n, piام gu dippir pai' nar ga'n ka', no't aañ jiñ bui ba ti jii'ñ na ba' mi' dhir dai nañ a'mkam ba tu a'gada' gux bhai'm kai'chdham ñi'ook, **30** jix io'm mui' tu makia' guñ Gi'kora', jix chamaam oo'm pup. Cham tu' ja'kbui' na ji'k ja'p xi dhuu ji, gu' ja'pji mui' ji na ja'k iabuidha' gu ba'bhan, gio gu xiixio'gi'ñ, gio gu sispidhi'ñ, gio gu diidi'n, gio gu maamra'n, gio gu dippir, sia ku gu'x buam tu tatdaka' pai'ji. Ku ba' gu' na pai' dhuuk ja'bsuña' gu tukga'n, pu Jimia' ji jix dhaam ja'k. **31** Gio ba' jan' na pai' dhuuk jum aaya' na tum kuugalhdha' ya' dhi oi'ñga'n, gui' nam xib jir gø'gørkam jum aa'ndam, ja'ppix ja'tkam ji bi'ya' am, gu' ba' gui' nam xib panaas jir ja'ppix ja'tkam, bar gø'gørkam ka' am jan'.

*Gu Jesuus na gio pui'p ba ti'ya' nam mu'aa'
(Mt. 20:17-19; Lk. 18:31-34)*

32 Ba' nam bhammi ba tiisdim nam Jerusaleen ja'k ba jiim, biipi' jimchu' gu Jesuus, gatuuk dir ba' mui'p jiimchu' am gu ja'tkam tugi'ñ. Mi' pix

pu tui'dhi' am, cham tum ñiokim, jix chotdontu' am, nam gu'x maat nam bhai' o'bhagi'ñ. Ba'x io'm baasi'n ja'p xi ja boosgak dilhkob dai gu mambhiix daman gook gu noonbi'ñ ba ja aagi'ñ nam jax dhooda', ³³ jup ja titda:

—Ba aajim ich jia Jerusaleen na pim jax ba ti nii'ñ. Moo mam ai na pai' dhuuk tu daaxix nam jiñ dhagia' gu ja gø'gørkam tuk gui' nam jai' ja palhbui'ñdha' gu Israel kam ja'tkam nam tu daanda' buiñor gu Dios, gio gui' nam sap jix maat gu ñio'ki'ñ gu Dios, ba' ja chiñia' am nam jiñ mu'aa' gui' nam cham jir Israel kam ja'tkam. ³⁴ Ba'gui' jax ñam piñ jiñ buimi, jiñ gibiiimi am, gio nam bhañ xixbuidhim. Ja'pnim jiñ buimiñ mu'aa', ku ba' gu' aañ baik tanoohl kí'n yaa' ji nañ jax ba oirida'.

Gu Jakoobo gio gu Juan nam ba tikka' gu Jesuus no' ja aa'ñdha' nam jax ilhii'ñdha'

(Mt. 20:20-28)

³⁵ Ba' gu Jakoobo gio gu Juan, maamra'n gu Sebedeo, moop ba tikka am gu Jesuus nam jax ilhii'ñ, jup titda am:

—Aach tii xim tikkam jich jaduuñ no'p moo cham jax ti'ji jich aa'ñdha' git nach aach jax jup ilhii'ñ.

³⁶ Ba' xi ja tikka gu Jesuus, jup ja titda:

—¿Jax gi ja'k ilhii'ñ japim jiñ jaaduñ? ¿Tu' pim jix aa' nañ jax dhuñia' aapi'm jam bui?

³⁷ Ba' gui'p kai'ch am:

—Dho nach ja'p tii ilhdhat nap biixxik dir jich dharsa' jum sanoop nap pai' daaka' aap jich jaduuñ, maa'n kii'n dir, jumai ba' o'nsop dir, jan'o'

na pai' dhuuk saak maaxik bax maati' ka' nap jix
io'm jir gø'kam.

³⁸ Ba'p ja titda gu Jesuus:

—¿Kux ilhii'ñ japim aa na cham xijaiñ jaaduñ
ku pim ba' bixxik dir jix aa' na pim daraibu' jiñ
xanop? ¿Katti no' pim gu'x ñakoo' jia na pim tu
i'ya' gux xibu' nam aañ jax chu'm jiñ ichdha', gio
nam jam bopkona' ki'n gui' nam aañ jax chu'm
ki'n jiñ bakuana'? Ja'p jañ kai'ñkam jup kai'ch nar
tulhiiñara' na pim ba' ba mai'chia' na pim jax jix
aa'.

³⁹ Ba' gui'p kai'ch am:

—Jix ñakoo' ich dho.

Ba'p ja titda gu Jesuus:

—Dho ea na pim pix am ti nirda' ku gi nam jam
ichdha' gux xibu', gio nam jam bopkona' pui' nam
jax ja'k jiñ bakuana' aañ. ⁴⁰ Gu' ba' dhi' na pim tu'ñ
chikka na pim bixxik dir jix aa' na pim daraibu' jiñ
xanop, maa'n kiñ dir, gio jumai o'nsop dir, cham
maati' ji gu xib. Gu' jano' ji na pai' dhuuk tum
kuugalhdha' na ba' bax maati' ka' na jaroi' bhai'
ji ja aaga' guñ Gi'kora'.

⁴¹ Ba' gu jai' gu mambhiix gu noonbi'ñ gu Jesuus
am bhaak jamit ja bui gu gook, Jakoobo gio gu
Juan, nam ja kø'f nam pui' ji' kai'ch. ⁴² Gu' ji nat
gu' gu Jesuus jotmoda' maap xi ja jumpadak jup ja
titda:

—Jax dhui na cham jir am na pim moo ki'n jup
bax bhaak na pim jix aagit na pim jir gø'gørkam
ka'. Na gu' dhi' ja'p pix ba ji buusan na jax gui'
nam cham tu' ka'm ti nii'ñ, pui' na jax gui' nam
jix kakai' ki'n dadarri, nam dai giilhim gø'gørkam
jum taat ka', sia ji gu' gui' nam miamdaga'n ki'n

dadarri. **43** Gu' matgam no' pim aapi'm jix aa' na pim jir g 'g rkam ka', jum aa' ji na pim soi'm duukat ja palhbui' ndha' gu ja'tkam, sia nar jaroi', **44** sia pik jax ka' git. No' pix maadit jix aa' ji gu jaroi' nar g 'kam ka', jum aa' moo na soi'm duuka' gio nar jix bhai'kam ka', panaas ku moo pu cham jir g 'kam ka' git. **45** Tii pik aa n na n jix io'm jir g 'kam, cham pai' iam jax ji n aa' i n na n pix am cham ja ninii' ndha' gui' nam alh gampai' tuutu'm. Na  ich gu' cham tu' pu kai' nkam bha jii na n ya'   ji dai g 'kam ba n chaat ka', na n moo pix chu' ja titdada' bi x na ji'k ja'tkam nam mi' pui' jimia' na n jax ilhii' ndha'. Gu' ja'pji na n jix ja joi'gi'n na  ich ba' bhai' ma jii na n ba' ya' maaxik ji n k isa' nam boi n bhiichdha', na ba' tu namkix ka' gu ja ua'tulhdhara' bui or gu n Gi'kora'.

Gu Jesuus na ba dua' ndha' maa'n gu cham  ia kam Bartimeo ti igim

(Mt. 20:29-34; Lk. 18:35-43)

46 Ba' bhammi ba ai mit na pai'r kikcham Jerikoo ti ti igim, alhiom bhai' xi oipimik. Ba' ja'xpix nat gamai' ji jii gu Jesuus ja bi m gu noonbi' n gio jai' mui' gu ja'tkam, baasi'n ju' ndharan nam ba bubuakim, bha ja'p daakat tu taan gu tuumi n maa'n gu cham  ia kam Bartimeo ti igim. **47** Ba' nat ba maat na dhi' gu Jesuus Nasareet kam mu jim, g ' ki'n ba jii nak, jup kai'ch:

—Aapi' G 'kam Jesuus nap jir boxii' n gu Dabii, iam jap xi n dhua' ndhai no'p moo xi n joi'gi'nda' git.

48 Ba' pix am bhaak jamit gu ja'tkam bui or, jup titda am na sap cham  iookat daaka'. Gu' ji nat gu' gui'x io'm ba xi jii na g ' ki'n mu jii nak, jup kai'ch:

—Aapi' nap jir boxii'ñ gu Dabii, iam jap xiñ dhua'ñdhai no'p moo xiñ joi'gi'nda' git.

⁴⁹ Ba' mi' pup kiīk gu Jesuus nat kai na mu pai' dhir bha jiiñkai'ñ gu jaroi', ba' mijí xi chu joot nam bai'ñxi'ñpu'. Ba' mui'p ma boop jamit gu ja'tkam, jup titda am mu øek:

—Cha'p jax kam aa'nda'ñ jaduuñ. Bha tum joochxi gu Gø'kam nap jaroi' jiiñkai'ñ. Xib jach jum nobchii mum aichdha'.

⁵⁰ Ba' gui' jotmoda' nat jax jum tii'bho', mi ja'p xi buak gu sa'ua'n kikbuk ga'm pix chu'm duu ja biim gui' nam bha nobchichu'. Bhai' mit ba aich nat pai' dhir mu tu joochxi gu Jesuus, ⁵¹ ba' xi chikka gu Jesuus, jup titda:

—¿Tu'ni aam duuk jiñ jaduuñ nap ba' bhañ jiiñkai'ñ?

Ba' gui'p kai'ch:

—Dho nañ ja'p tii ilhdhat no'p moo pui'p ilhii'ñdha' git nap iam xiñ dhua'ñdhai git nañ cham ñia.

⁵² Ba'p titda gu Jesuus:

—Bax kii' ap ji matgam, nap gu' aañ jiñ bui bax biiñak. Cha'p jax kam aa'nda'.

Ba' dai nat pui' ji' xi chii'n, bhai' ji chi tii' gui' na cham ñia kat, jix kii' dho gu'p jum duu. Mi' dhir ba' dai nat ba oi bhammi ja'k nat pai' ba jii gu Jesuus ja biim gu jai'.

11

*Gu Jesuus na Jerusaleen ja'k ba aaya'
(Mt. 21:1-11; Lk. 19:28-40; Jn. 12:12-19)*

¹ Ba' bhammi ba ai mit na pai' Betpajee ti tii', bhai' na pai' ja'p iam Betaania ti tii' ip, sonpan

maa'n gu oidha' nam Oliibus ki'n jix chu mat ka',
nam ba' pīk moo ba aaya' Jerusaleen. Ba' bīipī' mij̄i
xi ja joot gu Jesuus gook gu noonbi'ñ, ²jup ja titda:

—Aañ ja'p tii kai'chit jiñ jaaduñ na pim
mu Jimia' muni na pai'r kikcham na pim jiñ
chīimilhdhapu' maa'n gu jigiarum bhuru'x na
chakuir jum ulhisdam. Mi' moo bulhka' na pim
jax ya' dir mu aajidha', dai na pim jax bulhio'kai
bha tīimirika!. ³No' moo jaroi' ba jam tikka, no'
jax jam titda: “¿Jax japim ba' duñia' dhi bhuru'x ku
pimit ba' gamai' ba ji chīimirak?”, ja'p japim tīida':
“Bhach joot gu Ḡe'kam. Tu' chi na mi bhiñora!. Ku
gu' sap gio ya'p aichdha' ji ja'xñi.”

⁴Ba' gui' mui' ma jii mit, pui' dho ji buus. Nam
jax kia'pix mu aajim, mi' bulh maa'n gu bhuru'x
mia'n ki'ñgob maa'n gu ba'aak. Ba' na mit jax
bulhio', ga'mpix chu' dooda mit. ⁵Ba' jai' dhit nam
ja nii'ñ, ba ja tikka am, jup ja titda am:

—¿Jax japim ba' duñia' dhi bhuru'x ku pimit ba'
gamai' ba ji chīimirak cham ji aa'ñdhak gui' nar
jaroi' ga'n?

⁶Ba' gui' dai na mit pui' xi ja tīidak nat jax mu
ja tīin gu Jesuus nam tī'ya', ba' pui' cham ka ja
tikka mit. ⁷Ba' mummu ba aichulh jamit. Ba'
pui' bhai' bax dhaibum kat gu Jesuus, gu' ji na gu'
gu noonbi'ñ siamri bhai' xi bakxi mit gu te'tep ja
kuktun, gui' nam daam dir ja tī'chu'nda', nat ba'
bhai' xi dhaibuk gamai' ji jii. ⁸Ba' gu ja'tkam tugi'ñ
bīipī' dir boopok mi' ba tu iabu mit gu jaaja' na pai'
jax bhiichu'. Ba' gu jai' mui' ja'tkam na mit ji ja
tīigik, pup xiim mi chu iabu mit ip tu o'msak gu
jaaja', jai' gu te'tep ja kuktun. ⁹Ba' jai' bīipī' jii mit
jai' gatuuk dir pix jiiñak bīit am, jup kai'chim am:

—;Taxchaab ba' guch Gi'kora' nat bhai' bach
joochxi nach jaroi' niirat! ¹⁰ ;Taxchaab ba' guch
Gi'kora' gui' nax dhaam yup tu'ii'! Na gu' dhi'r
di' nat ya' ba ai nat bha joot, dhi' ya' bar ge'kam
ka' ja'p na jax gu Dabii. Iam git ba' moo gammiji
bhaan ti nii'ñdha' guch Gi'kora'!

¹¹ Ba' bhai' ba ai gu Jesuus Jerusaleen. Jimdat
mijiimmi ji baa ge' chiop, alhio miji ja'p xi oilhimik
biix xikoolh na ti niidhim na tu' jax jum bua. Mi'
dhir ba' dai nat ba jii Betaania ja'k ja biim gu
mambhiix daman gook gu noonbi'ñ, nat gu' pu ba
jur.

Gu Jesuus na ba ñiokdha' maa'n gu iigix
(Mt. 21:18-19)

¹² Ba' buimgidhak na mit ba jii mi' dhir Betaania,
Jerusaleen ja'k ip gio, chi gu' am jix bhiogim tu
tatda' gu Jesuus. ¹³ Ba' na nai' gan xi chi niidhim,
ba tii na mu ja'p pix kiik maa'n gu iigix joidham
xiboorak jix jaagam, jix iibhaidha' kam tu'ii'. Ba'
mui' ma jii gu Jesuus nat tiigim, gu' ji na gu' pu
nim maa'n ku bha dhaa na bha ja'p tii xi ñinii'ñ,
bak gu' jan'o pik cham yup iibhai'ch. ¹⁴ Ba'p titda
ja kaixdhat gu noonbi'ñ:

—;Alh jap moo cham ji'xkat ka iibhai'ñcha' xib
dir ja'p ja'k!

*Gu Jesuus na biix ja'k jootsa' bhai' dhir ge' chiop
gui' nam mi' tu ga'rada'*

(Mt. 21:12-17; Lk. 19:45-48; Jn. 2:13-22)

¹⁵ Ba' gatuuk na mit pai' dhuuk bhammi ba ai
Jerusaleen, miji ji baakik gu Jesuus irban dir gu
ge' chiop, biix ja'k ja joot mu ja'p diirap gui' nam
bhai' ka tu ga'rat gu bixchu', gio gui' nam bhai'

tu saba'n. Gio ba' gui' nam bhai' ja pataaxi'ñ gu tuumiñ gu ja'tkam, ja ia'lhxichulh gu ja memees. Gio ba' gui' nam bhai' ka tu ga'ra gu giokda', pu biix yup ja ia'lhxichulh gu ja a'toxkar, mijí ja'p pix ja'x tu da'nsa. ¹⁶ Gio nat cham ka ja do'ñcho na jaroi' bixchu' tu ua'dat mu ja'k jimda' irban dir gu gø' chiop, ¹⁷ dai na tu ja a'gi'ñ mi oirit, yup ja titda:

—¿Jax ku pim ba' ya' pu tu bua? Na pim gu'x maat gu ñio'ki'ñ gu Dios na mi' tu ua'ñix u'uan ta'm nap jum kai'ch: “Dhi' dhi chiop nat mi' bam kii, mi' dhír jix bhaai' nam bha tuñ a'gi'ñdha' soi'm ilhdhat biix na ji'k ja'tkam, sia nam jir pa ja'k kam.” Ja'pni bo nam kai'ch, ¿cham maat japim? Aapi'm gu' ya ja'p tu duuk na pai' chiob nam jum jumpa'n gu i'xkum.

¹⁸ Ba' giilhim bhaak jamit gui' nam sap jix mat ka' gu ñio'ki'ñ gu Dios gio gu ja gø'gørkam tuk gui' nam jai' ja palhbui'ñdha' gu Israel kam ja'tkam nam tu daanda' buiñor gu Dios. Maap jim daagik ma chu a'ga mit nam jax dhuuji tu chiñia' nam mu'aa', nam gu'x iibhidhat jix jiigam, na gu' joidham jix bhai' xi bua na xi chu a'ga. Mi' pix pui' ba tu'ii' am na ji'k ja'tkam, ¹⁹ gu' ji na gu' ja'xpix nat pai' dhuuk ba tuk, pu jii gu Jesuus mi' dhír gø' kiicham.

Na ba gakia' gu iigix gui' nat bøipi' dir ñiok gu Jesuus

(Mt. 21:20-22)

²⁰ Ba' buimgidhak jix dha'npam ji chu maaxirik gio mui'p ba jiim am Jerusaleen ja'k. Ba tii mit nax gak mi kiik gu iigix na joidham jix chiiđu' mi' ka kiikat takaab dir, biix chakaa'n jix gak. ²¹ Ba' ba

ti'ñchu gu Peegro nat bak pín ñiok gu Jesuus, ba'p titda:

—Kagit jiñ jaduuñ nat ba gaa dhi iigix na pich ñiok takaab. Attiiru dho moox gak sia gu takaa'n.

22 Ba'p ja titda gu Jesuus:

—Dho pu'ñi ku pim jix io'm mui' xim biiñkada' buiñor gu Dios. **23** Tu' silihkam ki'n jañ ya' pu jam tiida', no' jaroi' jax titda dhi oidha': "Ja'k jim ya' dir, mup Jimia' na pai' ge' suu'n gu suudai!", no' moo ja'p tu' silihkam jix biiñak biix juraa'n ki'n, no' moo piñ pum aa' nar pui' ka' na jax ti'ya', pui' dho ji chu buusnia', kux ba' cham ip. **24** Aañ moo jam aagi'ñ no' pim tu' ya' dir mu taan guñ Gi'kora' jix dhaam ja'k soi'm ilhdhat, no' pim moo piñ pum aa' nar pui' ka' na pim jax tiida', pui' dho ji buusnia'. **25** Ba' na pim pai' dhuuk tu a'gada' jix dhaam ja'k buiñor guñ Gi'kora', no' pim ampik ti'ñchu na pim jix bhaamut nii'ñ gu jaroi', cha'pim bhaamut ka ti'ñchuka', tu uañi'ñka' pim piñ na ba' guñ Gi'kora' pui'p tu jam uañi'ñka' gu jam ua'tulhdhara!. **26** Na gu' no' pim aapi'm daix bhaamut niidhat ti'ñchu gu jaroi', no' pim cham tu uañi'ñ, guñ Gi'kora' nax dhaam yup tu'ii' pui' cham yup tu jam uañi'ñka' gu jam ua'tulhdhara'!

*Nam ba tikka' gu Jesuus na jax jir jum duukam
nat ba' pui' tu dooda mi' ge' chiop*

(Mt. 21:23-27; Lk. 20:1-8)

27 Ba' gio mi'p ba ai mit Jerusaleen. Ba' na mijí ja'p ka oiri gu Jesuus ge' chiop, mi' ba ai mit gu ja ge'gerkam tuk gui' nam jai' ja palhbui'ñdha' gu Israel kam ja'tkam nam tu daanda' buiñor gu Dios, gio ba' gui' nam sap jix mat ka' gu ñio'ki'ñ gu Dios,

gio jai' gui' nam jir ja gø'gørkam tuk ka' gu Israel kam ja'tkam. Ba' mi ja'p soo'mdhak ²⁸ba tikka am, jup titda am:

—¿Jax jap ba' kai'ñkam ya' pu tu bua? ¿Jaroom chianik bham joot nap ya' pu tu dooda' nap jax ilhii'ñ?

²⁹ Ba'p ja titda gu Jesuus:

—Dho bak aañ maa'n jup jam tikka' gu tu'x buadom na jax jir jum duukam, no' pim moox maat na pim jiñ aagi'ñdha' nañ ba' aañ jup jam aagi'ñdha'. ³⁰ ¿Jaroo bha jootsak gu Juan nat ja bopko gu ja'tkam? ¿Dios aa, ka' diilh aa mit chia gu ja'tkam? Ea gor xiñ aagi'ñ.

³¹ Ba' dai na mit ba jim ti tikka diilh, jup kai'ch am:

—¿Jax ja'k jach tiida'? Na gu' no'ch jax titda nat Dios bha joot, pui' ji chi'ya': “¿Gi jax ji na pimit ba' cham ti jiñ na jax tii tu jam a'gidhimik?” ³² Cham dho bhai' jia no' chich pui' ja'k tii'n. Na gu' no'ch jax jup titda na mit diilh chia gu ja'tkam, pui' cham jup jir am.

Cham aa' am nam tu aaga', nam gu'x bhai'x maat nam mui' ja'tkam ti jiñgi'ñ na gu Juan bhaankam tu a'gimik gu Dios. ³³ Mi' pui' cham ka bhai' nam jax ti'ya', dai na mit jup xi chiidak gu Jesuus:

—Cham ji nach maat nat jaroi' bha joot gu Juan.

Ba'p ja titda gu Jesuus:

—Dho bak gu' aañ pui' cham jup jam aagi'ñdha' nat jaroi' bhañ joot.

12

*Gu Jesuus na tu a'ga' bhaan ji ua'rgidhai gu
tujuandam nam buam pix tu dooda'
(Mt. 21:33-46; Lk. 20:9-19)*

¹ Mi' dhir ba' gio bhai'p ji chu ja a'gi gu Jesuus bhaan ji ua'rgidhak maa'n gu i'xchadam, jup ja titda:

—Maa'n gu maa'nkam tu darsak gu uubas, gio ba' nat tu kuu mi' nat ji'x juugit tu darai. Mi' dhir ba' moop ti kii'mpi na pai'x bhaai'n ka' nam ba kii'ñdha', gio ba' nat mi kii maa'n gu t̄eb bhi'ñbak na ba' bhai' dhir bhaan nai' ti nii'ñdha' na tu nuuka'nda'. Gu' ji na gu' moo ampik jup bar jimdam mik ja'k, ba' mi' xi ja do'ñchok ji'kchi gu ja'tkam nam mi' ka tu juanda', pu jii ba'.

² 'Ba' nat pai' dhuuk ba bhai gu uubas, mui' ti joot maa'n gu tujuandam tugi'ñ mi' nat pai' ka xi ja do'ñchok gu jai' tujuandam tugi'ñ, na sap mu ua'ra' gui' na ji'k bhaan bipio'. ³ Gu' ji na gu' nat jax mi' ai, dai na mit bhai' ji dhaa gui' nam mi' tu juan, gibichpagak pui' mij'i xi joot jamit ip gio. ⁴ Jumai ba' mui'p joot. Dho gi ba' joodai ki'n ma'yasa mit ji, giilhim ko'ktolh jamit gu ma'oo'n, gio nam biix aixim titdaimik nam jax ilhii'ñ, pui' mit mij'i xi joot. ⁵ Ba' jumai mui' tiip joot. Dho gi ba' pu mua mit ji. Jai' ba' mui' tiip ja joot gatuuk. Pui' mit jup ja dooda, jai' mit ja ko'ktolh pix, jai' mit pu ja koi.

⁶ 'Ba' mikkat na cham jaroi' ka jai'ch na mu jootsa', dai gu maraa'n pix ba bii gui' nax io'm jix dha'da', pui' mui'p ma joot jup xi chi'iiik: "Dhi' dho gi gu' jii'ñdha' am ji, nam gu'x maat na aañ jir jiñ mar." ⁷ Gu' ji na gu' nat pai' dhuuk ti mi' ba ai, jup kai'ch am diihl jix dhu'npi'ñ ki'n gu tujuandam:

“Dhi' moo bhaan ji chu bi'ya' biix gu tu' na ji'k ya'x chu jai'ch no't ba muu gu taata'n. Jir am nach mu'aa', kapbhai' nat dìlh ya' ka ai na ba' aach jich a'm ji chu bi'ya'.” ⁸ Ba' pui' xi chi'ik bhai' ji dhaa mit, pu mua mit dho, baas dir ja'p koraar bìibhi' mit xi buak.

⁹ Ba' nat pai' xi chìimuk na pu'ñi xi chu ja a'gidhimik gu Jesuus, ba' moop xi ja tìkka, jup ja titda:

—¿Jax japim ba' ilhii'ñ na ja dooda' gu kiokam? ¿Cham aa na mi' øøji pui'p ja kooda', jai' ba' mi ja iabu' gu tujuandam? ¹⁰ ¿Kux cham tu jiñkai'ñdha' pim aa gu ñio'ki'ñ gu Dios mi u'uan ta'm? Nap jum kai'ch:

Gu' jodai na mit tii mai' xi buak gu bìibhi'ñbakchadam,
xib dhi' pik bhaan jix oo' biix gu jai'.

¹¹ Ba'x bhai'ch chaat ich nat pui' ji' tu duu guch Gi'kora'.

¹² Ba' tìix dhaagik am gu Jesuus gu ge'gérkam jum aa'ndam, nam gu'x maat na dhi' ja aagit jup kai'ch nat tu a'ga bhaan ji ua'rgidhak gu i'xchadam. Gu' ji nam gu'x ja iibhi'ñ gu mui' ja'tkam, pui' cham juan am, dai na mit ma jii pix.

Gu Jesuus na pu ja tiida' gu pariseos nar am nam gook kap tu namki'ñdha'

(Mt. 22:15-22; Lk. 20:20-26)

¹³ Ba' mikkat gu ge'gérkam jum aa'ndam mu joochxi mit gu Jesuus ji'kchi gui' nam pariseos jum tiiti'nda' gio ji'kchi ip gu Eroodis gu ja'tkam tugil'ñ nam sap tìkkapu', sap ba' no't moo jax ji chii na cham jir am gu tu' nam tìkka', bax bhaai'n ka' nam jax dhuuji iattulhdha'. ¹⁴ Ba' mu øøk jup titda am:

—Aach bhai' ma jiich jaduuñ nap jich aagi'ñdha' no'r am nach aach jax ilhii'ñ, nach gu'x maat nap aap silhkam jup kai'chdha' nap pai' dhuuk tu a'gada', gio nap cham jax ti ilhii'ñ sia kum giilhim jum a'ga, nap gu' bhaankam tu a'ga na jax jix aa' gu Dios, cham tu' nam jax ja'k ilhii'ñ gu ja'tkam. Tii' nap gu' moo cham jaroi' iibhi'ñ, sia ku tiir gø'kam. Ba' ja'p tu'm jachich bham tikkam: ¿Jir am aa nach namki'ñdha' gux io'm gø'kam Rooma kam Seesar tiigim gui' na ji'k aagix nach tu namki'ñdha', ka' cham aa? Dhi' pix ki'n jachich moo bhai' xi jii, no'r am nach namki'ñdha' piam ku gu' cham.

15 Gu' ji na gu'x bhai'x maat gu Jesuus nam cham mi' pui' jiimchu' nam jax tu ja a'gi'ñdha' gu ja'tkam. Ba'p ja titda:

—¿Jax ku ba' ja'p moo jam ko'raar aapi'm na pim iatda'? Ea gor maa'n bhiibup gu tuumiñ nañ xi chigia' na jax jir tu'm da'.

16 Ba' maa'n bhii'ñpuk mi' xi maa mit. Ba' mi' xi chiigik jup ja titda:

—¿Jaroo da' dhi' na ya' jupñix?

Ba' gui'p kai'ch am:

—Dho gu Seesar gux io'm gø'kam Rooma kam.

Ba'p ja titda ip gio:

—Dhi' gi na ya' tu ua'ñix, ¿jax jum kai'ch?

Ba' gui'p kai'ch am ip gio:

—Dho dhi' na jax chii'.

17 Ba'p ja titda:

—Dho pim xi maakidhat ku gi gu Seesar na pui'r jam gø'kam tuk na ji'k bhaan bipio'da', gio gu Dios japim jup xi maakidhat na ji'k bhaan jup bipio'da'.

Ba' mi' pui' pup tu'ii' am nat pui' ji' xi ja tii'n, na gu' joidham jix bhai' xi bua na xi chu a'ga. Cham jaroi' pui' kęekęt am.

*Nam ba tikka' gu Jesuus gui' nam cham ti
jiig'iñdha' no'm gio mu pai'p ba oipoda' gui' na ba
ja'bsuñia' gu ja tutku'*

(Mt. 22:23-33; Lk. 20:27-40)

¹⁸ Ba' moo mi'p ba ai mit ji'kchi gui' nam saduseos jum tiiti'nda', nam cham ti jiig'iñdha' no'r silhkam nam gio mu pai'p ba oipoda' gui' na ba ja'bsuñia' gu ja tutku'. Ba' bhai' ji chu a'gi mit gu Jesuus, jup titda am:

¹⁹ —Aach bhai' ma jiich jaduuñ na chich bham tikkam ja'p tu'm na cham jir jich jujur. Nach gu' aach mi' pui' tu daa'ñchu' nat jax tu ua'nak gu Moisees na sap no't maa'n ba muu gu maa'nkam, no't diilh mi' ji bii gu binga'n, no' cham maa'n bhaan tu mar kat, jix bhai' na bhai' ji bhiiya' gu s̄ipdhi'ñ na mia'n oi'ñdha' na ba' bhaan ba tu mar ka', na ba' ja'p ji buusnia' nar di' ka' gu xio'gi'ñ na mukia'. ²⁰ Gu' ji nam gu' moo ja'pnip tu a'gada' gu ja'tkam, sap mu pai' oi'ñkat am xijum gook gu ja'tkam daim s̄ispidhim. Sap ba' tii ba ti biiña' kat gui' nar biipi' kam, gu' ji nat gu' sap am xi muu, pu cham sap maa'n bhaan tu mar kat gu ubii. ²¹ Sap ba' gu s̄ipdhi'ñ na mia'n oi'ñ ip gui' nat ba muu, tiix bhai' ba tiidak ip gu nuuchixi'ñ, gu' ji nat gu' sap pui' am jup xi muu, pui' sap cham maa'n jup tiigik jamit gu alhii. Gio gu ti'irab kam sap mij'i dir tiip jimii, bhai' sap tiix bhai'p ji chii'n, pui' sap pix jup jum duu. ²² Biix sap pu koi mit gu xijum gook tii pik bhibhiimik, pu cham dho sap moo maadir bhaan

tiigik gu alhii. Mikkat sap pui' am yup xi muu gu ubii. ²³ ¿Gu' ba' jax chu'm pik gio bhai'p ji bhiiya' jan'o nam saak pai' dhuuk gio mu pai'p ba oipoda', sia kut tii bam ja'bsu gu ja tutku'? Jaiñ nam gu' pui'r xijum gook ja'tkam kat.

²⁴ Ba'p ja titda gu Jesuus:

—¿Jix maat japim aa na pim pai' jax chu't yup kai'ch? ¿Kux gu' ilhii'ñ japim aa na pui' kai'ñkam yup jum kai'ch gu ñio'ki'ñ gu Dios mi' na pai' tu ua'ñix? Cham tu'r pui' ip ji siamri. Gu' matgam gu Dios tu' na pix jix aichu'n ji, gu' ji na pim gu' aapi'm cham maat. ²⁵ Na gu' gui' nat ji'k bam ja'bsu gu ja tutku', cham tu' bhaan ka titii'ñchuka' am gu pui' ja'k jan'o nam pai' dhuuk gio maakam ja'k yup ba oipoda', nam pai' chakui tu mat ka' gu xib. Nam gu' ja'p ji buusanda' na jax gu noonbi'ñ gu Dios nam bhammi'p tu'ii' jix dhaam, cham tu' nam yup kax aa'nda' nam ti bipna' ka' na jax ya' maaxik. ²⁶ Gu' dhi' na pim jax ja'k tii xi ilhii'ñ na pim cham ti jii'gi'ñ nam maakam ja'k ba oipoda', cham tu'r pui' ji, na gu' diihl pix na pim pui'm aa', cham pai' pui' tu ua'ñix. ¿Kux cham ji'xkat tu jii'kai'ñ japim aa mi u'uan ta'm nat pai' tu ua'na gu Moisees jan'o nat pai' dhuuk bha ñio'kdhak gu Dios? Nap titda bhaan jim ua'rgidhak gux bii u'ux: "Aañ jir di' pix gu Dios nam jax jiñ bui bax biiñak gu jam bopxi kat Abraam, gio gu Isaak, gio ba' gu Jakob." Ja'pni bo nam kai'ch, ¿moo cham yup ti'ñchu pim? ²⁷ Ja'p jum aa' pim na cham tu' bhaan ka ti niiidhidha' gu Dios gu ja'tkam no't bam ja'bsu gu ja tutku'. Matgam jir maa'n ji na jax ja a'm ti niiidhidha', na gu' pui' nam jax buiñor bax biiñaktu'nda' na jax maaxik nam ya' oipoda'. Ja'p dho moo cham maat japim

na pim pai' jax chu't yup kai'ch, ni palhiip ku iam
jir pui' na pim jax tii xi ilhii'ñ.

*Gu Jesuus na ba tu aa'nda' na jax ja'kjix io'm jum
aa' nam tui'ñgida' gu ja'tkam
(Mt. 22:34-40)*

28 Ba' maa'n gui' na sap jix mat ka' gu ñio'ki'ñ gu
Dios mi ja'p kiikat yup te' këe'nam jax kai'ch, ba'
joidham kai pui' na jax ja'k tu a'ga gu Jesuus. Ba'x
io'm mia'n xi kikbuk xi chikka, yup titda:

—¿Jax ba' tu'm pik jix io'm jum aa' nañ mi' pui'
jimda' na jax jix aa' guch Gi'kora' na jax tu ua'ñix
mi u'uan ta'm?

29 Ba'p titda gu Jesuus:

—¿Na jax chu'm jix io'm jum aa' aa na ji'k mi' tu
ua'ñix? Gui' dho na ja'pnim kai'ch: "Gor xi chi kai
Israel kam ja'tkam, maa'n pix jix jai'ch gu Dios nax
io'm jir ge'kam. **30** Tu daanda' pim biix jam jujur
ki'n jix dhaam ja'k na pai'p tu'ii', gio biix na ji'x jam
i'ii'mda' ki'n. Dai gui' pim pix ti'ñchuka' gammiji,
mui' pim xim biinkaza' na pim ji'x pup jum taat."
Dhi' ja'pni moo biipi' kat jum aa' nam tui'ñgida'
gu ja'tkam. **31** Gio ba' gu jumai na iampix pui'
ja'k yup tu ua'ñix nap jum kai'ch: "Moo pim xim
ga'ngada' na tu' ja a'm jum aa'nda' gu jai', panaas
ku moo aapi'm jam a'm jum aa'nda!." Ja'pni ja'k
jum kai'ch. Dhi' ji' dhi gook na jax jum kai'ch moox
io'm jum aa', sia pik jax ka' git.

32 Ba'p kai'ch gui' na sap jix mat ka' gu ñio'ki'ñ
gu Dios:

—Umri moor pui' nap jax kai'ch jiñ jaduuñ na
maa'n pix jix jai'ch gu Dios nax io'm jir ge'kam,
cham tu' jumaip jix jai'ch. **33** Jir am dho nach

tu daanda' biix jich jujur ki'n na ji'k ja'tkam jix dhaam ja'k, gio biix na ji'x jich i'ii'mda' ki'n. Dai gui'ch pix ti'ñchuka' gammiji, gio nach mui' xich biiñkada' nach ji'x pup jich chaat. Gio nach xich ga'ngada' na tu' ja a'm jum aa'nda' gu jai', panaas ku moo aach jich a'm jum aa'nda'. Moo dho gu'x io'm jix bhai' ji busaak gu pui' ja'k, gui' bak gu' cham pik tu' bhai' ji nañ mu pai' tu makgirtat ti tikkada'.

³⁴ Ba' gu Jesuus na gu'x maat na iampix mi' pui' jimchu' na jax tu ua'ñix, ba' mui' xi guguux, jup titda:

—Alhi'ch pix bam aagít jiñ jaduuñ nap buiñor bap tui'ka' gu Dios na ba' gammiji jum a'm ba ti niññdha'.

Mi' pui' cham jaroi' tu' ka tikka'n, nam gu' bax xi'irgi'ñ, na gu'x io'm jix matda' na jax ja'k ti'ya'.

Gu Jesuus na ba ja tikka' gu gø'gørkam jum aa'ndam

(Mt. 22:41-46; Lk. 20:41-44)

³⁵ Ba' gio bhai'p ji chu ja a'gi gu Jesuus gu ja'tkam pu mi' pui' irban dir gu gø' chiop, xi ja tikka'n na sap jax jir jum duukam na ba' pui' Dabii jir boxi'ñ. Jup ja titda:

—¿Jax kum ba'p kai'chdha' gui' nam sap jix mat ka' gu ñio'ki'ñ gu Dios na guch Xoi'kam Dabii jir boxi'ñ? ³⁶ ¿Gu' jax ku ba' gu Dabii pui'p kai'ch nax io'm jir gø'kam guch Xoi'kam? Ja'pni bo nat tu ua'na jano' nat pai' dhuuk pui' ja'k jurtuda gux Dhuudu' kam jix Uañ Ii'mda', nap jum kai'ch:

Jup titda gu Dios guñ Gø'kam tuk gui' nar jich Xoi'kam:

“Ya'niñ xanoop jap xi dhaibu' nañ aañ ka xi ja tulhiiñchuda' gui' nam xim bhaamki'ñ nam ba' soi'm ilhdha' aap jum bui.”

37 ¿Gu' jax jam ba' duukat pui' ja'k iimchu'n na pui'r boxii'ñ, na ba' gu' gu Dabii jup kai'ch nar Gę'kam tugl'ñ guch Xoi'kam?

Alh iam tiix xi'ir am gui' nam mi' gę'gęrkam jum taat, nam gu' jano' mui' ja'tkam mi'p tu'ii' nam kę' na joidham tu a'ga gu Jesuus. Ba' pu cham ka bhaai' nam jax tiida'.

*Gu Jesuus na ba tu aa'nda' nam jax ja'k tu jim gui'
nam sap jix mat ka' gu ñio'ki'ñ gu Dios
(Mt. 23:1-36; Lk. 11:37-54; 20:45-47)*

38 Mi' dhır ba' maakam bhai'p ji chu ja a'gi gu Jesuus, jup ja tiitda:

—Moo pim cham ja kękeędat gui' nam sap jix mat ka' gu ñio'ki'ñ gu Dios, na gu' ja'p moo ja ko'raarda' bo nam nai' jiimda' tę'tęb ji chim tiil'dhat nam sap ba' gę'gęrkam ja ilhiiñdha' gu ja'tkam. Gio nam jix aa'nda' nam tu' ka'm ja niiñdha', jum aa'nda' sap na xi kuanai gu bonma'n na ja ñio'kdha' gu jaroi' mu ja'p nam jax jiimda'.

39 Gio nam jix joi'ñdha' nam ja'xbui' pui'p xim taat ka' na jax gu gę'gęrkam jum aa'ndam. Jai' mijimmip xi dharka' am nam pai' darka' mu ja'p nam pai' jax tu daanda' gu Israel kam ja'tkam, piäm pai' nam jax tu piastatda'. **40** Gio ba' nam jix joi'ñ nam ja iatgidhat ja boosgi'ñdha' gu ja bixchu' gu u'uub di'dilhdhim. Mi' dhır ba' mık tu ñiokidha' am nam pai' dhuuk ba ji chu nokia', na ba' jax dhui cham maati' ka' nam tu' jax buada'. Ku gu' dhi'

kam tulhiiñä' am ji ja'p jix io'm janö' na pa'i dhuuk
tum kuugalhdha' nam ba' mi' xi aaya'.

*Gu ubii na cham jir jix chumñigam na mi chu'aa'
gu tuumiñ chiop
(Lk. 21:1-4)*

⁴¹ Ba' ja'xpix mijí daakat gø' chiop jup ba ja nii'ñ
gu Jesuus gu ja'tkam nam pix mi' ji chu'aim gu
tuumiñ na pa'i'm tua'ba. Jai' moo mui' mi chu'aim
am, nam gu'r jix chutumiñigam. ⁴² Ba' moo mi'p ba
ai maa'n gu ubii na cham jir tu bia'kam ka' gio nat
muu gu binga'n, ba' mi'p xi chua gook gu tuumiñ
na cham pik tu' bhaigim tu'ii'. ⁴³ Ba' gu Jesuus
maap xi ja jumpadak gu noonbi'ñ, jup ja titda:

—Tu' silhkam ki'n jañ ya' pu jam tiida', dhi ubii
na cham jir jix chumñigam nat gook pix mi chua gu
tuumiñ, ja'p ji buusan nat jix io'm mui' mi chua,
nat gu' soi'm ilhdhak mi chua. Gu' ba' gu jai' na
mit panaas mui' mi' tii xi chua, pur cham tu', ⁴⁴ na
gu' gui' na ji'k cham ja a'm kam aa' nam ba' mi
chu'aim. Gu' gu ubii biix mi' pu tua na ji'k ua'dat,
sia ku gu' daipu' bia'kat na ki'n ka tu saba'da' git.

13

*Gu Jesuus na ba tu aa'nda' nam iara' gu gø' chiop
(Mt. 24:1-2; Lk. 21:5-6)*

¹ Ba' ja'xpix nat ba buus gu Jesuus mijí dir gø'
chiop, jup titda maadit gu nobii'ñ:

—Kagit na jax joidham tu'm dhi bhi'ñbak jiñ
jaduuñ! Jupaaban sobkoñxim gu joodai bha
bhi'ñbakchix.

² Ba'p titda gu Jesuus:

—Ya' dho pui' ka tu'ii' gu xib nap nii'ñ. Ku gu' dhi' kam aaya' ji na pai' dhuuk jum iara', pu cham pai' maa'n kap tukdhixim bi'ya' gu joodai.

*Gu Jesuus na ba tu aa'nda' na jax ja'k ba tum
buidha' na bar mia'n ka' nam tiimur' dhi o'iñga'n*
(Mt. 24:3-28; Lk. 21:7-24; 17:22-24)

³ Mi' dhir ba' pu jii mit amuub baasi'n dir ja'p oidha' ta'm nam Oliibus ki'n jix chu mat ka', na silh jix chu maax bhai' dhir gø' chiop. Ba' gu Jesuus bhammi tøsdik mi ja'p ji dhaibu. Ba' gu Peegro gio gu Jakoobo gio gu Juan gio ba' gu Anrees, mui' ji ai mit mu na pai' daa, ba' ba tikka am jix dhu'npi'ñ ki'n, ⁴jup titda am:

—Aach ja'p tu'm tiix maachim jich jaduuñ no'p moo cham jax ji chi'jich aagi'ñdha' git. ¿Paa ba' duuk pui'm iara' saak gu'ñi gø' chiop nap jax ba kai'ch biipi'? ¿Jax ja'k ba tum buidha' na bhaan jix maati' ka' na bar mia'n nam iara'?

⁵ Ba'p ja titda gu Jesuus:

—Dho dai na pim ti niidhat oipoda' na cham jaroi' jam iatgidha!. ⁶Nam gu' mui' ya' aaya' nam pui' ja titdaidha' gu ja'tkam nam aañ jir gui' ka', jup kai'chidha' am: "Aañ jir di' guch Xoi'kam." Ba' giilhim mui' ja iatgidha' am.

⁷'Gu' no' moo bar mia'n, pui' ba ti kaaya' pim ji na jigialhcha' mi' pai' na pim jup tui'ka' piam maakam ja'k. Ku ba' gu' aapi'm cham jax jum aa'nda' ji, na gu' dhi' pui' ji chu buusnia' sia pik jax ka' git, giilhim jix buam tum buidha', ku gu' chakuir dhi' ka' ji na pai' dhuuk pik tum kuugal-hdha'. ⁸Biix aixim ka xi chum duña' ji matgam. Bhai' ji bhaaku' am gu ja'tkam gø'gø'r kikcham dir

ja bui gu jai' na pui'p jir g 'g r kikcham ka', jum kokda' am, jum mama'yasa' am. Gio na jo ia' dhi oi' ng 'n mui' kap, gio ba' na bhiogi' jimia'. Ku gu' dhi' na bhaan pi  ba pup xi chum tulhii ndha' ji, na bhaan jix maati' ka' na ba tum kuugalhdhidha'.

Gu Jesuuus nap kai'ch nam ja o'bhai' ndha' gui' nam ji'k ti'j gi' ndha' bui or

9 Ja'pni ba' moop ja titda:

—Moo pim cham jum o'jolhdhat ti'ji gi' ndha' aa n ji n bui. Nam gu' jam da'ng i jam u'ji jam gi 'bia' gu tutpilh mu ja'p nam pai' jax tu chichiopi' ka'. Gio nam mu jam ui'ka' nam pai' darka' gux kakai' gio jai' ja bui gu g 'g rkam jum aa'ndam, mi'm ba' bhai' ji jam tikka' no'r silhkam na pim ti'ji gi' ndha' aa n ji n bui. **10** Ba' nam pai' bi x ka xi kaaya' na ji'k ja'tkam ya'dhi oi' ng 'n gux bhai'm kai'chdham  io'ki' n gu Dios na ba' pi  moo ba tum kuugalhdha'. **11** Ba' na pim pai' dhuuk mu suulhgia' nam pai' darka' gu g 'g rkam jum aa'ndam, cha'pim jax jum aa'nda' na panaas ku cham ka bhaai'n ka' na pim jax ti'ya', ni ku pim jax jum aa'nda': “Jax ja n ba' ja'k ti'ya' chi?” Matgam di lh pi  ya' dir ja'p ji buusnia' ji gu  i'ook, na gu' jam a'm yup tui' ngida' gux Dhuudu' kam jix Ua n Ii'mda'. Gui' pi  yup tu dui chu'nda', cham tu'aapi'm di lh, panaas ku gui' pi  tu a'gidha', na gu' jam maakidha' gu matda' na pai' dhuuk ba xi chum aagidha'. **12** Ja'p na pai' jigialhi' chir yup tum tui'ka' dho gu' panaas, na gu' bi x pi  jix chum bhaak ka' gui' nam ji'k cham ti'ji gi' ndha' aa n ji n bui. Di lh jum i'iattulhdha' am gu ja'tkam siam sispidhim, jai' gu ja maamar nam bhai' ji ja bhaamkidhai ja iattulhdha' no'm

ba ti jiig'iñ aañ jiñ bui, jai' gu ja tataat nam ja iattulhdha' nam ba'x bhai' ja bhiiya' gu gø'gørkam jum aa'ndam nam ja kooda' no'm xi ïlhii'ñ. ¹³ Biix na ji'k ja'tkam gui' nam cham tu' ka'm ti nii'ñdha', cham ja kaim ka' am gio nam cham ja niidham ka' gui' nam ji'k ba ti jiig'iñdha' aañ jiñ bui. Ku ba' gu' gu jaroi' na cham jím o'jolhdhat gammiji ti jiig'iñdha', cham jax bua ji sia mit ma mua, na gu'x dhaam ja'k bhiiya'.

*Gu Jesuus na bhaan tu a'ga' maa'n gu maa'nkam
na giilhim jir jix bhangim*

¹⁴ 'Ja'pni moop tum duñia' nat jax tu ua'nak gu Danial, gui' na bijik ya ja'p bhaankam tu a'gimik guñ Gi'kora', nap jum kai'ch na janø' na pai' dhuuk pik ba ji chum kuugalhdha', ya' ba aaya' maa'n gu maa'nkam giilhim jix bhangim, ii'bhidham tu buidha' nam ba tigia' gu ja'tkam. Bhai' baakii gø' chiop pu tu dooda' na jax ïhii'ñdha'. —Moo pim ti'ñchukat dhi'ñi na jax ya' tu ua'ñix, aapi'm na pim ji'k tu jiñkai'ñdha'—. Ba' aañ pu kai'ch na gui' nam ji'k ya ja'p mia'n yup tui'ka' janø', pui' na jax ya' dhi Judea, jir am nam ba ji boi'ñgia' mu ja'p pai' oi'dha' ta'm na ba' cham ja tulhiiñchuda'.

¹⁵ Piam no' jaroi' bhai' pai' ka daa ba'k dhaam, jir am na bhai' dhir timnii pu jimiiññolhia', cham tu' na mijip ka bapkida' ïrban dir na ba' tu' xi bhiiji. ¹⁶ Piam no' jaroi' mu pai' ka oiri ga'ran, jir am na mi' dhir pu jimiiññolhia', cham tu' na tu' jajannulhi'ñ jai'p ka xi chu ua'rai kia'mi'ñ na ba' pik ba jimiiññolhia'. ¹⁷ Ja'p moo joi'mdam tum duñia' ji janø', kux ba' gu' pui' aa! Nam gu' giilhim jum tulhiiña' gu u'uub gui' nam a'aalh ki'n cham

bhai'm taat ka', gio jai' nam i'lhich ka tu maamar ka' xio'dam. ¹⁸ Ba' aañ pu kai'ch na pim gammiji tu a'gada'x dhaam ja'k buiñor gu Dios na ba' cham jano' pik pui' tum duñia' na pai' dhuuk jix jiip'iñ ka'. ¹⁹ Na gu' jano' na pai' dhuuk pui' tum duñia', giilhim jir tulhiñara' ka' jix io'm, cham tu' pui' na mit jax jum tulhiñak gu jai' bijik, jano' nat dir jup duu gu Dios dhi oi'ñga'n. Gu' ja'pji jix io'm ji na ba' pik bar daipu' ka', cham ji'xkat pui' ka tum duñia' gatuuk, na gu' ba tum kuugalhdha'. ²⁰ Nat gu' pui' pu tii ip gu Dios na jano' na pai' dhuuk tum kuugalhdha', cham mìk jir tulhiñara' ka', na gu'x ja joi'gi'n gui' nam ji'k ba ti jiig'iñ buiñor, cham aa' nam mìk ya' oipot giilhim jum tulhiñdha'. No' gu' cham tu daasa' git na ji'x juugit jir tulhiñara' ka', biix jam dho pu ko'ya' git. ¿Jaroo gip jix ñakoo' na giilhim jum tulhiñdha'?

²¹ 'Ba' jano' na pai' dhuuk bar mia'n ka' na tum kuugalhdha', no' jaroi' jax jam titda: "Muni dhaa guch Xoi'kam. Maik gor jach kaipu'", piäm no' jax kai'ch: "Muni ba ai guch Xoi'kam", cha'pim jiig'iñdha'. ²² Nam gu' mui' jai'chdhilhia' gui' nam pui' xi kai'chidha': "Aañ jir di' guch Xoi'kam", gio jai' nam pui' xi kai'chidha' na maadit jir di' ka' gui' nam bijik ya ja'p bhaankam tu a'gimik guñ Gi'kora'. Pui'x bhai'p xi chu buidha' am gui' nax bhai'r jum duukam ka', nam jax dhui pix ja iatgidha' gu ja'tkam, sia gui' nam ji'k ti jiig'iñdha' aañ jiñ bui. No'm gu' cham pik biix ja jujur ki'n jix biiñak, jix bhai' ja bhiuya' dho gu'. ²³ Ba' aañ pu kai'ch na pim cham ja kekéedat, nam gu' tu iatgidhidha' pix. Mooñ ba jam aagi'ñ xib dir.

*Na jax ja'k tum duñia' na gio bhai'p jimda' guch
Xoi'kam
(Mt. 24:29-35, 42-44; Lk. 21:25-36)*

²⁴'Mi' dhîr ba' na xi chum tulhiiñai, dai na bhai' ji chum tukgamta'. Cham ji'xkat ka tonnia' ki'n gu tanoolh, ni na cham ji'xkat ka masbagia!. ²⁵Gio gu chiichia' nam bhai' ji ii'ñxia', na gu' giilhim jix io'm gi'ndukia' gux dhaam. ²⁶Ba' aañ nat bhañ joot guñ Gi'kora', bañ chigia' pim nañ bhijimmini dhîr bhai' ji buusnia' tibaa'ñ chir, nam ba' ba machia' biix na ji'k ja'tkam nañ aañ pui'p jir ge'l kam na jax guñ Gi'kora'. ²⁷Ba' nai' ja jootsa' iñ gu noonbi'ñ guñ Gi'kora' na ji'x jir oi'ñga'n, pui' na jax mumminini ja'p na pai' am ju'kam tu'ii' dhix dhaam, nam ba' ja jumpada' gu ja'tkam gui' nam ji'k ti jiigi'ñdha' aañ jiñ bui.

²⁸ '¿Cham ji'xkat niñ'ñ japim aa gu iigix na pai' dhuuk bhai' ji iipoñia', na joidham pix tiñ'ngilhidha' gu jaaga'n? Dhi' na bhaan jix maati' ka' no't ba ji chaa'm, na pai' dhuuk ba ji chu juuka!. ²⁹Ba' iam pix pu'ñip ji buusnia' dhi' pui' nañ ji'k jax ba kai'ch. Pix am ti'ñchuka' pim no't ba jim tiimu dhi oi'ñga'n, bax maati' ka' na bar mia'n ka' nañ bha jimda'. ³⁰Tu' silhkam ki'n jañ ya' pu jam tiida, biip'i' pu'ñi xi chum duuji nam ba' pik ba ko'ya' dappaam gu ja'tkam gui' nam ji'k ka duduaka' jano!. ³¹Dai dhi oi'ñga'n nam tiimu' gio gux dhaam, gu' guñ ñi'ook cham ji'xkat jum tiimu' ji.

³² 'Ku ba' gu' dhi' cham maati' ji na pai' dhuuk pik pui' tum duñia', na gu' dai diihl guñ Gi'kora' nat tu dai na pui' tum duñia'. Cham maat am gu noonbi'ñ, sia kum bhammip tu'ii'x dhaam, ni aañ

kuñ cham maat nañ jir Maraa'n, dai gui' diilh nax maat.

³³ 'Ba' gu xib tu' na jax chui'ka', aañ pu kai'ch na pim gammijí tu a'gada' jix dhaam ja'k buiñor guñ Gi'kora', cha'pim ji'x mik buppada', na pim gu' cham maat na pai' dhuuk tu daaxix. Gu' dhi' jotmoda' piñ pui' tum duñia' cham jum ilhdham.

³⁴ Na gu' dhi' ja'p ji buusnia' na jax gu jaroi' no't ka paxiaram mu pai' ja'k mik, no't mi' ka xi ja do'ñchok jai' gu ja'tkam nam mi' ka tu juanda', dai na xi ja chianii nam jax ja'k tu juanda', pui' na jax mi' na pai' tuutka' gu ba'pki'ñ, na gu' maa'n mi'p xi chianii na ka tu nuuka'nda'. Ba' gui' dai na piñ am ti ñiirka' na pai' dhuuk gio mi'p aaya', na gu' bhai' ji o'bhai'ñdha' no' mi' piñ cham tu jai'ch.

³⁵ Ba' aapi'm pu'ñi ip, piñ am ti ñiirka' pim, na pim gu' cham maat nañ pai' dhuuk ya' aaya', no' jaxji ji dhidimpugidhak, piām irab tukaa', piām ku gu' katukgab na pai' dhuuk ba jiiñkia' gu takaarui', piām ku gu'x dha'npam ji chu maaxirik. ³⁶ Mooñ ba jam aagi'ñ xib dir na pim ti'ñchukat. Cha'pim moo kooksit darka', nañ gu' jotmoda' ya' piñ ji buusnia' cham jum ilhdham. ³⁷ Biix dhi'ñi pui' nañ ji'k jax jam ti'tda aapi'm, dappaam na ji'k ja'tkam jañ yup ja ti'tdat yup kai'ch: Nam cham kooksit darka', gammijí piñ ti'ñchuka' am nañ jax ba kai'ch.

14

*Nam ba tu a'ga' gu gø'gørkam jum aa'ndam nam
jax ja'k duuji mu'aa' gu Jesuus*

(Mt. 26:1-5; Lk. 22:1-2; Jn. 11:45-53)

¹ Ba' nat gook tanoolh piñ ba ji bii na ba' moo bam aaya' na bar piasta ka' bhaan Paaskua ta'm,

gio jumai na mia'n oi'ñ nam pai' dhuuk jix basdak tu kua'da' gu paan gakdhi'ñchix kam, iampix ja'p tu'm na ariin t̄imkalh. Ba' jano' gu ja ḡe'ḡerkam tuk gui' nam jai' ja palhbui'ñdha' gu Israel kam ja'tkam nam tu daanda'buiñor gu Dios, gio ba'gui' nam sap jix mat ka' gu ñio'ki'ñ gu Dios, t̄ii moom ga'nga' am nam jax ja'k duuji iatgidhai tu chiñia' nam mu'aa' gu Jesuus. Aa'nda' git am nam ba dagia', ² gu' ji na gu' sap cham jax jix bhaai', na gu' kar piasta ka'. Ba' ja'pni pix ka xi chi'iik jamit:

—Mooch chakui juanda' na kar piasta ka', no't ba buus ba'. Na gu' no' chich xib daagik mi ja'p pai' jax ba buim ja nii'ñchudat gu ja'tkam, giilhim bhai' ji bhaaku' am jich bui.

Gu ubii na bha toi'dha' mo'ran gu Jesuus gui' na joidham uub

(Mt. 26:6-13; Jn. 12:1-8)

³ Ba' ja'xpix gu Jesuus jimiiik mummup ba tu kua' Betaania, na pai' kio gu Simoon gui' na tootolhidhat ka gakiidhat gu tukga'n. Ba' moo mi'p ba ai maa'n gu ubii ua'dat maa'n gu ilhi'ch jix moik gu jodai ja'aachix kam, nam alabaastro ki'n jix mat ka', na mi suu'ntu' gu osbhaga'n gui' nam nardo ki'n jix mat ka' nax dha'ram namiiik, na joidham uub. Ba' nat jax kukpio'kak bhai' xi choi' mo'ran gu Jesuus, pu biix ip moo nat bha toi!. ⁴ Ba' ji'kchi gu ja'tkam nam mi'p tu'ii' bhai' ji bhaak jamit, jup kai'ch am:

—¿Jax ba'm aagit pui' tu bua dhi ubii? Ti'nat biix xi dhoodak dhi' na tu'x dha'ram namkit. ⁵ ¿Cham bhai' aa na tu chiñia' git nam ga'ra' nam ba' ja makia' git gui' nam alh cham jir tu bia' kam, nam

attiuu cham bia' nam tu' ki'n tu saba'da'? Jaiñ na gu' ja'kbui' busaakdat gu tuumiñ na jax no' ñich maa'n oidha' ba tu juu.

Ba' pui' ji' xi kai'chimik am bhai' ji ñiok jamit gu ubii,⁶ gu' ji nat gu' jotmoda' ja soo'mcholh gu Jesuus, jup ja titda:

—Cha'pim tu' ki'n juanda' dhiñ jaduuñ, na pim gu' cham maat nat jax kai'ñkam bhañ juulh dhi' na pimit tu' bhaan ba ji chu a'ga.⁷ Gu' matgam gu jaaduñ na pim ja aa', gammijí ya' jam buip tui'ka' am ji, xi ja maakat japim dho nam alh ki'n jup xia'ñdhidha'. Gu' aañ nañ bar boi cha'm kam⁸ nat ba' bhai' bañ choi' dhi ubii dhi' na joidham uub, na ba' cham xijai ka', dai nam bañ yaaspa'.⁹ Tu' silhkam ki'n jañ ya' pu jam tiida', na pai' dhuuk bhai' ji chum a'ga' gux bhai'm kai'chdham ñi'ook ya' dhi oi'ñga'n, biix jup jum a'gidha' dhi ubii na ba' bhaan jix maati'ka' nat jix bhai' dhuu nat bhañ choi' dhi osbhaga'n gu nardo na joidham uub.

Gu Juudas na maaxik kïisa' gu Jesuus nam mu'aa'
(Mt. 26:14-16; Lk. 22:3-6)

¹⁰ Ba' maadit gu mambhiix daman gook gu noonbi'ñ, gui' na Juudas Iskariote tii'ka', xi miñ nat ja aa'ñdham gu ja gø'gørkam tuk gui' nam jai' ja palhbui'ñdha' gu Israel kam ja'tkam nam tu daanda' buiñor gu Dios, na ba' maaxik kïisa' nam boi bhiiichdha' gu Jesuus. ¹¹ Ba' joidham jix bhai'm iilh jamit na ba ja aagi'ñ, jup titda am nam mui' namkidha' na mu ja baidhika' gu ja o'rosiiris tuk na pai' silh oirida' gu Jesuus. Ba' gu Juudas ba jim gaa na jax ja'k jix bhai' ji buusnia' nam jix bhai'

bhiiya', nam ba' cham xijaichdha' nam daagii boi bhiiichdha'.

*Nam ba tu bhaidha' gu koi' bhaan Paaskua ta'm
gu ja'tkam tugi'ñ gu Jesuus*

(Mt. 26:17-29; Lk. 22:7-23; Jn. 13 :21-30; 1Co. 11:23-26)

¹² Ba' buimgidhak biipi' dir na ba' moo mui' jim kiisa' ja'xpix na pai' dhuuk kasnir bakaax tum jugia', gio ba' gu jumai na mia'n oi'ñ nam jix basdak tu kua'da' gu paan gakdhi'ñchix kam, ba' moop ba tikka am gu noonbi'ñ gu Jesuus, yup titda am:

—¿Paap ja'k jix aa' nach jimii tu bhaidha' nach tu jugia' ja'xñi nat ya' bam ai gu piasta bhaan Paaskua ta'm?

¹³ Ba' gu Jesuus gook mijji xi ja joot bhammi ge' kiicham, yup ja titda:

—Aañ ja'p tii kai'chit na pim mu Jimia' aapi'm gook bhammi ge' kiicham. Bhai' pim tigia' maa'n gu chio'ñ nar tujuandam na mi ja'p ba tu bai'ntu'nda' maa'n gu bai'ñdhakar ta'm. Ba' aapi'm mui' xi oidha' gatuuk dir, pix niidhidha' pim na mummu ji aaya' kiicham. ¹⁴ Ba' aapi'm cham xi'irdat mui' xi aaya', ja'p japim tiida' gu mi' kiokam: “Aach ja'p jich chiidak bhach joot gu Ge'kam nap sap taiñbuidha' maa'n kap gum ba'aak pai' na tu bio', na sap ya' tu jugia' ja biim gu noonbi'ñ nat bam ai gu piasta bhaan Paaskua ta'm.” ¹⁵ Ba' gui' tu jam tii'ñchuda' bhiji ja'p te'kob, na pai' ti kii'mpigix gio na ge'x chu bhai'. Bhai' pim ba' tu bhaidha' nach tu jugia' ja'xñi.

¹⁶ Ba' mui'p ma jii mit gu gook gu noonbi'ñ, bhammi mit ba ai ge'kiicham. Pui' dho ji chu buus

na ji'k jax ja titda gu Jesuus. Cham xijaich jamit, dai na mit xi chu bhaidhak gu koi' nam tu jugia'. Ja'xpix ba' giop ka xi jii mit mummu nat pai' dhir bha ja joot.

Gu Jesuus na ba ja aagi'ñdha' gu noonbi'ñ na maadit maaxik kïsa' nam boi bhiichdha'

¹⁷ Ba' ji chukgik mi' ba ai gu Jesuus ja biim gu mambhiix daman gook gu noonbi'ñ. ¹⁸ Mi' ba' bhai' ji chu juu mit. Ba' nam mi' daraat ka tu kua', jup ja titda:

—Tu' silhkam ki'n jañ ya' pu jam tiida', maadit aapi'm na pim ya'p tu'ii', maaxik jiñ kïsa' ja bui gu ge'gerkam jum aa'ndam nam boiñ bhiichdha'.

¹⁹ Ba' gui' gampai' ji dhuu mit, ba' pix bhai' ji chikka mit ji'ma'n, jup titda am:

—¿Aañi' aa chi?

Gio gu jumai:

—¿Ka' aañi' aa chi?

²⁰ Ba'p ja titda gu Jesuus:

—Maa'n pix ji gu' aapi'm mambhiix daman gook na pim ya'p tu'ii', nach ji'k maap ya ti sissi dhi jooxia' ta'm nañ jax chu'm ka'm tu kua' aañ. ²¹ Jir am kat na pu cham jai'ch ka' git gu jaroi' na maaxik jiñ kïsa' nam boiñ bhiichdha'. Tiix joi'gi'ñ iñ, na gu' gilhim jum tulhiiña' maaxik xiñ kïsai. Ku ba' gu' dhi' mi' pix pui' ba jimda' ji, na bhaan pix jum kuugalhdha' na jax jum kai'ch mi u'uan ta'm gu ñio'ki'ñ gu Dios, na pu'ñi ja'k jiñ dhooda' am aañ nat bhañ joot.

Gu Jesuus na ba tu daasa' na jax ja'k aagix ka' nam ba' bhaan ti'ñchuka' gui' nam ji'k ti jïgi'ñdha' buiñor na ja a'mkam mukia'

22 Ba' mi' pui' nam tu kua', nat jax dhaa ip gio gu Jesuus jai' gu paan, xi chu taxchaabgidhak jix dhaam ja'k ta'tak xi jaisaidhat pix mui' ji ja maa gu noonbiñ, yup ja titda:

—Dhi'ñi pim pup mui' xi jugia', na gu' dhi'r jiñ chuuku'.

23 Gio ba' maa'n mi' dhir ja'p bhai'p ji bhii gu alhi'ch ja'aa na mi suu'ntu' gu biiñ gui' na uubas ki'n yup duñiix, ba' mu ja'k xi ja maakak xi ja chia nam i'ya'. Ba' gui' bhai'p xi ii mit ji'ma'n kaam.

24 Na mit xi i'chuk ba'p ja titda:

—Dhi' na pimit tu ii, dhi'r jiñ i'ñir na ki'n xib dir maakam aagix ka' na jax ja'k jix aa' guñ Gi'kora' nam mi' pui' jiimda' gu ja'tkam, na gu' ka miñhia' guñ i'ñir na ba' tu namkix ka' gu ja ua'tulhdhara', na ba'x bhai' tu ja jimia!. **25** Tu' silhkam ki'n jañ ya' pu jam tiida', daipu' dhi maa'n kaam nañ xi io'ji dhi uubas baraa' gu xib, nañ gu' moo bar boi cha'm kam. Jano' ba' na pai' dhuuk ba tum kuugalhdha' nañ ba' giop ba i'ya' jix dhaam ja'k, ku gu' gux uañ ji, cham tu' dhi' pu chu'm.

Gu Jesuus na ba aagi'ñdha' gu Peegro na pui' ti'ya' gatuuk na cham tu' kaichu'

(Mt. 26:30-35; Lk. 22:31-34; Jn. 13:36-38)

26 Mi' dhir ba' maa'n xi laalagik tii ma jii mit bhammi ja'k oidha' ta'm, nam pai' Oliibus ki'n jix chu mat ka'. **27** Gu' ji na gu' na mit baas ba ji bhii, yup ja titda gu Jesuus:

—Ya' moo mam ai nam kuugalhdha' na jax tu ua'ñiix mi u'uan ta'm nap jum kai'ch: "Mu'aa' am gu bipia'dam, ba' gu kakasnir jum ji'dilhkadai pix cha'tak boopoya' am ji'ma'n." Ba' dhi' na pui' ji'

tu ua'ñix, aapi'm jam aagit pui' ja'k jum kai'ch, na pim pu jiboi'ñgia' xib dhi tukaa' nam bañ dhagia' gui' nam bha ja jootsa' gu ḡe'ḡerkam jum aa'ndam. Na gu' cham tu' dai nam jiñ kuupa' piñ, gu' ja'pji nam pu tu chiñia' nam jiñ mu'aa!. ²⁸ Ku ba'gu' aañ gatuuk yaa' ji nañ jax ba oirida'. Kagit nañ biipi' mu ba oirida' Galilea na pim ba' aapi'm muc ba aaya'.

29 Ba'p kai'ch gu Peegro:

—Aañ dho gi chakui jimiiññolhia' ji, sia mit dhi jai' jiboi'ññor. Cham jax bua sia ku mit jum bindak jiñ dhaa.

30 Ba'p titda gu Jesuus:

—Tu' silhkam ki'n jañ ya' pum tiida' na gookim ka jiiñkia' gu takaarui' xib dhi tukaa', aap baikim pui' ba ti'ya' nap cham jiñ kaichu'.

31 Gu' ji na gu' xi kiik gu Peegro, jup kai'ch:

—Aañ dho gi pu ti'ya' ji nañ jum kaichu', cham jax bua sia mit jum bindak jiñ mua.

Ba' biix pui'p ji chii mit gu jai' noonbi'ñ.

Gu Jesuus na mi' øøji Getsamanii tu a'ga' jix dhaam ja'k buiñor guch Gi'kora'

(Mt. 26:36-46; Lk. 22:39-46)

32 Ba' mi' piñ ji ai mit na pai' Getsamanii ti tii', ba'p ja titda ip gio gu Jesuus:

—Ya'ni pim ka darka'. Aañ bha'ñi ka tu a'gara' jix dhaam ja'k buiñor guñ Gi'kora'.

33 Ba' baasi'n iam xi jimiiñk baik piñ xi ja baidhak gu noonbi'ñ, dai gu Peegro, gio gu Jakoobo, gio ba' gu Juan. Ba' gampai' jim duu nam bhai' xi ñii'ñ, panaas kux buam jum aa', ³⁴ ba'p ja titda:

—Aañ moo cham pui' ka tu tatda' ji, bax chaat iñ nam mia'n ba jiim gui' nam boiñ bhiiichdha'. Aañ ja'p ilhii'ñ na pim ya' pix kañ ñiirda' ip aapi'm, dai na pim moo cham kooksoda', ti nii'ñdha' pim.

³⁵ Ba'x io'm baasi'n iam xi jimiik mi ja'p o'lhia'n ki'n xi kikbuk xi dhumartik, dirap na xi chu siisap gu ma'oo'n. Ba' mui' ji chu a'ga jix dhaam ja'k buiñor guch Gi'kora', na tikka'n no' sap jix bhaai' na palhbuidha' nam ba' cham boi bhiiichdha', ³⁶jup kai'ch:

—Aapi'ñ Gi'kora' nap jix dhaam yup tu'ii', nap biçchu'x bhaai' nap pu tu duñia', xiñ palhbui'ñ nam cham boiñ bhiiichdha', na gu' dhi' ja'p ji buusan na jax gu tu' na giilhim jix xibu' nañ tu i'ya'. Piam jap xiñ guguuxdha' nañ ba' cham jax jiñ aa'nda' no'p gu'x aa' nam kuugalhdha' nap aap jax ilhii'ñ. Ku gu' aañ cham tu' ji nañ moo cham aagit yup kai'ch.

³⁷ Ba' ja'xpix nat ja'k gii mi' nat pai' xi ja chianik nam ka darka' gu baik gu noonbi'ñ, mi' pix kookos am nat ba ja tii. Ba'p titda gu Jesuus gu Peegro:

—Simoon, ¿moo ja'p jix kooxim ap aa? Ti nii'ñdha' ap. Moo pich chi moo janø' koi na ñich jax jii. ¿Ka'p ji siamri ji'x xi chi niidhimik aa? ³⁸Gu' pim ji ti nii'ñdha' ji, gio na pim tu a'gada' jix dhaam ja'k buiñor guñ Gi'kora' na ba' cham jam mai'chia' gu ja'ook. Pui' dho pix tii xi chu tatda' jia na pim nakga' git na pim jum tulhiiña' na jax aañ, gu' ji na pim gu' cham nakoo'.

³⁹ Ba' dai nat xi ja ñiññichdhak gio mu ja'k yup ji dhuu nat tu a'gam jix dhaam ja'k, jir maa'n na jax kai'chim nat jax ja'k tu a'ga biipi' dir. ⁴⁰ Ba' ja'xpix nat gio ja'k yup gii, kookos am nat giop ba ja tii, pu

cham ñiok am na tii xi chu ja a'gi'ñ, nam gu' giilhim jix kookxik. ⁴¹ Ba' na bar baikim nat xi chu a'garak jix dhaam ja'k nat gio mi'p ba ai, maa'n nam jax kookos nat ba ja tii, ba'p ja titda:

—¿Kux ba' moo ja'p jix kookxik japim aa? Gi nañ yup jam titda na pim ti nii'ñdha' nañ ji'x ka tu daan. Xib na gu' cham kam aa' na pim ti nii'ñdha', nat gu' bam ai na pai' dhuuk tu daaxix na aañ nat bhañ joot guñ Gi'kora' boi bañ bhiichdha' am gui' nam cham tu' ka'm ti nii'ñ. ⁴² Mummuni dhir bhai' ba jimchu' mui' ja biim gui' nañ jaroi' jam aagi'ñ biipi' na maaxik jiñ kiisa'. Maik gor jach mui' xi ñamkia'.

Gu Jesuus nam daagi' ba bhiika'
(Mt. 26:47-56; Lk. 22:47-53; Jn. 18:2-11)

⁴³ Ba' na pui' ji' ka ja titda gu Jesuus gu noonbi'ñ, mi' ba ai ji gu' gu Juudas, gui' na maadit jir di' gu mambhiix daman gook gu noonbi'ñ, ja biim mui' gu ja'tkam kukxir ji chu ua'dat am, jai' gu u'ux jix kaapak, na mit bha ja joot gu ja gø'gørkam tuk gui' nam jai' ja palhbui'ñdha' gu Israel kam ja'tkam nam tu daanda' buiñor gu Dios, gio gui' nam sap jix mat ka' gu ñio'ki'ñ gu Dios, gio ba' gui' nam jir ja gø'gørkam tuk ka' gu Israel kam ja'tkam. ⁴⁴ Ba' gu Juudas biipi' dir xi ja aa'ñdhak nam baas dir ka jiim na jax ja'k duñia' nam ba' ba machia' na jax chu'm jir di' ka', yup ja titda:

—Gui' nañ jaroi' mi' xi ñio'kdha', dhi'r di' ka'. Ba' aapi'm jotmoda' mi' pu dagia', jix bhai' pim buuprai pu bhiika'.

⁴⁵ Pui' dhom duu. Na mit jax mi' ai, piix jix bhai' kai'chim gu Juudas, yup titda gu Jesuus:

—Aach bha ja'k ip jiñ jaduuñ.

Gio ba' nat mi' xi ñio'ki. ⁴⁶ Ba' gui' jotmoda' mi'
pu daa mit, buuprak gamai' pu bhiich jamit.

⁴⁷ Ba' maa'n gu maa'nkam tugi'ñ gu Jesuus, nat
jax baabuk gu kuxiiru'n bhai' tii soñiich maadit
gui' na mit mu ja joot gu ja gø'gørkam tuk gui' nam
jai' ja palhbui'ñdha' gu Israel kam ja'tkam nam tu
daanda' buiñor gu Dios. Gu' ji nat gu' cham ai, nat
gu' ja'p xi ñiira, dai naaka'n pix ai palhiip. ⁴⁸ Ba'p
ja titda gu Jesuus gui' na mit ba daa:

—¿Jax ku pim ba' bixchu' kukxir tu ua'dat bha
ja'k jiim gam u'ux jix kaapak? ¿Tu' ixkum jiñ
ilhii'ñ japid aa? ⁴⁹ ¿Jax ku pimit ba' cham mummu
puñ dhaa gø' chiop nañ moo mi' pu oirit tu jam
a'gil'ñdha' nabap tanoolh? Ka' ba' na gu' dhi' na
bhaan pix jum kuugalhdha' na jax jum kai'ch mi
u'uan ta'm gu ñio'ki'ñ gu Dios.

⁵⁰ Ba' diilh mi' xi buak jamit gu Jesuus gu
noonbi'ñ pu jiboi'ñnor.

Na bajimiññolia' maa'n gu biapma'

⁵¹ Ba' nam nammì gama ja'k ba ua' buuplhixim
gu Jesuus, gatuuk dir mui' ka jimchu' maa'n gu bi-
apma' dai tøb kutuun ji chii'chgit. Ba' o'bhai'ñdhak
tii daa mit, ⁵² gu' ji na mit gu' cham bhai' daa,
kutuunaran pix daa mit. Jum jupnak pu jimiiññor
jix dhaapkat.

*Gu Jesuus nam mu ba aichdha' na pai' tum a'ga'
(Mt. 26:57-68; Lk. 22:54-55, 63-71; Jn. 18:12-14,
19-24)*

⁵³ Ba' mummu ba aich jamit gu Jesuus na pai'
kioka' gui' nax io'm jir ja gø'kam tuk ka' gui' nam
jai' ja palhbui'ñdha' gu Israel kam ja'tkam nam
tu daanda' buiñor gu Dios. Ba' bix maap bam

jumaap jamit gu jai' gui' nam cham pik jir ja g 'g rkam tuk ka', gio ba' gui' nam jir ja g 'g rkam tuk ka' gu Israel kam ja'tkam, gio ba' gui' nam sap jix mat ka' gu  io'ki'  gu Dios. ⁵⁴ Ba' gu Peegro gatuuk mi'p ba ai, na gu' gatuuk dir pix mui' ji jim jix choo'nmit. Mi' dhir ja'p di rap pix ji dhaibu mi' na pai' miim gu tai, nam pai' tu naadat juuka' gu o'rosiiris.

⁵⁵ Ba' gu g 'g rkam tiim ti tikka'n am nam jax ja'k duuji iattulhdhai tu chi ia' nam mu'aa' gu Jesuus, gu' ji nam gu' cham ji'xkat ni i'  na mu pai' giilhim tu buim, ni nam pai' dhuuk pui' te k  . Mi' dho gu' pu cham bhaai' nam jax ti'ya'. ⁵⁶ Ba' jai' dhit ti xi iattulhi'  am, gu' ji nam gu' pui' pix cham yup ja ji gi' , na gu' maa'n maakam yup kai'chdha', gio gu jumai maakam ip. Mi' pui' cham ka nokia', mi' dhir jumai bhai' tiip ji chu a'ga'. ⁵⁷ Jai' gu'ngukit ti xi iattulhi'  am, yup kai'ch am:

⁵⁸ —Dho gu' aach mi' pai' pui' kai ji nap kai'ch: "Alh ja  moo ka iara' dhi g ' chiop ja'tkam yup ja dui , baik tanoolh ki'n ja  ba' gio jumai ya'p ki sa', dhi' ba' Dios bap jir du ii'  ka', cham tu' tu' ja'tkam."

⁵⁹ Ni gu pui' kum cham maa'n  i'ook yup bua, sia kum panaas ti silhkam kam xi kai'ch.

⁶⁰ Ba' gux io'm ja g 'kam tuk gui' nam jai' ja pal-hbui' ndha' gu Israel kam ja'tkam nam tu daanda' bui or gu Dios, xi kikbuk xi ja soo'mchulhdhak nam sap cham  iokda', ba' ba tikka gu Jesuus, yup titda:

— Jax yap ilhdhat ja k   dhi jaadu ?  Jir silhkam aa nam jax kai'ch, ka'm ji iat aa? Eap xi chu a'ga nach xim k  ka'.

61 Gu' ji na gu' cham ñiok gu Jesuus, mi' pix pu daa. Ba' giop xi chikka jix bhai' pix, jup titda:

—¿Jir silhkam aa nap saak aap jir di' guch Xoi'kam, nap saak jir Maraa'n gu Dios gux io'm Ge'kam?

62 Mi' dho gi ba' bhai' ji ñio ji gu Jesuus, jup kai'ch:

—Aañi' dhor di!. Kani na pim bañ chigia' nañ bhijimmini dhir bhai' ji buusnia' tibaa'ñ chir gatuuk nañ bhammix dhaam xi dhaakat sonpan gu Dios kii'n dir.

63 Ba' gux io'm ja ge'kam tuk gui' nam jai' ja pal-hbui'ñdha' gu Israel kam ja'tkam nam tu daanda' buiñor gu Dios, ais saassa gu jannulhi'ñ na sap ba' bhaan jix maati' ka' na cham jir am pui' nat jax tii gu Jesuus, jup kai'ch ba':

—¡Dho jaña! ¿Jarooch ba'p ka niira nax bhai' tu aa'nda'? Tii' nat diilh ya' maaxik bam kii. **64** ¿Jax japimit gi ilhdhat kai? ¿Cham aa pim ilhii'ñ na giilhim jir ua'tulhdhara' gu pui' nat jax tii, na moo ja'xbui' ge'kam jup xim taat na jax gu Dios?

Ba' biix bhai' ji bhaak jamit nam ji'k mi'p tu'ii', pui' ji chii mit na sap pui' pix bax bhaai' nam tu chiñia' nam mu'aa'!

65 Ba' bhai' ji dhaa mit pui' xi chi'ii. Jai' mit bhai' ji xixbuidhimi, jai' na mit bhai' xi bulhdhak gu jannulh buupuiran bhai' xi gib, gio ba' nam xi chikka, jup titda am:

—¿Jaroo bham gi'? Eap xich aagi'ñ.

Mi' dhir ba' gu o'rosiiris jai' bhai'p ji gibiiim i mit buibsaran.

*Gu Peegro na pui' ba ti'ya' na cham tu' kaichu' gu Jesuus
 (Mt. 26:69-75; Lk. 22:56-62; Jn. 18:15-18, 25-29)*

66 Ba' gu Peegro na mi' ka daa cham joiñat, bhiji dir ja'p timnik tø'kob mi' ba ai maa'n gu tiyaa na mi'r tujuandam ka'. **67** Ba' mi' pix ji chii gu Peegro na mi' daakat ka juuka' taikob, ba' bhai' xi ñiidhimik yup titda:

—¿Aap aa maadit jir di' nap kaichu' gu Jesuus Nasareet kam?

68 Gu' ji na gu' gu Peegro cham tu aa', dai nap kai'ch:

—Cham. Aañ diihlji nañ yup oilhim jiñ jaduuñ. Pu ni nañ jix maat gu jaroi' nap aagit yup kai'ch.

Ba' mi' dhir jimiik gama ja'k yup ba kiik ki'ñgob. Ba' mi kiikat jix buam jum aa', ba' moo maa'nnim ba jiiñ gu takaarui'. **69** Ba' gu tiyaa mui' xi ñiidhimik ip gio, yup ja titda gui' nam mi'p tu'ii':

—Gu'ñi dho bak maadit jir di' na kaichu' gu Jesuus.

70 Gu' ji na gu' gu Peegro jir maa'n na jax kai'ch. Ba' ja'xpix bhai'p ji chikka mit gui' nam ji'k mi'p tu'ii', yup titda am:

—Ja'p aa moor silhkam nap cham tu' maadit jir di' gui' nam kaichu' gu Jesuus Nasareet kam? Chi moo tii kaichu' ap ji, gu' ji nap gu' cham tu aagam. Jax dhui na pim gu'r mia'n jum oi'dhagim. ¿Ka' cham aa aap jir Galilea kam? Tiñ nap ba' moo ja'p pui' tu ñiok nam jax tu ñiok gu mu kam.

71 Gu' ji na gu' xi kiik gu Peegro, dai nat bhai' pix ji bhaam nam tiix bhai' pix xi chikka. Biix aixim ja titda na jax ilhii'ñ, yup kai'ch no' gu' sap cham jir

pui' na jax kai'ch, ku gammiji pu dooda' ku gi gu
Dios na jax ilhii'ndha'. Ja'pni moo kai'ch:

—No' gu' cham jir pui' ku gi nañ jax jam titda,
ku puñ dhooda' ku gi gu Dios na jax ilhii'ndha', nañ
gu' aañ tii ba jam aagi'ñ nañ diihup oilhim. Gio
pu cham jup nii'ñ iñ na jax chu'm ti nii'ñ gu jaroi'
na pim mijí pai' aa'. ¿Jax japim ba' duukat pui' ja'k
ilhii'ñ nañ aañ kaichu'?

⁷² Ba' daipu' xi ja tiidak gio mi ja'p gampai'p jim
duu. Ba' giop ba jiiñ gu takaarui', bar gookim nat
giop ba jiiñ. Ba' bhai' pup ti'ñcho gu Peegro na
bak pin pu'ñi titda gu Jesuus biipi' dir: "Gookim ka
jiiñkia' gu takaarui' nap aap baikim pui' ba ti'ya'
nap cham jiñ kaichu'." Ba' bhai' ji susua, nat gu'
giiłhim bhai'x buam ji chu tatdat na pui' xim aa'.

15

*Gu Jesuus nam mu ba aichdha' na pai' gu Pilaato
(Mt. 27:1-2, 11-14; Lk. 23:1-5; Jn. 18:28-38)*

¹ Ba' buimgidhak nat jax pix bhai' ji chu maaxir,
gu ja ge'gérkam tuk gui' nam jai' ja palhbui'ndha'
gu Israel kam ja'tkam nam tu daanda' buiñor gu
Dios, gio ba' gui' nam jir ja ge'gérkam tuk ka' gu
Israel kam ja'tkam, gio ba' gui' nam sap jix mat ka'
gu ñio'ki'ñ gu Dios, xi chu a'gak jamit nam jax ja'k
duuji tu chiñia' nam boi bhiechdha' gu Jesuus. Ba'
ja'xpix na mit pai' maa'n ñi'ook xip duuk, dai na
mit mui' ba bhiik jix bhai' buuplhixim mu na pai'
daa gux kai' Pilaato. ² Ba' gu Pilaato xi chikka'n gu
Jesuus na mit jax mu aichulh, jup titda:

—¿Aapi' aar di' nap saak jir ja ge'kam tuk ya' dhi
Israel kam ja'tkam?

Ba'p titda gu Jesuus:

—Jir pui' dho nap jax kai'ch jiñ jaduuñ.

³ Ba' gu ja gø'gørkam tuk gui' nam jai' ja palhbui'ñdha' gu Israel kam ja'tkam nam tu daanda'buiñor gu Dios, biix aixim tii iattulhi'ñ am gu Jesuus. ⁴ Ba' gio bhai'p ji chikka gu Pilaato, jup titda:

—Jir silihkam chi moo pui' nam jax kai'ch nam biix aixim jum iattulhi'ñ dhi ja'tkam. Tii' nap ba' cham fiok. ¿Pui' aap ba' cham tu' bhaan jum palhbuidha'? Tii' nam jax kai'ch dhi ja'tkam.

⁵ Gu' ji nat gu' cham ka ñio gu Jesuus nat gio tiip xi chikka. Ba' mi' pu cham maat gu Pilaato na jax dhuñia' na tii xim ga'nga.

Gu Pilaato na ba tu chiñia' nam sissappu' kuruus ta'm gu Jesuus

(Mt. 27:15-31; Lk. 23:13-25; Jn. 18:38-19:16)

⁶ Ba' ja'pni ja'k moop tu jimda' gux kai' Pilaato: Nabap oidha' na pai' dhuuk jum aajidha' gu piasta bhaan Paaskua ta'm, maa'n dado'ñcho' gu maa'nkam gui' nam ji'k kuupka', dai na gu' gu jaroi' na ilhii'ñdha' nam cham pik bhaamki'ñdha' gu ja'tkam. ⁷ Ba' jano' maadit mi'p kuupka' gu maa'nkam Barrabaas tiigim, gui' na biix jimidat biipi' dir na mit pai' dhuuk ja koi ji'kchi gu ja'tkam na mit ja kokda gu gø'gørkam. ⁸ Mi' dhir ba' mi'm jumpadak gu ja'tkam jup titda am gux kai' Pilaato, na sap jix bhaai' na do'ñcho' maadit gui' nam mijí kuup nam pai'm kukpa gu ja'tkam. ⁹ Ba'p ja titda gu Pilaato:

—Aañ ja'p ilhii'ñ nañ do'ñcho' dhi Jesuus, na gu'p kai'ch nar jam gø'kam tuk biix aapi'm ya' dhi

Israel. ¿Jir am aa, ka' cham aa? ¿Jax japim ilhii'ñ aapi'm?

10 Ba' dhi' na pui' ji' ja titda gu Pilaato na mi' pix mamti, ee jax pik ti'ya' am. Na gu'x maat na gu ja ge'gerkam tuk gui' nam jai' ja palhbui'ñdha' gu Israel kam ja'tkam nam tu daanda' buiñor gu Dios, nam jix bhaamkidhat jamit ba' mu aichulh gu Jesuus na sap ba' mi' dhir ja chiñia' gu sandaarui'x chugil'ñ nam mu'aa', nam gu' giilhim jix jiigam.

11 Gu' ji na gu' gui' pu biipi' dir ba ja iatgi mit gu ja'tkam, yup ja titda am nam sap pui' ti'ya' na cham dado'ñchoda' gu Jesuus, Barrabas jamit ja chia nam bhai'ji aaga' na do'ñcho'. **12** Ba' xi ja tikka'n gu Pilaato nax bhai'x maachim no'm sap cham iam jax ti'ya' na do'ñcho' gu Jesuus, yup ja titda:

—¿Jax japim ba' ja'k ilhii'ñ nañ tu chiñia' nam dooda' dhi Jesuus? Na gu' kai'ñkam pui' kai'ch nar jam ge'kam tuk biix aapi'm ya' dhi Israel.

13 Ba' gu ja'tkam pix jiiñak suulh jamit, yup titda am ge'ki'n:

—¡Mu ja chian gum sandaarui'x chuk kum sissappu' kuruus ta'm!

14 Ba' gio tii mui'p ka xi ñio gu Pilaato, yup ja titda:

—¿Tu' gi moo jax dhuu mu pai' ku pim ba' moo ja'p jix ki'ii'n?

Gu' ji nam gu' gu ja'tkam cham te' ke'e. Jix io'm ge'ki'n pui' ba xi chitda am:

—¡Mu ja chian gum sandaarui'x chuk kum sissappu' kuruus ta'm!

15 Ba' pui' ma do'ñcho gu Pilaato gu Barrabas nam ba' cham bhaaku' gu ja'tkam, nam gu' dhi'

bhax aa'. Mi' dhîr ba' pui' ma ja chia gu sandaarui'x chugi'ñ nam giïlbia' chipliin ki'n gu Jesusus nam ba' mi' dhîr ba sissappu' kuruus ta'm.

Gu sandaarui'x nam biix aixim dooda' gu Jesuus

¹⁶ Ba' gu sandaarui'x chugi'ñ gu Pilaato na mit pai' xi giïbiimik gu Jesusus, mu ja'k jup bhiik jamit gø' bhi'ñbak chir, mi' na pai' gø'x chi gi'íir, nax bhaai' na mi ja'p tum oipoda' gu ja'tkam biix xikoolh. Ba' gu sandaarui'x gui' na mit giï' gu Jesusus, biix bhai' ji ja bai mit gu jai' sandaarui'x nam mi ja'p jup tu'ii', ¹⁷ ba' xi chi tii'dhak jamit jix ñakaabma', gio na mit bhai' xi dhaaxdhak gu joi' kuruuñchix kam mo'ran. ¹⁸ Giilhim bhai' ji chïtdaimi, jup titda am:

—¿Gammiji aap tii ilhdhat nap jir ja gø'kam tuk ka' git gu ja'tkam ya' dhi Israel?

¹⁹ Gio na mit bhai' ji giïbiimi mo'ran maa'n gu uxux tapoorak ki'n, gio nam bha xixbui'ñ. Gio ba' nam ja o'lhia ki'n gu'ngukit biipi' dir pix am tum uañi'ñ, tu' ka'm nii'ñ am chi sap panaas, gu' ja'pji nam mi' pix xi'irappu. ²⁰ Ba' ja'xpix nam mi' pui' xi buimik, giop xi chu kookoxchuñhdhak jamit gux ñakaabma' na mit biipi' dir ti tii', diñlh jajannulhi'ñ jamit ba' xi chi tii'dhak ip gio, na mit ba' moo baabuk mijí dir gø' bhi'ñbak chir ba bhiik na mit ba sissapam kuruus ta'm.

*Nam ba sissapa' gu Jesuus kuruus ta'm
(Mt. 27:32-44; Lk. 23:26-43; Jn. 19:17-27)*

²¹ Ba' nam baasi'n ba ua' gu Jesusus na mit ba sissapam, maa'n bhai' ka jimchu' gu maa'nkam Sireene kam Simoon tiigim, nar taata'n gu Alijaanru gio ba' gu Ruupu, sap mu pai' dhîr ja'k

jimchu' gampix. Ba' gu sandaarui'x bhai' dhir ja'k buak gamai' chia mit na mootika' gu kuruus, nat gu' ba magoo gu Jesuus.

²² Ba' bhammi ba aich jamit gu Jesuus na pai' Golgota ti tii', na ja'p kai'ñkam jup jum kai'ch: Kakoi' Mo' Daa. ²³ Ba' ji'kchi gu ja'tkam bhammi eefk tii maak am gu uubas baraa', binkam gu osbhaga'n gu u'uux gui' nam mirra ki'n jix mat ka', na sap ba' ki'n cham pik tu ko'k ka', na gu' cham pik tu taat ka' gu tukga'n, gu' ji na gu' cham aa' na i'ya' gu Jesuus. ²⁴ Ba' gu sandaarui'x xi chu kookoxchulhdhak jamit gu jajannulhi'ñ, na mit ba' bhai' ba sissapa kuruus ta'm. Mi' dhir ba' dai na mit xim mamai'chik a'lhiok xi chu u'uuk.

²⁵ Bhammini ja'p moo te'kob pa' ba ji dhuu na mit pai' dhuuk bhammi sissapa. ²⁶ Ba' daam dir iam na pai' mo'tik gu Jesuus, maa'n bhai'p siis jamit gu taa'mla alhi'ch komaarak pa', ge'ger ki'n bha tu ua'ñix na sap ba' bhaan jix maati'ka' na mit tu' ki'n jup dooda. Ba' ja'pnim kai'ch gui' na bha tu ua'ñix: "Dhi'ñi jir di' gui' nar ja ge'kam tuk biix gu ja'tkam ya' dhi Israel." ²⁷ Ba' gook i'xkum jamit biima'n bhai' sissapa bixxik dir jai' kukrus ta'm. ²⁸ Ba' dhi' nat pui' ji' tum duu, nat jax dhuuk pix jum kuugalh gu ñio'ki'ñ gu Dios na jax tu ua'ñix mi u'uan ta'm nap jum kai'ch na guch Xoi'kam tu' pix ilhdha' am gu ja'tkam, pui' na jax gu jaroi' no' cham tu' ka'm ti nii'ñ.

²⁹ Ba' jai' dhit gu ja'tkam mi ja'p amuub buanit giilhim titdaidha' am bhai' xi ñiidhidhat, am gagai buppaidha' am gu ja moom. Ja'pnim moo titda:

—Jaña nap jax chu'ii' aap nap saak iarai gu ge' chiop baik tanoolh ki'n gio jumai bhai'p kiisa'.

30 Eap xi ch̄imiiñ bhai' dhir dhi kuruus ta'm nach xim nii'ñdha' no'p baabui' moox io'm jir ḡe'kam.

31 Ba' gu ja ḡe'ḡerkam tuk gui' nam jai' ja palhbui'ñdha' gu Israel kam ja'tkam nam tu daanda'buiñor gu Dios, gio gui' nam sap jix mat ka' gu ñio'ki'ñ gu Dios, ba xi jii mit ip nam giilhim a'ga gu Jesuus, yup kai'ch am ḡe' ki'n ja kaixdhat:

—Gi jax ji nat ba' gu' gu jai' ja'tkam ja palhbui, diih ba' moo ja'p cham yup bhai' ji jia na jax dhuim palhbuidha' xib na bhai' sissap. **32** No' git jich ñii'ñchudat bhai' dhir bhai' ji ch̄imñia' dhi' na saak jir jich Xoi'kam, na saak jir jich ḡe'kam tuk biix aach ya' dhi Israel, dho gi gu' biix ti jii'ñdha'ch git ji buiñor.

Ba' gui' nam bhai' biima'n sissap pix am yup bhakku' am buiñor, jax ñam pix chitda.

Gu Jesuus na ba mukia'

(Mt. 27:45-56; Lk. 23:44-49; Jn. 19:28-30)

33 Ba' nat jix dhaam ba ji dhuu, bhai' ji chum tukgamta, pu cham pai' ka tu maax ja'p na jax no'r tukaa', attiiru pui' mia ba ji dhuu nat ba' giop ba tu maaxir. **34** Ba' nat jax kia'pix gio bhai'p ji chu maaxir, ḡe' ki'n yup kai'ch gu Jesuus:

—Eloi, Eloi, ¿lama sabaktani? —na ja'p kai'ñkam yup jum kai'ch: Dios jiñ Gi'kora', ¿jax kup ba' cham jiñ a'm ka ti niidhim? Tiñ' na mit jax jiñ dhooda.

35 Ba'p kai'ch am gui' nam mi'p tu'ii' nam kee':

—Ka git na tii bai'ñ gu Eliiyas gui' nat bijik ya ja'p bhaankam tu a'gimik gu Dios.

36 Ba' maadit gui' nam mi'p tu'ii' yup kai'ch:

—Ea nach niirada' gu Eliiyas no' bha jim na tibaañdha'.

Na gu' ja'p jum aa' na dhi' bai'ñ gu Jesuus nat gę' ki'n tu a'ga. Ba' pui' xi chi'iik, jotmoda' xi ba'nnidhak maa'n gux moik ja'p na tok ki'n gu uubas barga'n jix ji'iik, uxu cha'm xi ixsunak mui' xi maa chiñi'ran gu Jesuus na sap ba' xio'pna' na ki'n kapup xi dhuatgida!. ³⁷ Gu' ji nat gu' nai' ji muu, dai nat gę' ki'n xi jiiñkik. ³⁸ Ba' nat jax muu gu Jesuus, gu jannulh gu gę'x kabook na mu sę'ka' irban dir gu gę' chiop, pu irban sar. Daam dir dir mui' ji sar, mijimmi ji chim. ³⁹ Ba' gui' nar ja mo' ka' gu sandaarui'x nii'ñ nat gę' ki'n xi jiiñkik gu Jesuus nat ba muu, ba'p kai'ch:

—Bak ji gu' silhkam ji na Dios jir Maraa'n kat dhi jaduuñ na ba' saak pui' kai'ch nar gę'l kam.

⁴⁰ Ba' jai' gu u'uub mi:k pa' guguukat mui'p nii'ñ am. Maadit moor di' gui' na Mariiya Magdalena ti:i', gio gu jumai Mariiya, gui' nar ja naan gu Josee gio gu Jakooobo, gui' nam gatuuk kam ki'n jix mat ka', gio ba' jumai ip gu ubii Salomee tiigim. ⁴¹ Ba' dhi' dhi u'uub jir di' am gui' nam gammiji biix jup xi jiimda' mu ja'p Galilea, na pai' jax tu ja a'gidhidha' gu Jesuus gu ja'tkam, nam palhbuidhidha' nam mu bhiidhidha' na tu'm aagidha'. Gio jai' mui' gu u'uub nam mi'p tu'ii', gui' na mit bha oi ip jano' nat jax bha ai Jerusaleen.

Nam ba yaaspa' gu Jesuus

(Mt. 27:57-61; Lk. 23:50-56; Jn. 19:38-42)

⁴² Ba' mikkat nat pai' ba tuk nam ba' moox kii' bam duñia' gu Israel kam ja'tkam, na gu' buimgidhak cham ka tum juanda', ⁴³ mi' ba ai maa'n gu maa'nkam Arimatea kam, Josee tiigim. Dhi' maadit jir ja gę'kam tuk ka' gu Israel kam ja'tkam.

Jir jix bhai'kam ka', na gu' pui' tiip nii'rada' guch Xoi'kam na pai' dhuuk ya' aaya' dhi oi'ñga'n. Ba' juraa'n xi dhaasak mui' ma jii na pai' daa gux kai' Pilaato, nat tikkam no'x bhai' na tibaañdhai yaaspara' gu Jesuus. ⁴⁴ Ba' bhammi ḡek pui' ba titda. Mi' pui' pup tu'ii' gu Pilaato, na gu' cham ilhdhat no' jotmoda' mukia' git. Ba' ba bai'ñ gui' nar ja mo' ka' gu sandaarui'x, nat mi' ai ba' xi chikka no'r silihkam nat ba muu gu Jesuus. ⁴⁵ Ba' gui'p kai'ch nar silihkam. Ba'p titda gu Pilaato gu Josee nax bhaai' na tibaañdhai ba bhiïka'. ⁴⁶ Ba' gu Josee xi saba'dak maa'n ḡe' gu jannulh jix dha'ram namkim, ki'n xi bhiibgak mummu tikaam jamit gai di'n kir, mu nat pai' tim digaar biipi' dir jix moik ai' cha'm, gio ba' na mit bhai' xi kuupak maa'n gu ḡe' jodai ki'n. ⁴⁷ Ba' gu Mariiya Magdalena, gio gu jumai Mariiya gui' nam jax maap ba jiimda', niilñ am na mit pai' tii' gu tukga'n gu Jesuus.

16

Gu Jesuus na gio mi'p ba oiriida' gatuuk maaxik sia ku mit mua

(Mt. 28:1-10; Lk. 24:1-12; Jn. 20:1-10)

¹ Ba' mikkat nat ba buus gu tanoolh na cham tum juanat, gu Mariiya Magdalena, gio gu jumai Mariiya gui' nar di'ii'n gu Jakoobo, gio ba' gu jumai gu ubii gui' na Salomee tii', ba tu saba'lh jamit gui' na joidham uub nam sap mu juulhdhapu' gu tukga'n gu Jesuus mu na pai' kaat, na sap ba' cham giilhim uub ka' na bhai' ji dhibaa'. ² Ba' tumiiñku ta'm jix ki'n kob nat kia'pix bhai' ba ji chon, mui' ma jii mit mummu di'n kir, nam gu' ja'p jum aa' na

pui mu kaat gu Jesuus. ³ Ba' nam namm̄i gama ja'k ba jiimchu', jup kai'chim am:

—¿Jarooch ba' umua'ñdha' na ja'k daasa' gu jodai gui' na ki'n bha kuup? Nach gu' aach cham nakoo' nach jax dhui ja'k daasa'!

⁴ Gu' ji na gu' na mit mu ba ai, mi' pix kupio'kix, ja'p gai dhir pix dhaa gu jodai gu ge' na ki'n bha kuupich. ⁵ Ba' gui' dai na mit jiimit pu baap bhiji di'n kir, ba' miji pix ji chii mit na daa maa'n gu biapma' te'b katuun am jix chua, kii'n dir daa mi' na pai' kaatit gu Jesuus. Ku gu' cham tu'r maa'nkam ji, ja'pji gu nobii'ñ guch Gi'kora' jix dhaam kam. Ba' giilhim jix chooto'n jamit, ⁶ gu' ji nat gu' jotmoda' bha ñio, jup ja titda:

—Cha'pim totdon ka'. ¿Jesuus Nasareet kam aa pimit tii gio bhai'p ba tiigim, gui' na mit bas takaab bhammi sissapa kuruus ta'm? Ba jii ji bo, nat gu' giop ba dua. Cham tu' ka muukix. Ka gor mi' xi chi tii' na pai' kaatit na cham pai' tu jai'ch. ⁷ Cham tu' ji na pim jix buam jum aagit yiji ka ti ninii'ñdha' di'n kir, ja'pji dai na pim ja aa'ñdhapu' gu noonbi'ñ, pui' na jax gu Peegro. Ja'p japim tiida' nat giop ba dua gu Jesuus, mummu ja'k japim ba tigia' Galilea na ba oirida', pui' na jax ba jam titda biipi' dir nam ba' moo daagii ba mu'aa'.

⁸ Ba' gui' bubuakik pu jiboi'ññor jamit gi'bukidhat, na mit gu' giilhim jix chooto'n. Pu cham jaroi' aagi'ñ am na mit jax ti tii, nam gu' daix juraapgixchu'.

*Gu Jesuus na mi' bam maaxdha' ja bui baik gu ja'tkam tugi'ñ
(Jn. 20:11-18; Lk. 24:13-35)*

9 Ba' ja'xpix cham miikim mu bam maax gu Jesuus buiñor gu Mariiya Magdalena, gui' nat xijum gook mai' joochxi gu cham kikii' i'ii'mda' bhai' dhir bhaan na ki'n jix ñaanbi' kat. **10** Mi' dhir ba' xi mii nat ja aa'ñdham gu jai' gui' nam pui'p ti jiigi'ñ buiñor gu Jesuus mu nam pai' daraat suan nam jix buam jum aa' nat sap muu. **11** Ba' mu ɸek tii ba ja aagi'ñ nat giop ba dua. Tiip ja titda nat maaxik tii, pu cham jiigi'ñ am.

12 Ba'x io'm ja'xpix mummu ja'k jup bam maax gu Jesuus ja bui gook gu ja'tkam tugi'ñ nam mu ja'p ka jiimchu' biix boi. Dai na maakam tu'm, cham ob maatit tii mit. **13** Ba' gui' tiip xi boop jamit na mit ja aa'ñdham gu jai'. Pui' cham jup jiigi'ñ am.

*Gu Jesuus na mi'm maaxdhai ja bui gu mambhiix
damon maa'n gu noonbi'ñ ba tu ja a'gidha'
(Mt. 28:16-20; Lk. 24:36-49; Jn. 20:19-23)*

14 Ba' mikkat mummu bam maax dho gi ji ba' gu Jesuus ja bui gu mambhiix damon maa'n gu noonbi'ñ, mu nam pai' daraat ka tu kua!. Ba' pix am ja ñioki'ñ, tu' sap ku ba' moo ja'p jix kaapak gu ja jujur nam ba' cham ja jiigi'ñ nam tii ja aagi'ñ gui' na mit biipi' dir tii nat giop ba dua. **15** Mi' dhir ba'p ja titda:

—Ba' xib dir tu' na jax chui'ka', nai' pim xi jimia' jiñ jaaduñ na ji'x oi'ñga'n na pim tu ja a'gi'ñpu' jiñ a'mkam dappaam na ji'k ja'tkam gux bhai'm kai'chdham ñi'ook. **16** Ba' gui' nam ji'k ti ji'ñdhai bam bopkona', dai nam ba jimia' jix dhaam ja'k. Gu' ba' gui' nam ji'k cham ti jiigi'ñdha', pix am ti'ñchuka' am nam gammijim tulhiña'. **17** Gam gui' nam tu' silhkam ti jiigi'ñdha' aañ jiñ bui, ja makia'

iñ gux Dhuudu' kam jix Uañ Ii'mda' nam ba' ki'n mai' ja jootsa' jiñ a'mkam gu cham kikii' i'ii'mda' ja a'm dir gu ja'tkam, gio ba' nam ki'n tu a'gada' jai' gu ñi'ook na ba' bhaan jix maati' ka' nañ aañ ja a'm ti niiidhidha'. ¹⁸ Gio ba' na cham ji'xkat ia'ñdha' no't tu' ko' ba kii maadit. Piam no't jax dhuuk juu gu pa'ch, cham tu' maimtuda'. Gio ba' nam ja duduadhi'ñdha' gux kako'kkam, dai nam bhai' pix xi ja da'ngida', pu duduarda' am.

*Gu Jesuus na ba tisdia' jix dhaam ja'k
(Lk. 24:50-53)*

¹⁹ Ba' daipu' na jax pui' ji' xi chu ja a'gidhimik gu Jesuus, pu jiix dhaam ja'k, ba' bhammi ji dhaibu kii'n dir sonpan gu Dios. ²⁰ Ba' gu noonbi'ñ nai'p ji jii mit na mit tu ja a'gidham gu ja'tkam gux bhai'm kai'chdham ñi'ook na jax ba' ba tum a'gichu' sia gu xib. Jix bhai' dho tu buimik am gu tu' nax bhai'r jum duukam, na gu' guch Xoi'kam piñjup tu duiñchu' na jax ba ja titda biipi' dir nat ba' moo ba jii jix dhaam ja'k.

Gu ñio'ki'ñ gu Dios na bhaan tu a'ga guch xoi'kam

New Testament in Tepehuan, Southeastern (MX:stp:Tepehuan, Southeastern)

copyright © 2007 Wycliffe Bible Translators, Inc.

Language: Tepehuan, Southeastern

Translation by: Wycliffe Bible Translators, Inc.

Tepehuán del sureste [stp], Mexico

Copyright Information

© 2007, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tepehuan, Southeastern

© 2007, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

**PDF generated using Haiola and XeLaTeX on 11 Nov 2022 from source files
dated 29 Jan 2022
0f8d31b9-5dd5-5a02-bb46-c2fd0a544e81**